

JNIÑU JEHNU JEE NI CASAHA TEE APOSTOL

Jeē ni jéjnūhun ya quiji Espíritu Santo

¹ Amigo Teófilo, nuū tútu jeē ní tee ná xíhna gā ni castūhun ná nuū ni táca jniñu ní sáha Jesús, jíin táca jnúhun ni steén yā nde quivī ní quejéé yá ni sáha ya ² te nde quivī ní ndaa ya cuanuhun yā andiví. Te nde ná tu ndaa ya quihīn yā, te ni sáha Espíritu Santo jeē ní ndacu ya jniñu nuū táca apóstol, tēe ni nacāji ya. ³ Te nuū ni jínu ni ndoho ya jeē ni jíhī yā, te uū xico quivī te tijni jínu ni steén ndijin yā maá yá nuū tée un jíjnáhan de, te súcuan ni cajini de jeē iyó ndáa jeē ní natecu yā. Te ni cahān yā jíin de siquī ndese ndácu Yaā Dios jniñu.

⁴ Te ná cáhiin tútu de jíin yá, te ni cahān yā jíin ndihi de jeē ma quéndaco de ini ñuu Jerusalén, chí áchí yá:

Condetu ró ndé quee Espíritu Santo jeē ni jéjnūhun máá Tátá rī Yaā Dios. Chi je ni cachi rī nuū rō jeē ni jéjnūhun ya quiji Espíritu Santo. ⁵ Chi Juan, jendaá jeē maá ndute-ni ni scuándute de ñayuu. Te róhó jíjnáhan ró, jecu na quivī te nájnūhun cuandute ró jíin Espíritu Santo, cúu jeē condee yā ini anuá rō, achí yá.

Jeē ní ndaa Jesús cuanuhun yā andiví

⁶ Yūcuán na te tēe cáhiin tútu jíin yá, ni cacajnúhún de ya:

¿A vijna te nasáha ní jéé ñáyuu ñuu yō Israel ndujéhu i ndacu i jniñu nuū nación yō chí naún? áchí de.

⁷ Te ni cahān yā:

Ma cúu cuni rō quivī chí cuíyā jeē cóo jeē ni sándaá maá Tátá rī, chí máá ñn-ni máá yá jiní yā na quivī sáha ya. ⁸ Te

jeē cúni rō cúu jeē quée Espíritu Santo te condee yā ini anuá rō jijnáhan ró. Yūcuán na te nihīn rō poder te nacani ró jnúhun ri ní ini ñuu Jerusalén, ní Judea, ní Samaria, nde ní cáhnu ñayīví, áhí yá jíin de.

⁹ Te ni ndihī ni cahān yā tāca jnúhun yáha. Te níni cájito de nuū yā, te ni ndaa-ni ya cuanuhun yā andiví. Te ni quee vicō ni jesi-ni nuū cuahán yā, te tuá ni cájito de ya. ¹⁰ Te níni cáhiin de cájito ndaa de ichi ándiví núu ní ndaa ya cuahān yā, te uū jnáhan ndajéhé yā cáñuhun ya sahma cuijín ní cajecuiñī yā xiin de jíjnáhan de, te cájito ya nájnūhun tē. ¹¹ Te ni cacahān yā jíin de:

Róhó tée Galilea, ¿najahē cájito ndaa ró ichi ándiví? Chi máá Yáa Dios ni naquihin ya Jesús cuanuhun yā andiví, te suni súcuan ndiji ya nájnūhun cájito ró cuahān yā andiví, áhí yá.

Jeē ní canacāji de Matías jeē nucuñī de nuū Judas

¹² Yūcuán na te ni nanungoo de yucu jeē naní Olivos, cuanungoo de ñuu Jerusalén. Te yajni-ni íne yucu un jíin ñuu Jerusalén, nájnūhun ñin kilómetro-ni, cūhva jeē ni jéhe ley permiso caca ñayuu quivī ndétátú. ¹³ Te ni ndivícoo de ini ñuu. Te ni ndacoo de cuarto xinī véhe nuū cáyūcu núu de. Te tācá de cúu Pedro, Jacobo, Juan, Andrés, Felipe, Tomás, Bartolomé, Mateo, Jacobo sēhe Alfeo, Simón jeē cúu jnáhan grupo cananista, jíin Judas ñani Jacobo. ¹⁴ Tāca tée yáha, níni cándutútú inuú de cájicān tahú de jíin tāca ñani Jesús jíin náná yā María jíin sava ga ñahan.

¹⁵ Te ñin quivī te ni jecondichi Pedro nuū tācá hermano cácadíje. Te cáhiin nájnūhun ciento ocō ñayuu. Te ni cahān de:

¹⁶ Hermano jijnáhan ní, ni squícu nahín jnúhun cáhán tutu íi jeē ni cáhān David nde jenahán ní sáha Espíritu Santo. Te jnúhun un ní cuu siquī Judas jeē ní yosnúu núu

tée ni cajniñi Jitoho yō Jesús. ¹⁷ Te suu tēe un ní jica de jíin yó, te ni chindéé ñáhán jnáhan de jíin yó siquī jniñu ní jeni ya yohó. ¹⁸ Te ni cajeen ñin ñuhun jíin xúhun ní nihin tēe un síquī jniñu neé ní sáha de. Te ni ñinga ndeyi de, te ni ndatā sáva chíji de, te ndihi yiti de ni jitē. ¹⁹ Te ni jitē jñuhun yáha núu tāca ñáyuu cáyucú ñuu Jerusalén, te jeē yúcuan cúu jeē ní casnání i ñuhun ún Acéldama nuū yúhu máá i, jeē cuní cahān ñuhun jeē cúu cuenta niñi. ²⁰ Chi súcuan je yósó núu tútu Salmo siquī Judas:

Vehe de na quéndōo iyú,

te ma cóndee ni ñin ga ñayuu ini vehe ún.

Te suni cáhán:

Jniñu ní condiso de na cóndiso ñinga tēe.

Achí.

²¹ 'Núu súcuan te jíni ñúhún jeē núcuñiñi ñin tēe lugar maá de jíin yó. Te tēe nucuñiñi jíin yó un, nacāji yó de mēhñu táca tēe ni cajica jíin yó tāca quiví jeē ní jica máá Jitoho yō Jesús jíin yó. ²² Te tēe nacāji yó un cúu tēe jeē ni íyo de jíin yó nde quiví ní jendute ya ni sáha Juan, te nde quiví ní ndaa ya cuanuhun yā andíví. Te tēe nucuñiñi jíin yó na cúu de testigo jíin yó jeē jé ni natecu yā, achí de.

²³ Te ni catee nuū de uū jnáhan tēe: Matías jíin José jeē naní de Barsabás te suni naní de Justo. ²⁴ Te ni cajicān tahu de:

Tátā Yaā Dios, máá ní chi jíiní ni ndese cáa ánuá tāca ñáyuu. Núu súcuan te jeē ndindúú tēe yáha, stéén ni ndé ñin de cúu jeē ní nacāji ní. ²⁵ Te condiso jniñu de cuu de apóstol. Te naquihin de jniñu ní stóo Judas, chi ni sáha de cuēchi te cuahān de lugar xeēn nuū cánuú quíhín de, achí de.

²⁶ Yūcuán na te ni casáha de ñin sorteo te ni jinū Matías, te ni nucuñiñi de ni nduu de jnáhan ndihúxi ñin apóstol.

Jeē ní quee Espíritu Santo

2

¹ Te máá quívī víco Pentecostés ni cahīin tūtú ñáyuu cácanđje ñuu Jerusalén. ² Te sanaa-ni te ni quejéé ñhīn vēji nde andiví nájñūhun tachī ñhīn queé, te tāca ñáyuu jeē cáyūcú ini vehe un ní cajini sōho i jeē ñhīn ún. ³ Te ni cajito i nájñūhun yáñuhūn jeē ní cajitē núu te ni cacucōo xinī ná ñn ná ñn i. ⁴ Te ndihī i, ni cunuú Espírītu Santo jíin i, te ni quejéé i cácahān i sñn sñn yuhu, ndese ni steén maá Espírītu nuū ná ñn ná ñn i cahān i.

⁵ Te ñuu Jerusalén, suni cáhīin ñayuu hebreo, yiñúhún núu Yaā Dios, jeē ní quijicoo i nde tācá nación ñhī cáhnu ñayīvī. ⁶ Te jeē ni ñhīn súcuan te ni cacutútú cuéhē ñayuu ún. Te ni cunéé īi ni i jíjnáhan i, chi ná ñn ná ñn i ni cajini sōho i jeē tée ni canihīn Espírītu Santo cácahān de jñūhun yuhu ñúū jicá nuū vēji i. ⁷ Te ni canaa ni i cájito i te ni cacahān i:

¿A násūu tée Galilea cácuu tāca tée yáha jéē cácahān de tācá yuhu ñúū nuū véjicoo yó? ⁸ ¿Na vé ni cuu yáha núu súcuan? Chi ná ñn ná ñn yó cájini sōho yó cácahān de jñūhun yuhu ñúū nuū ní cacacu yó. ⁹ Chi vējicoo yó ndé tācá ñuu jicá. Sava yó vēji nde Partia jíin Media jíin Elam. Te sava ga yō vēji yó ndé Mesopotamia jíin Judea jíin Capadocia jíin Ponto jíin Asia. ¹⁰ Suni nde Frigia jíin Panfilia jíin Egipto jíin tijni ñuu jeē íne nde yatā gā ñuu Cirene ñuhun Africa vējicoo yó. Te sava ga yō nde ñuu Roma vējicoo yó, te cáyūcu jínu-ni yó yáha. Te máá yó jeē véjicoo ñuu Roma, sava yó cácuu máá ñáyuu hebreo te sava ga yō cácuu ñayuu sñn ñuu, ni cacandíje yó ndíquín yō ley ñayuu hebreo. ¹¹ Suni nde Creta jíin Arabia vējicoo sava yó. Te cájini sōho yó jéē jíin jñūhun yuhu ñúū ná ñn ná ñn máá yó cácahān de tācá jniñu jéhnū ní sáha Yaā Dios, achí i.

¹² Te ndihí i chi ni canaa iĩ ni i cájini nahín i. Te ni candajnuhún i jíin jnáhan i:

¿Na vé cúu jeē ní cuu núu súcuan jeē cácahān de yuhu ñúu yō? achí i.

¹³ Te sava i ni cacahān catá i:
Tuú chi jeē cánajīni de, áchí i.

Jeē ní nacani Pedro jnūhun nuū ñáyuu

¹⁴ Yūcuán na te ni candocuiñī Pedro jíin ndihúxí iin ga apóstol, te ni cahān jee Pedro jíin ñáyuu ún:

Níhín jnáhan ñuu yō hebreo, jíin ndihí níhín jéē cáyūcu ní Jerusalén, jnūhun yáha na chúhun ni ni jíin náhan ní, chi cuni nahín ní cahān na jíin ní. ¹⁵ Chi máá ná jijnáhan ná, nasūu jéē cájini ná nájnuhun cájeni ni ní, chi sáá cahīn jenéhen cúu, te nasūu hora cánajīni ñayuu cúu. ¹⁶ Chi sa suhva squícu jniñu yáha nájnuhun ni cahān Joel, tēe ni nacani jnūhun Yaā Dios nde jenahán, chi súcuan ni cahān de:

¹⁷ Achí Yáā Dios: Quivī sándīhí na
te tají rí Espíritu rī cunuú yá jíin táca ñáyuu,
te sēhe yí ró jíin séhe síhí ró, nacani i jnūhun ri,
te tāca tēe lulí chi coto ndijin de jeē steén rī nuū de,
te tāca tēe jéhnú chi sáha ri jeē scóto jēni de.

¹⁸ Te quivī ún chi tají rí Espíritu rī cunuú yá jíin táca mozo
rī, cúu tēe cúu ñahan,
te nacani i jnūhun ri.

¹⁹ Te ichi ándiví sáha ri jniñu jéhnú jeē náā ni ñayuu coto
i,
te sáha ri jniñu jéhnú ini ñayīví jéē steén jeē cujéhnú ri,
chi coo niñī jíin ñúhūn jíin ñúhmā nájnuhun vicō.
Yūcuan cúu jeē sáha ri jeē cóo jnūndóho xeēn.

²⁰ Te nduu jnúú níāndii te ma cúndijin gā,
te yoō coto cuéhé nájnuhun niñī.

Yūcuán na te quee quivī jeē ndíji máá Jítóho rō Jesús.

Quiví ún coo cuehē jniñu jéhnú, te cuni ndíhi ñayuu jeē
quíví maá Jítóho rō cúu.

²¹ Te tāca ñáyuu jeē cahān ndahú i jíin yá te jnama ya i,
áchí Yáā Dios.

Achí Joel ni nacani de jnūhun ya.

²² Jeē yúcuan níhín tée ñuu yō Israel, cuni nahín gá ni
jnūhun yáha jíjnáhan ní. Ni steén Yaā Dios jeē ní tají yá
maá Jesús, Yaā ní jehnu ñuu Nazaret, chi máá Yáā Dios ni
jēhe ya jeē ni sáha Jesús jniñu jéhnú mēhñu máá ní, jíin
jniñu jeē steén jeē kujéhnú ya, te jniñu un ní canaa ni ní
ní cajito ní. Te je cájini vāha ní jéē súcuan ni cuu. ²³ Te
máá ní ni cajniñi ní yá, te ni cajendēca ní yá nuū tée xeēn
ni cajehni de ya jicā cruz ni casáha ní. Te nde jíin tiempo je
ni jini Yaā Dios jeē súcuan sáha ní jíjnáhan ní, chi súcuan
je ni sándaā yā. ²⁴ Te ni nastécu Yaā Dios Jesús te tuá ni cúu
ya ndīyi, chi jnūhun xeēn jeē jihí ñayuu, tuá na vé cúu ga
sáha jíin yá. ²⁵ Chi nde jenahán suhva ni tee David jnūhun
ndese ni cahān Jesús jíin Yáā Dios:

Jíní na núū maá ní jeē cúu ní Jítóho ná, chi níí cáni ndéé
ní jíin ná,

chi ndéé ní ichi ndáváha ná, cúu jeē chindéé ñáhán ní sāña
návāha coo ndeyí ni ná.

²⁶ Jeē yúcuan cúsiñi ni ná te cáhán na jnúhun siñi ni.

Jeē yúcuan ma nácani uhū ni na síquī jnúhun cuu ná.

²⁷ Chi ma cuáha ni jnúhun quendōo ánuá na lugar nuū
cáyūcu ánuá ndīyi,

ni ma cuáha ni jnúhun tehyū ná, chi jéjníñu ná núū ní te
maní ni jíin ná.

²⁸ Te ni steén ni núū na jéē nátecu ná,

te sáha ní jéē cusíñi teyí ni ná condee na jíin ní níí cáni.

Achí Jesús, ni achi David.

²⁹ Tāca níhín jíjnáhan ní, na cástūhun cájí ná nuū ni
jnūhun jíi yō David, chi tu ní cáhán de jnūhun yáha síquī

maá de. Chi ni jihī de te ni quindūji de, te jíní yō nuū yíndūji de nde vijna. ³⁰ Chi ni cuu de tēe ni nacani jnūhun Yaā Dios nde jenahán. Te ni jini de jeē váha ni jejnūhun ya nuū de jeē chíji yucūn maá de quiji Cristo, te condee yā mesa de ndacu ya jniñu nájnūhun ni ndacu de jniñu jeē ní cuu de rey. ³¹ Te nde jíin tiempo ni jini de jeē nátecu Cristo, te ni cahān de jeē anuá yā, ma ndóo lugar nuū cáyūcu ánuá ndīyí, ni yíqui cúñu yā ma tehyú. ³² Chi Yaā Dios ni nastécu yā Jesús, te máá ná cácuu ná testigo jeē ní natecu yā. ³³ Te ni ndujéhnu tucu ya ni sáha Yaā Dios jíin poder yā. Te nde nuū maá Yáā Dios, Yaā cúu Tátá yā, ni nihīn Jesús Espíritu Santo, chi súcuan ni jejnūhun ya. Te ni tají Jesús Espíritu Santo, te suu ya sáha jniñu jeē cájito ní te cájini sōho ní vijna. ³⁴ Te David, nasūu síquī maá de ní cáhán de táca jnūhun yáha, chi tu ní ndáa yíqui cúñu de andiví. Chi síquī Cristo cúu jeē ni cáhán de suhva:

Máá Yáā Dios ni cahān yā jíin Jítoho rī Cristo:

Cucōo ró ichi ndáváha ri jeē steén jeē cujéhnu ró.

³⁵ Te na sáha ri jeē quende rō poder táca jéē cájito uhū rohó, áchí yá.

Achí David.

³⁶ 'Núu súcuan te ndihí ní jéē cácuu yó ñayuu Israel, na cúni vāha ní jéē vēsú ni cajehni ni yá jicā cruz, te Yaā Dios ni jeni ya maá Jesús jeē cúu ya Jitoho yō te suni cúu ya Cristo, Yaā jnáma yóhó, áchí Pedro jíin i.

³⁷ Te jeē súcuan ni cajini sōho i jnūhun yáha, te ni cajnahuhū ni anuá i. Te ni cacajnūhún i Pedro jíin táca gá apóstol:

¿Te ndese sáha ná jíjnáhan ná núu súcuan? áchí i.

³⁸ Te ni cahān Pedro jíin i:

Nacani ni ni jéē stóo ni cuéchi ní jíjnáhan ní, te cuandute ní jéē ní cacandíje ní Jesucristo, náváha cone cáhnu ni Yaā Dios nuū cuéchi ní, te cuāha Yaā Dios Espíritu Santo

yā condee yā ini anuá ni. ³⁹ Chi súcuan ni jejnūhun máá Tátá yō Yaā Dios nuū yō jíin núū séhe yó, te suni súcuan ni jejnūhun ya nuū ñáyuu tāca gá nación, tācá i jeē cána ya i candíje i.

⁴⁰ Te jíin cuéhē gā jnūhun súcuan ni cahān cají Pedro, te ni stihví ni de i:

Nducú ndéyí ní jeē na cácu ní, chi jnahnū ndetū ñayuu casáha jniñu néé, áchí de.

⁴¹ Yūcuán na te tācá i jeē ní cajetáhú jnúhun ni cahān de, ni cajendute i. Te quivī un ní nducuehē gā ñayuu cáccandíje, nájnūhun unī mil gā ñayuu. ⁴² Te ni cahīin nihin i siquī jnúhun cástéén apóstol. Te inuú-ni cánda-jnūhun mánī i te cájicān tahú i, te ñin cáhnu-ni cáyeji i pan, nájnūhun ni steén maá Jítóho yō jeē núcūhun ni yō siquī yā.

Ndese ni coyūcu ñáyuu jeē ní cacandíje jeē xihna ñúhún

⁴³ Te ndíhi ñayuu ni cayūhú i ni cajito i, chi cuehē jniñu jéhnú jeē steén jeē kujéhnú ya ni casáha tēe apóstol. ⁴⁴ Te inuú ní cahīyo ni ñayuu cáccandíje, te ni cacuu inuú i tāca jéé cánevāha i. ⁴⁵ Te ni caxícó i na-ni na vé cánevāha i, te ni casaja i xūhún un núū tāca jnáhan i, núū ndese jíni ñúhún ñin ñin i. ⁴⁶ Te ndijnahan quivī ni candutútú i ini templo. Te manī ni cayeji cáhnu i pan tācá vehe jnáhan i nájnūhun ni steén yā, te ni cahīyo sīñ ni i. ⁴⁷ Te ni cacahān i jeē yóhyo cújéhnú Yaā Dios. Te ndíhi ñayuu ñuu un ní cajejnúhún i ñayuu cáccandíje. Te ndijnahan quivī ni jnama Jítóho yō sava ga ñayuu, te ni nduu inuú i jíin ñáyuu cáccandíje.

Jeē ní nduvāha tēe ríngo

3

¹ Te ñin quivī te máá cáhunī jehíni ni caa Pedro jíin Juan cuangoo de templo, chi hora un cájicān tahú jnáhan de hebreo. ² Te cájendēca ñayuu ñin tēe cáríngo nde quivī

ní cacu de. Te tēe un ndéé de ndijnahan quiv̄ yehyí templo jeē naní Hermosa, jícan de caridad nuū tāca ñáyuu quívicoo ini templo. ³ Te tēe un ní jito de nuū Pedro jíin Juan jeē véji de quívicoo de ini templo, te ni jícan de caridad nuū Pedro jíin Juan. ⁴ Te Pedro jíin Juan ni cajito vāha de nuū tēe ún. Te ni cahān Pedro jíin de:

Condēhe núu rī jijnáhan ri, achí de.

⁵ Te máá tēe un ndétu tūhva de, ni jeni ni de jeē cuáha Pedro jíin Juan jecu xūhun núu de. ⁶ Te ni cahān Pedro:

Tú na xūhun plata ni xūhun oro cánevāha ri. Te íyó ñin jeē váha ga sáha ri jíin ró: jíin poder maá Jesucristo, Yaā ní jehnu ñuu Nazaret, cáhán rī jíin ró, ndocuiñ̄ te caca ró, achí de.

⁷ Te ni jñi de ndaváha tēe ún, te ni ndonehen de. Te jehē de jíin súcun jehé de ni nduvāha-ni. ⁸ Te ñin ni scānda de máá de ni ndocuiñ̄ de, te ni quejé de jíca de. Te ni quiv̄ de jíin Pedro jíin Juan ini templo, jíca de, cánda de, te nácuatáhu de nuū Yaā Dios. ⁹ Te ni cajini tāca ñáyuu jeē jíca de te nácuatáhu de nuū yā. ¹⁰ Te ni canacuni i de jeē maá de cúu tēe ni condee yehyí templo jeē naní Hermosa, ni jícan de caridad. Te ni canaa ni i ni cajito i, te ni cayūhú i cájito i jeē ní nduvāha tēe ún.

Jeē ní nacani Pedro jñuhun ini corredor jeē naní Salomón

¹¹ Te tēe ni nduvāha ún, tu siáa de Pedro jíin Juan. Te ni cacutútú-ni cuehē ñáyuu nuū de ini corredor jeē naní Salomón, te ni canaa ni i cájito i. ¹² Te ni jito Pedro jeē ní cutútú ñáyuu ún, te ni cahān de jíin i:

Níhín tēe ñuu yō Israel jijnáhan ní, ¿najehē cánaa ni ni cájito ní jniñu yáha? ¿Najehē cájito ní núu ná te cájeni ni ni jéē maá ná jijnáhan ná íyó poder na jéē sáha ná jéē nácaca tēe yáha? ¿Chí ní nduvāha de siquī jeē tēe cájica ndaā cácuu ná cájeni ni ní? ¹³ Tuú chi máá Yāā Dios jí yō

Abraham jíin Isaac jíin Jacob jíin táca gá jíí yō, ni sáha ya jniñu yáha návāha cuni ñayuu jeē cujéñnu Sēhe ya Jesús, Yaā jeē ní cajendēca ní núū tēe cácujeñnu. Te ná ni cuni Pilato jeē siaá de ya, te tu ní cájēhe ni jnúhun. ¹⁴ Te ni casquéhichī ni yá vēsú cúu ya Yaā ndaā, Yaā iī. Te sa suhva ñn tēe jéñni ndīyi ni cacahān ni jíin Pilato jeē na siaá de. ¹⁵ Te ni cacahān ni jēe na cúū Yaā jeē sáha jeē técu ndihī-ni. Te Yaā Dios ni nastēcu yā Jesús jeē ní cuu ya ndīyi, te máá ná cácuu testigo jeē ní natecu yā. ¹⁶ Te tēe yáha jēe cájito ní te cánacuni ní de, ni candíje de jíin ná jeē iyó poder Jesús nasávāha ya de, te jeē yúcuan ní nasávāha ya de. Te jeē súcuan ni cacandíje ná ní sáha ya, jeē yúcuan ní nduvāha vāha de nájñūhun cájito ndihī ní.

¹⁷ Te na cástūhun ná nuū ni jíjnáhan ní, je jíiní na jēe maá ní jíjnáhan ní jíin tēe cácujeñnu nuū yō, tu ní cájecūhun ní ní, te jeē yúcuan ní cajehni ni yá. ¹⁸ Te súcuan ni squícu jñūhun ni cahān Yaā Dios nde jenahán jēe cánuú ndoho Cristo siquī cuéchi ñayuu, chi ni sáha ya jeē súcuan ni cacahān tēe ni canacani jñūhun ya nde jenahán. ¹⁹ Te na nácani ni ni jēe stóo ni cuéchi ní, te nasāma ini ní, te quīvícoo ní ndaha Yaā Dios návāha ndahva yā cuéchi ní. Te quee quivī jeē ndúsī ni ni sáha máá Jítóho yō. ²⁰ Te natají yá Jesús ndiji ya, chi cúu ya Cristo, Yaā ní jeni Yaā Dios jeē jnáma ya yohó. ²¹ Te jíiní ñúhún jēe cóo ya andiví ndé nasájeé yá tāca jēe iyó, nájñūhun ni cacahān tēe ndoo ni canacani jñūhun nde jenahán ní sáha Yaā Dios. ²² Chi suhva ni nacani jíí yō Moisés jñūhun nuū tāca jíí yō: Máá Jítóho yō Yaā Dios cani ya Yaā nacani jñūhun nuū rō jijnáhan ró, nájñūhun ni jeni ya ruhū. Te cuu ya ñn jnáhan ñuu yō. Te na chúhun ni rō tāca jnúhun jeē nácani ya ún. ²³ Te núu ndé tēe tú chuhun ni de jñūhun cahān yā, jnahnū ndetū de, te ma cúu ga de jnáhan ñayuu yā Israel, áchí Moisés.

²⁴ Te tāca tée ni canacani jnūhun nde jenahán, nde tiempo ni quiji Samuel te ní gá nde vijna, suni ni canacani de jnūhun siquī tācá jniñu cúu quivī yáha. ²⁵ Yucūn maá tée ni canacani jnūhun ya nde jenahán cácuu yó, te suni siquī maá yó jijnáhan yó cúu jeē ni sáha Yaā Dios contrato jiín jí yō. Chi ni cahān yā jiín Abraham: Yucūn maá ró cane Yaā sáha jeē quéndōo ndetū tāca ñáyuu ní cáhnu ñayāvi, áchí yá. ²⁶ Te jeē ní nastécu Yaā Dios Sēhe ya, te ni quiji ya nuū maá yó xíhna gā, návāha quendōo ndetū yō sáha ya, chi sama ya anuá yō jeē ma sáha ga yō jniñu neé, áchí Pedro.

Jeē ní cajendēca de Pedro jiín Juan nuū tēe cácujeñhu

4

¹ Te Pedro jiín Juan níni cácahān gā de jíin ñáyuu ún te ni quecoo tāca sūtū jiín tēe grupo saduceo, jiín tēe cácujeñhu nuū tēe cándito templo. ² Te yōhyo ni caquitī ni de siquī jeē castéén Pedro jiín Juan nuū ñáyuu, jíin jēe cánacani de jnūhun jeē nátecu ndīyi chi je ni natecu Jesús. ³ Te ni cajniñi ún de, te ni cachuhun ún de vecāa cone de nde cundijin inga quivī, chi je ni ini. ⁴ Te cuehē ñayuu jeē ní cajini sōho jnūhun ni cacahān Pedro jiín Juan ni cacandíje i. Te ni nduu nájnūhun uhūn mil jeē maá nene tēe jeē ní cacandíje.

⁵ Te jeē ní cundijin inga quivī ún, te tēe cácujeñhu nuū ñáyuu hebreo jíin tēe jéñhu cándiso jniñu jíin tēe cástéén jnūhun tutu ley yā, ni candutútú de ini ñuu Jerusalén. ⁶ Te suni ni candutútú de jíin Anás jeē cúu sūtū cujeñhu ga, jíin Caifás jíin Juan jíin Alejandro jíin táca gá jeē cácuu jnáhan sūtū cujeñhu ga ún. ⁷ Te ni candacu jniñu jeē na quíjicoo Pedro jíin Juan condichi de mēhñú, te ni cacajnūhún de:

¿Ndeé ñin ni tejniñu róhó te ndese ni nihīn jniñu ró ní sáha ró jēe ndúvāha tēe yáha? áchí.

⁸ Yūcuán na te Pedro chi ni cunuú maá Espíritu Santo jíin de, te jíin poder yā ni cahān de jíin táca téé ún:

Tāca níhín téé cácujuhnu nuū ñúū yō Israel jíin táca níhín téé jéhnú cándiso jníñu, ⁹ vijna te cástíhí ni sáña síquī ñin jniñu váha ní casáha ná jéē ní nduvāha téé cúhú yāhá. ¹⁰ Te na cástūhun ná nuū níhín jéē cácujuhnu ní, návāha suni cuni ndíhi jnāhan ñuu yō Israel jeē jíin poder maá Jesucristo, Yaā ní jehnu ñuu Nazaret, ni nduvāha téé índichi nuū ni yáha. Te suu ya cúu Yaā jeē ní cajehni ni jíca cruz, te ni sáha Yaā Dios jeē ní natecu yā. ¹¹ Jesús cúu nájnūhun yuū cimientu jeē quítuu vehe. Te máá ní jijnāhan ní cácuu nájnūhun téé casáha vehe, te ni casquéhichí ni yá nájnūhun jeē cátejiyo ní yúū, chi tu ní cácandíje ní yá. Te ni sáha Yaā Dios jeē cúu ya nájnūhun yuū cánuú gá jeē quítuu vehe. ¹² Te tú cuiti inga jeē cúu jnama yóhó, chi tuá na inga jeē cujuhnu ní jéni Yaā Dios ini ñayivi yáha jéē cúu jnama yóhó, áhí Pedro.

¹³ Yūcuán na te ni cajini un jéē Pedro jíin Juan jéhnú-ni cácahān de. Te je cájini jeē tú tūhva de, chi téé súcuán-ni cácuu de. Te ni canaa ni cájito nuū de, te ni casáha cuenta jeē ní cajica de jíin Jesús. ¹⁴ Te cándēhe núū téé ni nduvāha un, índichi de jíin Pedro jíin Juan, te tu ní cánihīn gā modo ndese ga cahān. ¹⁵ Yūcuán na te ni candacu jniñu jeē na quéndacoo síin de yatā véhe juzgado te ndajnūhun máá jíjnāhan. ¹⁶ Te ni cacahān:

¿Ndese sáha yó jíin téé yáha núu súcuán? Chi ni jité jnūhun yáha núū tāca ñáyuu ñuu Jerusalén jeē súcuán ni casáha de ñin jniñu jéhnú, te ma cúu cahān yō jeē tu íyó ndáá. ¹⁷ Te návāha ma cuité ga jnūhun yáha, na cúxeēn yō nuū de jeē ma cahán cuiti gā de jnūhun Jesús nuū ní ñin ñayuu, áhí.

¹⁸ Te ni cacana ún de, te ni cacahān níhin jíin de jeē ma cahán cuiti gā de jnūhun Jesús ni ma steén gā de jnūhun

un núū ní ñin ñayuu. ¹⁹ Yūcuán na te ni cacahān Pedro jíin Juan:

Cani vāha ni ní te núu nújnahan ni Yaā Dios jeē stóo ná jniñu ní ndacu ya jeē sáha ná te cuandije ná máa na jniñu nándacu ní. ²⁰ Chi ma cúu stóo ná jniñu jeē nácani ná jnúhun ní cajini sōho ná jíin jniñu ní cajito ná, áchí de.

²¹ Yūcuán na te tēe ni cacutútú un ní cacuxeēn tucu de nuū Pedro jíin Juan. Te ni casiáá de cuango de, chi tú cuiñi na modo stóho de chi cáyūhu cájito ñayuu, chi siquī jniñu jéhnū ni cuu ún te ndiñi i cacahān i jeē yóhyo cújéhnū Yaā Dios. ²² Chi tēe jeē ní sáha ya jniñu jéhnū jíin de jeē ní nduvāha de, víhyá gā uū xico cuiyā de.

Jeē ní cajicān tahuñ ñayuu cácanđje

²³ Te ná ni casiáá un Pedro jíin Juan cuango de, te ni najinūcoo de nuū tāca gá jnáhan de, te ni cacachi de ndese ni cacahān sutū cácujeñnu jíin tēe jéhnū cándiso jniñu.

²⁴ Te jeē ní cajini sōho de jnúhun yúcuān, te ñnuú-ni ni cajicān tahuñ de nuū Yaā Dios:

Tátā Yaā Dios jeē cujéhnū ní núū ndiñi, máa ní cúu Yaā Dios ni sáha andiví jíin ñáyiví jíin mar jíin táca ndiñi jeē iyó. ²⁵ Te jeē jíin Espíritu Santo te ni sáha ní jēe ni cáhān mozo ní David nde jenahán:

¿Najehē cáquitī ndevāha ni ñayuu sñn nación?

¿Te najehē cájeni sáa ni i jeē ndónnda i siquī ní?

²⁶ Ni cacutútú jēe cácuu rey ñayiví jíjnáhan,

te tēe cácujeñnu ni cacutútú de,

te ñnuú-ni ni candonda de siquī maá ní jeē cúu ní Jitoho ná,

jíin síquī Cristo, Yaā jeē ní jeni ní.

Achí David.

²⁷ Te jendaá chi Herodes jíin Poncio Pilato jíin táca tēe ñuu yō Israel jíin tēe tāca gá nación, ni cacutútú de ini ñuu yáha ní candonda de siquī Séhe ñi ní Jesús, Yaā ní jeni

ní. ²⁸ Te súcuan ni cuu návāha squícu tǎcá jniñu jeē jíin poder ni ní cundaā ni ni ndé jenahán jēē súcuan coo. ²⁹ Te vijna, Tátā, coto ní ndese cácahān xeēn de nuū na jíjnáhan ná, te cuāha ni fuerza ni núū na jēē cácuu ná mozo ni, návāha jéhnū-ni nacani ná jnúhun máá ní. ³⁰ Te jíin poder ní nasávāha ni ñáyuu cácuhū, te sáha ní jniñu jéhnū jeē steén jeē cujéhnū ní. Te tǎca jēē yáha sáha ní jíin poder Sēhe iī ní Jesús, áchí i jíjnáhan i.

³¹ Te nuū ní ndíhi ni cajicān tahú i, te nuū cáyūcu tútú i un ní sáha ya jeē ni jnáa. Te ndíhi i ni cunuú Espíritu Santo jíin i, te ni jēhe ya fuerza te jéhnū-ni ni canacani i jnúhun Yaā Dios.

Jeē ní canevāha cáhnu i ndajníñu

³² Te ñayuu cuehē jeē ní cacandíje chi inuú cáhīyo ni i jíjnáhan i. Te tú ni iin i ní cáhán jeē ndajníñu jeē névāha máá i cuu máá-ni i, chi tǎcá ndajníñu ni canevāha cáhnu i. ³³ Te nihin cánacani apóstol jnúhun jeē ní cajito de jeē ní natecu Jitoho yō Jesús. Te yōhyo ni chindéé ñáhán yá ñayuu cácaandíje. ³⁴ Chi tú cuiti ni iin i ní ndóho jeē cumani nuū i, chi tǎca ñáyuu cánevāha cuehē ñuhun chí vehe, ni caxícó i sava te ni caquindeca i xūhún un. ³⁵ Te ni cajēhe i xūhún un núū tée apóstol, te ni casaja tēe apóstol nuū ñáyuu cácaandíje núu ndese jíni ñúhún iin iin i. ³⁶ Te íyó iin tēe nání José jeē cúu yucūn Leví, ni cacu de Chipre, ñuhun jeē íne sñn nuū ndúte. Te tēe apóstol ni casnání de tēe ún Bernabé, jeē cuní cahān: tēe cáhán jnúhun ndeyí ni. ³⁷ Te ni xícó de iin ñuhun de, te ndáhá de xūhún un ní jēhe de nuū tée apóstol.

Siquī cuēchi jeē ní casáha Ananías jíin Safira

5

¹ Te suni inga tēe nání Ananías jíin ñasihí de Safira, ni caxícó de iin ñuhun de. ² Te ni chuvāha de sava xūhún un

cuu máá de jíin ña, chi súcuan ni candajnūhún de jíin ña, te ndáhá de inga sava nájnūhun jeē ndíhi cúu, te ni jēhe de nuū tée cácuu apóstol. ³ Te ni cahān Pedro:

Ananías, ¿naun ni jēhe ro jnúhun jeē quīvi jexeén, jeē cúu Satanás, ini anuá rō te stáhú ró Espíritu Santo cuní rō? Chi jeē ní caxīco ró ñuhun ró te cuēchi ró cúu jeē tu ní cáchi ndaā rō jeē ni squéndōo ró jecu xūhún un cuajníñu máá ró, chi ni sáha ró nájnūhun jeē ndíhi xūhun ní jēhe ró. ⁴ ¿Te á násūu cuenta maá ró cúu ñuhun un ndé ná tu xīco ró? Te ná ni xīco ró ¿te á násūu cuenta maá ró cúu xūhun jēē cuajníñu ró ndé nuū cuní maá ró? ¿Te naun ni jeni ni rō jeē stahú ró súcuan? Te nasūu máni máá tée cúu jeē jícu ró stáhú ró, chi suni Yaā Dios, áchí Pedro.

⁵ Te ná ni jini sōho Ananías tāca jnúhun yáha, te ni cotúú-ni de ni jihī de. Te tāca ñáyuu ní canihīn jnūhun ún, yōhyo ni cayūhú i. ⁶ Te ni candocuiñī tēe suchí, te ni cachusúcún de ndīyi un cuáchindūji de.

⁷ Te ni cunúu nájnūhun unī hora. Te ni jinū ñasihí ndīyi un ní quīvi ña ini vehe ún, te tú na vé jiní cuiñī ña. ⁸ Te Pedro ni cajnūhún de ña:

Cachi nuū rī, ¿á ñn súcuan-ni ni caxīco ró ñuhun ró chí tuú? áchí de.

Te ni cachi ña:

Suu súcuan-ni ni caxīco ná, áchí ña.

⁹ Te ni cahān Pedro jíin ña:

¿Naun ni casquijnáhan jnūhun ró jēē cóto ndee rō Espíritu Santo maá Jítóho yō? Chi ni nducú ró stahú ró yā. Cuni nahín jēē cáhma nanecoo tēe cuachindūji yi ró, te suni súcuan quichindūji de rōhó, áchí de.

¹⁰ Te ni cotúú-ni ña nuū jehé Pedro te ni jihī-ni ña. Te ni ndīvicoo tēe suchí un te ni cajito de jeē jé ni jihī ña, te ni caquenehen de ña, te ni jechindūji de ña xiin yí ña. ¹¹ Te

yōhyo ni cayūhú ndivii ñayuu cácanđije jíin táca gá ñayuu jeē ní cajini jnūhun jeē súcuan ni cuu.

Cuehē jniñu jéhnú ni casáha apóstol

¹² Te cuehē jniñu jéhnú jeē steén jeē kujéhnú Yaā Dios ni casáha tēe apóstol nuū ñáyuu. Te táca ñáyuu cácanđije, inuú-ni cándutútú i ini corredor jeē naní Salomón. ¹³ Te tu ní cáchundeyí ni inga ñayuu quijnáhan jíin i. Te cájejnúhún i ñayuu cácanđije. ¹⁴ Te ni nducuehē gā i, chi cúu tēe cúu ñahan ni cacandije i máá Jítóho yō. ¹⁵ Te cáquindeca ñayuu jnáhan i jeē cácuñu, te cájequin i ini calle cáca i nuū camilla jíin núu yúu, chi cácuñi i vēsú ste cuándahū Pedro na yáha siquī i te nduvāha i. ¹⁶ Te suni cuehē ñayuu táca ñuu cáhiyo yajni yūcuan ní quiijcoo i ñuu Jerusalén ni caquindeca i jnáhan i jeē cácuñu jíin jēe cándoho tachī, te ndīhi i ni canduvāha i.

Jeē ní cajito xeēn i tēe cácuu apóstol

¹⁷ Yūcuán na te sutū kujéhnú ga jíin táca gá jnáhan jeē cácanđije sahan saduceo, ni cacucuésún ni jeē siquī tēe cácuu apóstol. ¹⁸ Te ni cajniñ de tēe cácuu apóstol ni cachuhun de vecāa. ¹⁹ Te ñn ndajéhé maá Jítóho yō ni nune ya yehyí vécāa ún jecuāā, te ni quenehen ya de jíjnáhan de. Te ni cahān yā jíin de:

²⁰ Cuáhán te cuiñi ró ini templo, te yūcuán nacani cáji ró jnūhun nuū ñáyuu siquī ndese nihīn tahu i cotecu i ññ cáni, áchí ndajéhé yā.

²¹ Te ni cajini sōho de jnūhun yáha. Te nuū ní cundijin te nehen ni quivicoo de ini templo, te cástéén de jnūhun ya nuū ñáyuu.

Te níni cástéén de te sutū kujéhnú ga jíin táca jnáhan de ni canastútú de tēe junta kujéhnú ga, jeē cúu ndīhi tēe jéhnú cándiso jniñu nuū ñáyuu nación Israel. Te ni catajī de policía cuaquenehen tēe apóstol ini vecāa. ²² Te nuū

ni jínūcoo te tuá gā tēe apóstol. Te ni canandió cóo te ni cacachi:

²³ Jendaá cúu jeē ní cajito ná ndési vāha vecāa, te cáhiin tēe cándīto yéhyí un. Te nuū ní canune ná, te tú cuiti gā tēe un cáhiin ini vecāa ún, áchí de.

²⁴ Te sutū cujéhnū ga jíin tēe cújéhnū nuū tēe cándīto templo jíin sūtū cácujehnū, nuū ní cajini sōho de jnūhun yáha, te ni cajeni ni de ndese ga cúu un núu súcuan. ²⁵ Te ni quee-ni ñin tēe te ni cachi:

Tēe jeē ní cachuhun ní vecāa, cáhiin de ini templo, te cástéén de jnūhun nuū ñáyuu, áchí de.

²⁶ Yūcuán na te tēe cácujehnū nuū tēe cándīto templo, jíin tēe cácuu policía de, ni jengoo de, te yúcún ní nacueca de tāca tēe apóstol vendicoo de jíin, chi cáyūhú de jeē sanaa te cuāha ñáyuu yuū xiní de núu sáha xeén de jíin táca tēe apóstol. ²⁷ Te nuū ní najinūcoo de jíin tēe apóstol, te ni cajecuiñí de nuū tēe casáha junta. Te sutū cujéhnū ga ni cahān:

²⁸ Ni cacahān nīhin ri jíin ró jeē ma steén cuiti gā rō jnūhun tēe nání Jesús. ¿Te naun ni casáha ró jéē ní ndecāva jnūhun un ñí ñuu Jerusalén yāhá? Te cácuuni rō stau yáhu ró rúhū jijnáhan ri siquī jeē ni jíhī tēe ún, áchí.

²⁹ Te Pedro jíin táca gá apóstol ni cacahān de:

Cánuú jéē squícu ná jniñu ní ndacu Yaā Dios nuū ná te nasūú jniñu nándacu tēe. ³⁰ Máá Yáā Dios jíí yō ni nastécu yā Jesús, Yaā ní cajehni maá ní jeē ní cata caa ní yá jicā cruz. ³¹ Te ni sáha Yaā Dios jeē ní ndujéhnū tucu Jesús néne ya ichi ndáváha Yaā Dios, te cúu ya Yaā ndácu jniñu, Yaā jnáma ñáyuu. Te súcuan ni sáha Yaā Dios náváha yóhó, jéē cácuu yó ñáyuu Israel, na nácani ni yō jeē stóo yó cuéchi yó, te cone cáhnu ni yā nuū tāca cuéchi yó. ³² Te máá ná ni cajito ná táca jniñu yáha, te suni máá Espíritu Santo steén cají yá jeē súcuan cúu, chi jéhe

Yaā Dios Espiritu Santo yā condee ini anuá tāca ñáyuu jeē cájendetū nuū yā, achí de.

³³ Te ná ni cajini sōho un jnúhun yáha, te yōhyo ni caquitī ni, te cahni de cáculi nuú. ³⁴ Te mēhñú un jíjnáhan néne ñn tēe grupo fariseo nání de Gamaliel, te cúu de maestro jeē steén ley yā, te tāca ñáyuu cájejnúhún i de. Te ni ndocuiñī de, te ni ndacu de jniñu jeē na cújiyo núu tēe apóstol. ³⁵ Te ni cahān de:

Róhó jnáhan ñuu yō Israel, cani vāha ni rō núu na vé cáculi rō sáha ró jíin táca tēe yáha. ³⁶ Chi nucúhun ni rō jeē ñn cuiyā ni ndonda Teudas siquī gobierno, te ni cahān de jeē tēe téyí cúu de, te ni cacutútú nájñuhun cuñ ciento tēe jíin de. Yūcuán na te ni cajehni ñayuu Teudas, te tāca jēé ní caquijnáhan jíin de ni cajitē núu cuangoó sáa-ni, te ni jecuiñī-ni jniñu ún. ³⁷ Yūcuán na te quivī ni íyo censo te Judas, ñn tēe Galilea, ni ndonda de siquī gobierno, te ni cacutútú cuéhē tēe jíin de. Te suni ni cajehni ñayuu Judas, te tāca tēe jeē ní caquijnáhan jíin de ni cajitē núu cuangoó. ³⁸ Te vijna na cuáha ri consejo rohó. Ma stáhān gā rō tēe yáha. Siáá de na quíngoo de. Chi núu ñayuu-ni ni squejéé jniñu yáha, te jecuiñī ñi. ³⁹ Te núu Yaā Dios ni squejéé, te ma cúu casi rō, chi sanaa te siquī Yaā Dios cándonda ró, achí de.

⁴⁰ Te ni cachusóhó jēé ni cáhān Gamaliel. Te ni canacana tēe cácuu apóstol, te ni cacani de jíin cuarta ññi te ni cacahān xeēn jíin de jeē ma cahán gā de jñuhun Jesús, te ni casiáá de cuangoó de. ⁴¹ Te máá apóstol ni quendacoo de nuū junta cuangoó de, cáculi ni de jeē ni jéhe ya jñuhun ndoho de jeē cuáha ñayuu jñuhun canu de siquī jeē cáculi de ya. ⁴² Te ndiquivī castéén de jñuhun vāha Jesucristo, te canacani de jñuhun ún ini templo jíin táca-ni vehe.

Jeē ní cajeni de uxā tēe cuajniñu mēhñu ñáyuu cáculi

6

¹ Te ni cucuehē ñayuu cácandíje. Te tiempo un te tēe hebreo jeē cácahān yuhu griego, ni quejé de cácahñu de nuū jnāhan hebreo de, áchí de jeē ñahan viuda jeē cácahān yuhu griego tu cánihīn vāha ña staā jeē cásaja de tāca quívī cuu ña. ² Yūcuán na te máá ndihúxí uū apóstol ni canastútú de tāca ñayuu cácandíje, te ni cacahān de:

Tú vāha jeē jécuiñī jniñu jeē cánacani ri jnūhun Yaā Dios siquī jeē cásaja rī staā. ³ Núu súcuan te róló, hermano, nacāji ró úxā jnāhan mááyó, te na cóndiso jniñu de saja de staā. Te nacāji ró tēe jeē cájejnūhún ñayuu de, tēe ndíchí jēe ní cunuú Espiritu Santo jíin de. ⁴ Te ruhū jijnāhan ri, máni cacān tahú rī jíin jēe nácani ri jnūhun ya, achí de.

⁵ Te ndīhi ñayuu ni canujnahan ni i jnūhun ni cacahān de. Te ni canacāji i Esteban, tēe cándíje vāha jeē ní cunuú Espiritu Santo jíin de. Te suni ni canacāji i Felipe jíin Prócoro jíin Nicanor jíin Timón jíin Parmenas jíin Nicolás. Te Nicolás cúu tēe ñuu Antioquía, te ni nduu de tēe cándíje sahān ñayuu hebreo nde ná tu candíje de jnūhun Cristo. ⁶ Te ni cajeni i tāca tēe yáha núu tēe cácuu apóstol, te tēe apóstol un ní casoó de ndaha de xinī tāca tēe un ní cajicān tahú de nuū Yaā Dios siquī jniñu condiso de.

⁷ Te jnūhun Yaā Dios ni jitē gā cuahān, te ni nducuehē teyí ñayuu cácandíje i jnūhun ya ini ñuu Jerusalén. Te suni cuehē sutū ni cacandíje de jnūhun ya.

Jeē ní cajniñi de Esteban

⁸ Te ni chindéé ñáhán yá Esteban ni jēhe ya poder nuū de, te ni sáha de tācá jniñu jéhnu nuū ñayuu, jniñu jeē steén jeē cujéhnu Yaā Dios. ⁹ Te ñayuu hebreo jeē ní cacuyāhu i te ni canduu libre i, íyó vehe iī sinagoga i. Te tēe un cácuu tēe ñuu Cirene jíin tēe ñuu Alejandría jíin tēe

Cilicia jíin tée Asia. Te sava tēe un ní caquejéé de cástáhān jnáhan de jíin Esteban. ¹⁰ Te tu ní cácuñdeyí jíin de, chi ndíhí ní cahān de ni sáha máá Espíritu Santo. ¹¹ Yūcuán na te ni cascáhān sava tēe jeē na cáhān jnūhun stáhú síquī Esteban. Te ni cacahān jeē ní cajini sōho cáhān ndevāha Esteban síquī Moisés jíin síquī Yaā Dios. ¹² Te jeē súcuan ni cacahān te ni caquitī ni tāca ñáyuu jíin tée jéhnū cándiso jníñu jíin tée cástéén jnūhun tutu ley yā. Te ndíhi de ni candonda síquī Esteban, te ni cajni de cuangoo jíin de nde nuū junta cujéhnū ga. ¹³ Te ni cajeni de tēe cahān jnūhun yáá síquī Esteban, te suhva ni cacahān:

Tēe yáha tu ndé jécuiñī de jeē cahān ndevāha de síquī templo īi yáha jíin síquī ley yā. ¹⁴ Chi ni cajini sōho ná cáhān de jeē Jesús, tēe ni jehnu ñuu Nazaret, canu de templo yáha te nasama de jeē tajnúni ley yā jeē ni jéhe Moisés nuū yō, áhí.

¹⁵ Yūcuán na te ndíhi tēe cáyūcu núū junta un ní candacoto vāha nuū Esteban, te ni cajini jeē jíto nuū de ná jíto nuū ññ ndajéhe Yaā Dios.

Jnūhun ni nacani Esteban

7

¹ Te máá sūtū cujéhnū ga ni cajnūhún Esteban:

¿A ndáa jeē súcuan ni sáha ró nájñūhun cácahān de yāhá? áhí.

² Te ni cahān Esteban:

Ndíhi níhín jēé cácuu ní jnáhan ñuu yō, jíin ndíhi níhín jēé cácuñdeyí ní núū ñúú yō, cuni nahín ní jnūhun cahān ná: Máá Yáā Dios jeē yóhyo cújéhnū ya, ni steén yā maá yá nuū jíí yō Abraham nde na néne ga de región Mesopotamia, nde ná tu quihín de condee de ñuu Harán.

³ Te ni cahān yā jíin de: Stóo ñuu rō jíin táca jnáhan ró te quihín rō nuū cuáha ri condee rō, chi máá rí steén ichi

nuū quihín rō, achí yá. ⁴ Yūcuán na te ni quenda de región Caldea, te ni jinū de ni condee de ñuu Harán. Te yūcuan ní jihī tatá de. Yūcuán na te ni sáha Yaā Dios jeē ní quee de ñuu yáha núū cáyūcu yó vijna. ⁵ Te tu ní jéhe ya ni ñn tíhlí ñuhun yáha cuu tahū de. Te vēsú súcuan te ni jejnūhun ya jeē cuáha ya ñuhun un núū de nde jíin núū tāca séhe de, vēsú ná tu coo sēhe de sáá. ⁶ Te súcuan ni cahān Yaā Dios jíin de: Sēhe ró coyūcu jíca i inga ñuu, te cuūn ciento cuiyā sájniñu sáá-ni i te stóho ñayuu yúcuani. ⁷ Te siquī jeē súcuan sáha i jíin séhe ró, te máá rí chi stóho rí ñayuu ñuu ún. Te sáá te quendacoo sēhe ró yúcuani, te nucoyūcú i yāhá chiñúhún i ruhū, achí yá. ⁸ Te ni cahān yā jíin Abraham jeē na cúu de circuncidar, jeē cúu ñn jnūñi jeē ni sáha ya contrato jíin de. Te ná ni cacu sēhe de Isaac te ni sáha de circuncidar i nuū uná quivī. Te suni súcuan ni sáha Isaac jíin séhe de Jacob, te Jacob jíin séhe yí de jeē cácuu ndíhúxí uū yucūn ñayuu Israel.

⁹ Te tāca séhe Jacob ni cacucuésun ni de jíin ñani maá de José, te ni caxícó de i nuū tée jeē ní cajendēca i nde nación Egipto. Te Yaā Dios chi ni ndito ya José. ¹⁰ Te ni jnama ya i nuū tāca jnúndóho ní jito i, te ni cundíchí i ni sáha ya. Te Faraón, tēe cúu rey nación Egipto, ni cusñi ni de jíin i ni sáha ya, te ni tejniñu de José jeē cúu de gobernador te ndacu de jniñu nación Egipto jíin núū ñayuu cáyūcú vehe Faraón.

¹¹ Te ni quiji quivī jeē ni íyo ñn jnamā xeēn, te ni ndoho ñayuu ní cáhnu nación Egipto jíin ndé ñuu Canaán. Te tāca jíi yō ún, tuá ni cánihin de jeē cáji de. ¹² Te ni nihin Jacob jnūhun jeē iyó trigo nde nación Egipto, te ni tají de sēhe de ni jengoo de ni cajeen de trigo vuelta ñn. ¹³ Te jeē cuángoo de vuelta uū te ni nastúu José jeē maá de cúu ñani de jíin áhan de. Yūcuán na te ni jini rey Faraón ndé ñn jnáhan cúu José. ¹⁴ Te ni cahān José jíin táca ñani de

jeē na cóndeca de tátá de Jacob jíin ndihí jnáhan vehe de. Te ni iyo uní xico xahūn i. ¹⁵ Te súcuan ní cuu jeē ni jínū Jacob ni condee de nación Egipto nde ni jihí de. Te suni yūcuan ní coyūcu séhe de jeē cácuu jíí yō un ndé ni cajihí maá de. ¹⁶ Te ná ni quee quiví jeē ndénehen ya tāca yúcūn de jeē cáyūcu tátú de nación Egipto, te ni cacondiso de yiqui ndihúxí uū ndīyi jíí un jéē ndíji űuu Siquem, te ni cachindūji de ini yaū ndīyi ndeé jíca cáva jeē ní jeen jíí yō Abraham nuū tāca séhe Hamor űuu Siquem.

¹⁷ Te nde ná cáyūcu gá de nación Egipto, te cuacuyajni quiví jeē squícu jnūhun ni cahān Yaā Dios jíin Abraham jeē quéndacoo séhe de nucoyūcú i űuu ni jéjnūhun ya nuū i, te űayuu un ní tahū cuehē i ini nación Egipto. ¹⁸ Yūcuán na te ni nucuiñī inga rey űuu Egipto jeē tu ní jíin de jeē váha ni sáha ndīyi José. ¹⁹ Te rey un ní stahú de tāca jíí yō te ni sáha ndevāha de jíin i, chi ni sáha fuerza de i jeē ma cóto ga i séhe yiquín i te na cúū. ²⁰ Te tiempo un ní cacu Moisés, te ni cusī ni Yaā Dios jíin i. Te uní yoō ni condito sāhi náná i tátá i. ²¹ Te tuá ni cúu condito sāhí de i, te ni cachune de i nuū nanihīn séhe síhí Faraón i, te ni naquihin séhe űa i ni scuéhnu űa i nájnūhun séhe máá űa. ²² Te ni cutūhva Moisés tāca jnúhun ndíchí űuu Egipto, te ni cujéhnu de jíin jnúhun cáhán de jíin jniñu sáha de.

²³ Te nuū uú xico cuiyā de te ni jecondēhé de jnáhan de jeē cácuu űayuu Israel. ²⁴ Te ni jito de nuū ĩn tēe nación Egipto jeē sáha ndevāha jíin ĩn tēe Israel. Te Moisés ni jnama de jnáhan de Israel ún, chi ni jehni de tēe Egipto un. Te súcuan ni ndutahū jeē ni sáha ndevāha jíin jnáhan de ún. ²⁵ Te máá Moisés jéni ni de jeē jécūhun ni tāca jnáhan de jeē Yáā Dios ni tají yá de jeē jnáma de jnáhan de ún ini nación Egipto nuú, te tu ní cájecūhun cuiñi ni jnáhan de ún. ²⁶ Te inga quiví suni ni jito de nuū uú tēe Israel jeē cájejnáhan, te cúní de jeē na jécuiñī. Te jeē yúcuan ní

cahān de jíin: ¿Najehē casáha ndevāha ró jíin jnāhan ró? Chi nájnūhun ĩn ñani-ni cácuu ró, áchí de. ²⁷ Te máá tée cáni tahū jnāhan un ní chundahá de Moisés te ni cahān de: ¿Ndé ĩn ni jeni róhó jéē cujéhnū ró núū rī te sándaā rō jniñu ri jijnáhan ri? ²⁸ ¿Chí suni cúní rō cahni rō ruhū nájnūhun ni jehni rō tēe Egipto icu chí naún? áchí de jíin Moisés. ²⁹ Te nuū ní jini sōho Moisés jnūhun yáha, te ni yūhú de jeē cáhni rey de, te ni jinu de cuahān de inga nación. Te ni condee de ñuu jicá Madián, te yūcuan ní scácu ñasíhí de uū sēhe yí de.

³⁰ 'Te ni jīnu uū xico cuiyā jeē néne de yūcuán. Yūcuán na te ĩn ndajéhé Yaā Dios ni quenda ya nuū de nde nuū ñūhun téhé nuū ĩn yucu súcún Sinaí. Te ni quenda ya nuū de xinī ĩn yucū cuíi cáhnu cándahá yáñuhūn, te tu ní cáyú yucū ún. ³¹ Yūcuán na te Moisés ni naa ni de jíto de ún, te ni jehēn de nde nuū, návāha coto vāha de. Te ni jini sōho de jeē cahán maá Jítoho yō jíin de: ³² Máá rí cúu Yaā Dios tāca jíi rō jenahán, Abraham jíin Isaac jíin Jacob, achí yá. Te Moisés, quísi i de jeē yūhú de, te jeē yūcuan tuá ni cúndeyí ni de coto de nuū. ³³ Te máá Jítoho yō ni cahān yā jíin de: Quenehen ndijēn rō chi nuū ĩn ró, ñuhun íi cúu. ³⁴ Je ni jini rī ñayuu maá rí jeē yóhyo cándoho i nación Egipto, te suni jíini sōho ri jeē cájnana uhū i, te ni cuun ri vēji ri jeē jnáma ri i jijnáhan i. Núu súcuan te vijna chí tají rí rohó ndicó ró quihīn rō nde nación Egipto, achí yá jíin de.

³⁵ 'Te nde ná tu quenda Moisés Egipto, te tāca jnāhan de ni casquéhichī i de jeē ní cacahān i jíin de: ¿Ndé ĩn ni jeni róhó jéē cujéhnū ró núū rī te sándaā rō jniñu ri? ni cacahān i jíin de. Te vēsú súcuan te máá ndajéhé Yaā Dios ni quenda nuū Moisés un jéē cándahá cáyú yucū cuíi ún. Te súcuan ni cuu jeē ní natají yá de cuanuhun de nde Egipto jeē ndácu de jniñu nuū i te jnama de i. ³⁶ Te

máá Moisés ni sáha de jeē ní quendacoo jnáhan ñuu de ini nación yúcuan, te ni cayāha de Mar Rojo, te ni cajica cuu de ñuhun téhé úū xico cuiyā. Te nń tiempo un ní sáha de cuehē jniñu jéhnú jeē steén jeē kujéhnú Yaā Dios. ³⁷ Te máá Moisés cúu jeē suhva ni cahān de jnūhun yáha jíín jnáhan ñuu yō Israel: Máá Yáā Dios cani ya Yaā nacani jnūhun nuū rō jijnáhan ró nájñuhun ni jeni ya ruhū. Te cuu ya ñin jnáhan ñuu yō. Te na chúhun ni rō jnūhun cahān Yaā ún, áchí. ³⁸ Te suni nde ná ni cajica cuu jíí yō nde nuū ñúhun téhé, te ni cahān ndajéhé yā jíín Moisés xinī yúcu súcún Sinaí, te ni nihīn de jnūhun jeē cahán ndese nihīn tahu yō cotecu yō, te ni nacani de jnūhun un núū tāca jíí yō, te ni quendōo jnūhun un núū yō.

³⁹ Te tāca jíí yō ún tu ní cáconi de cuandetū de nuū Moisés, chi sa suhva ni cacuni de squéhichī ni de Moisés, te ni cacuni de nandicó de nungoo de Egipto nuú. ⁴⁰ Te ni cacahān de jíín Aarón: Sáha ní tijni yaā na cósnūu núū yō. Chi Moisés, jeē ní quenehen de yóhó Egipto vējicoo yó, tu cájini yō na vé ni ndoho de jeē tú de ndéē jeē cuahán de xinī yucu Sinaí, achí. ⁴¹ Yūcuán na te ni cajēhe de oro ni cuvāha ñin becerro oro, te nuū becerro ídolo un ní casocō de quití, te ni cacusiñ ni de jíín ídolo ni casáha de ún. ⁴² Te Yaā Dios ni cujiyo ya cuahān yā, te ni stóo ya de na chíñúhún de nuū tāca jéē jíto yó ín andíví, nájñuhun yósó núū tútu tēe ni canacani jnūhun Yaā Dios nde jenahán:

Ni cahān yā: Róhó ñáyuu Israel,

¿á cájini ni rō jeē nuū ruhū ni casocō rō quití

ná ni cajica cuu ró úū xico cuiyā nde nuū ñúhun téhé?

⁴³ Tuú, chi sa suhva ni cacondiso ró nicho jeē íne ídolo jeē naní Moloc

jíín figura quīmi jeē naní Renfán,

ídolo jeē ní casáha máá ró ni cachiñúhún ró.

Jeē yúcuan cúu jeē síaha ri rohó quíhîn jicá ró nde yatā ñūū Babilonia, achí yá.

⁴⁴ Te ni ndacu ya jniñu nuū Moisés jeē na sáha de vehe ñii nuū chiñúhún de ya, nájñūhun cáa jeē ní steén yā nuū de. Te tāca jíí yō, nde nuū ñúhun téhé ní canevāha de vehe ii un núū ní cachuvāha de tabla yuū jeē yosó jnúhun ley yā. ⁴⁵ Te ni castóo de vehe un núū ndíhi sēhe de jeē cúu jíí yō. Te ni quívi Josué jíín jíí yō ini nación yáha, te ni sáha ya jeē ní cacundeyí de jíín táca ñáyuu jeē ní cacoyūcu yáha ní cajinu i cuangoo i. Te ni quívicoo de tāca ñuu i jíín vehe ii ún, te ni quendōo nde quívi ní cuu David rey. ⁴⁶ Te ni cusí ni Yaā Dios jíín rey David. Te ni jicān de nuū yā jeē sáha de ñin vehe ii yā nuú, chi máá yá cúu Yaā Dios jíí de Jacob. ⁴⁷ Te ni cuu jeē nde sēhe yíí de Salomón ni sáha vehe ii yā. ⁴⁸ Te vésú súcuan ni cuu te Yaā cujéhnú téyí, tu ndéé yá maá vehe jeē casáha ñayuu, nájñūhun ni cahān tēe ni nacani jñūhun ya nde jenahán:

⁴⁹ Ni cahān yā:

Andívi cúu nájñūhun mesa nuū ndácu ri jniñu te ñayívi cúu nájñūhun ñin nuū yítuu jehē rī.

Núu súcuan ¿te ndese cuu sáha ró vehe jeē cóndee rī, te ndese cuu sáha ró núū ndétātu rí?

⁵⁰ ¿A násūu máá rí ní sáha ndíhi jeē iyó?

áchí máá Jítóho yō Yaā Dios.

⁵¹ Te cáhán gā Esteban:

Yōhyo cácunihni ni ní, te tu cácuni ní chusóhó ní, te cácuu ní nájñūhun ñayuu tācá nación jeē tu cájini i jñūhun ya ni tu cácandíje i ya. Chi níni cájesi ní núū Espíritu Santo, te nájñūhun ni casáha jíí yō jenahán, suni súcuan casáha ní vijna. ⁵² ¿A ní iyo tēe nácani jñūhun ya nde jenahán jeē tu ní sáha ndevāha jíí yō jíín de? Chi jíí yō ni cajehni de tēe ni canacani jñūhun jeē quíji máá Yáā ndaā. Te je ni quiyi Yaā ún, te máá ní ni canastúu ni yá nuū

tée ni cajehni de ya. ⁵³ Te vēsú nde jíin táca ndajéhé yā ni jēhe ya ley yā nuū yō, te máá ní chi tu cásquícu ní, áchí Esteban.

Jeē ní cajehni de Esteban

⁵⁴ Tāca jnúhun yáha ní cajini sōho, te yōhyo ni caquītī ni, te cánacayīhí yuhu cájito nuū Esteban. ⁵⁵ Te máá Esteban chi ni cunuú Espíritu Santo jíin de. Te ni jito de ichi ándiví, te ni jini de jeē ndíndēe núū néne Yaā Dios, te índichi Jesús ichi ndáváha ya. ⁵⁶ Te ni cahān de:

Vijna te jíto ri jeē núne andiví, te jíto ri nuū maá Yáā ní nduu tēe, índichi yā nuū cujéhnu ya lado váha Yaā Dios, áchí de.

⁵⁷ Yūcuán na te ni cajesi un sóho, te ni cacana cóhó, te inuú-ni ni candonda siquī Esteban. ⁵⁸ Te ni caquenehen Esteban cuangoo jíin de nde yatā ñúū. Te tēe ni cacahān yaá un jíin ndíhi jnáhan de ni cachucú de ticāchí de ndíto ñin tēe suchí nání Saulo, te ni cacani de yuū xinī Esteban. ⁵⁹ Te ní ní jeē cácani tāca tēe un yúū xinī de te ni jicān tahú de nuū yā:

Tátā Jesús jeē cúu ní Jitoho ná, naquihin ní ánuá na vijna, áchí de.

⁶⁰ Te ni jecuiñī yití de te ni cahān jee de:

Tátā Yaā Dios, ma quénehen ní cuéchi siquī i jeē casáha i jíin ná, áchí de.

Súcuan ni cahān de te ni jihī-ni de.

Jeē ní jito xeēn Saulo ñayuu cácadíje

8

¹ Te Saulo, ni nujnahan ni de jeē ni jíhī Esteban.

Te quiví un ní caquejéé de cájito xeēn ndasí de ñayuu cácadíje Jesús ini ñuu Jerusalén, te jeē yúcuan cúu jeē ní cajitē núu ñayuu cácadíje cuangoo i ní Judea jíin ní Samaria. Te tēe apóstol chi tu ní cájitē núu de. ² Te sava

tēe yíñúhún núu Yaā Dios, ni cachindūji de Esteban. Te yōhyo ni candahyū de jeē ni jíhī Esteban. ³ Te Saulo chí jíto xeēn de ñayuu cácandíje, te quívi de ndijnahan vehe te jnái de tēe, ñahan, chúhun de i vecāa.

Jeē ní canacani i jnūhun Yaā Dios ndañúū Samaria

⁴ Te tācá ñuu nuū cuángoo tāca ñáyuu ní cajitē núu un ní canacani i jnūhun ndese jnáma Yaā Dios ñayuu. ⁵ Te ni jinū Felipe ñn ñuu ndañúū Samaria, te nuū ñáyuu yúcuan ní nacani de jnūhun Cristo, Yaā ní jeni Yaā Dios jeē jnáma ya yohó. ⁶ Te tāca ñáyuu ní cacutútú un ní cajini nahín váha i tāca jnúhun ni nacani Felipe, te ni cajito i tācá jniñu jéhnú ni sáha de. ⁷ Chi cuehē ñayuu cándoho tachī ni canduvāha i, te cácana cóhó táchī un ní caquendacoo. Te cuehē ñayuu ni íjin jíín ñáyuu ríngo ni canduvāha. ⁸ Te jeē yúcuan ní cacusñ teyí ni ñayuu ñuu ún.

⁹ Te ini ñuu un néne ñn tēe nání Simón, te tēe tásí cúu de. Te nde ná tu jinū Felipe ñuu Samaria, te yōhyo cánaa ni ñayuu ñuu un cájito i jeē sáha Simón, te ni stahú de i ni cahān de jeē ñn tēe cújéhnú téyí cúu máa de. ¹⁰ Te nde tēe cácujehnú jíín ndivii cuiti ñayuu, cájetáhú ndasí i jnūhun cáhán de, te ni cajeni ni maá i te ni cacahān i:

Tēe yáha ní jēhe Yaā Dios cuehē poder nuū de, áchí i.

¹¹ Te cájetáhú váha i jnūhun cáhán de, chí cuehē tiempo ni sáha de jniñu stáhú ní canaa ni i ni cajito i. ¹² Te nuū ni jíñu Felipe, ni nacani de jnūhun vāha ndese ndácu Yaā Dios jniñu, jíín jnúhun Jesucristo, te ni cacandíje i te ni cajendute i, cúu tēe cúu ñahan. ¹³ Te suni máa Simón ni candíje de te ni jendute de, te ni jica cuu de jíín Felipe. Te ni naa ni de jíto de tācá jniñu jéhnú jeē sáha Felipe jeē steén jeē cujéhnú Yaā Dios.

¹⁴ Te cáyūcu tēe apóstol ñuu Jerusalén, te ni canihīn de jnūhun jeē ñáyuu Samaria ni cacandíje i jnūhun Yaā Dios. Te ni catajái de Pedro jíín Juan cuangoo de yūcuán. ¹⁵ Te

ni jinūcoo de, te ni cajicān tahu de jehē ñáyuu un návāha na quívi Espíritu Santo ini anuá i jíjnáhan i. ¹⁶ Chi ná tu quívi ya ini anuá ni ñin i, chi máá-ni jeē ní cajendute i jeē ní cacandíje i Jítoho yō Jesús. ¹⁷ Yūcuán na te Pedro jíin Juan ni casoó de ndaha de xinī i jíjnáhan i, te ni quívi Espíritu Santo ini anuá i.

¹⁸ Te ni jito Simón jeē súcuan casoó apóstol ndaha de xinī ñáyuu ún te súcuan quívi Espíritu Santo ini anuá i, te cúní de cuāha de xūhun núū tée apóstol návāha nihīn de poder un núú. ¹⁹ Chi ni cahān de:

Cúní na jéē cuāha ní poder yáha núū na, návāha núū ndé ñáyuu soó ná ndaha ná xíní i te quívi Espíritu Santo ini anuá i, áchí de.

²⁰ Yūcuán na te ni cahān Pedro jíin de:

Na náā xūhun ró je jnahnū ndetū rō siquī jeē jéni ni rō jeē jíin xūhun te cuu cuaan ró táhū jeē véji nuū Yaā Dios.

²¹ Ma nihín tahu rō jeē sáha ró jniñu yáha, chi tu íyó ndāā anuá rō nuū Yaā Dios. ²² Núu súcuan te jíni ñúhún jéē stóo rō jnúhun jeē jéni neé ni rō súcuan te cahān ndahú ró jíin Yáā Dios, te máá yá sanaa te cone cáhnu ni yā siquī jeē jéni neé ni rō súcuan. ²³ Chi jíni rī jeē cucuésún ni rō siquī jeē sáha ri jniñu yáha. Te tāca jéē neé jéni ni rō ni cunuú un jíin ró, achí Pedro jíin de.

²⁴ Yūcuán na te ni cahān Simón jíin de:

Cacān tahu ni jehē na jíjnáhan ní núū maá Jítoho yō návāha tú jnahnū ndetū na nájnūhun ni cahān ní, áchí de.

²⁵ Te Pedro jíin Juan ni cacahān cají de ndese cácandíje de jnúhun Yaā Dios. Te jeē cuánungoo de ichi ñúú Jerusalén, te tíjni ndañúú Samaria ni canacani de jnúhun jeē jnáma ya ñayuu.

Felipe jíin tée nación Etiopía

²⁶ Yūcuán na te ni cahān ndajéhé maá Jítoho yō jíin Felipe:

Quihin ichi te quihīn rō ichi sur, ichi jeē quēnda Jerusalén cuahān nde ñuu Gaza, áchí yá.

Te ichi chúcuan chi máá ñuhun téhé cúu. ²⁷ Te ni quihin Felipe ichi cuahān de. Te nde nación Etiopía ni quiji ñn tēe eunuco jeē ndíso jníñu de cúu de tesorero nuū ñáhan cúu reina ndácu jniñu nación Etiopía, nání ña Candace. Tēe un ní quichiñúhún de Yaā Dios ñuu Jerusalén. ²⁸ Te cuanuhun de néne de nuū carreta de, te cáhu de tutu jeē ní tee Isaías, tēe ni nacani jnūhun Yaā Dios nde jenahán. ²⁹ Te máá Espíritu ni cahān yā jíin Felipe:

Cuáhán quíjnahan rō tēe cuahān jíin carreta un.

³⁰ Te ni jejnahan Felipe carreta un, te ni jini sōho de jeē cáhu tēe ún tutu jeē ní tee Isaías. Te ni cajnūhún de tēe ún:

¿A jécūhun ni ni jnúhun jeē cáhu ní chí tuú? áchí de.

³¹ Te ni cahān maá tēe un jíin Felipe:

¿Te ndese jecūhun ni ná? Chi tú na tēe castūhun núū ná ndese cúu ún, áchí de.

Te ni cahān de jíin Felipe jeē na cáa de conēne ndúú de jíin de ini carreta.

³² Te jnūhun cáhu de tutu iī un cáhán suhva:

Nájñūhun lanchi jeē cuahán tī nuū cúū tī, súcuan ni casáha ñayuu jíin yá.

Te nájñūhun ñn londe quitī sáte jéē tu ndáhyú tī, súcuan ni sáha ya, chi tú na vé ni cáhán cuiti yā ná ni cajicān i cuēchi siquī yā.

³³ Te hora jeē ní cajēhe i jnūhun canu yā, tu ní cásáha ndaā i siquī yā jíin jnúhun ndaā, te ni cajehni i ya ini ñayīvi yáha.

Te coo cuehē ñayuu candíje nuū yā jeē ma cánda ni ñn ñayuu cahu i ñayuu ún.

Achí.

³⁴ Yūcuán na te ni cahān tē Etiopía un:

Cava vāha ni ní cachi ni núū ná, ¿ndé síquī cahán tē ni nacani jnūhun yáha? ¿A síquī maá de chí síquī ínga tē? áchí de jíin Felipe.

³⁵ Yūcuán na te ni nacani Felipe jnūhun vāha Jesús nuū tēe ún, chi ni quejéé de ni castūhún de jnūhun jeē ní cahu tēe ún, jíin táca gá jnūhun jeē yosó núū tútu yā. ³⁶ Te níni cuángoo de ichi ún te ni jinūcoo de nuū ñúhun ndute, te ni cahān tē Etiopía:

Yāha ñúhun ndute ¿te á tú cuu cuandute ná? áchí de.

³⁷ Te ni cahān Felipe:

Cuu te núu cándíje níhin ni ndé jíin ini jíin ánuá ni táca jéé ni sáha Jítoho yō Jesús jehē yō, achí de.

Te ni cahān tē Etiopía:

Cándíje ná jéé Jesucristo cúu maá Séhe Yaā Dios, achí de.

³⁸ Te ni sáha de jeē na jécuiñī carreta de, te ni nuu ndíndúú de cuangoo de ichi véyí núū ñúhun ndute ún, te ni scuándute Felipe tē Etiopía. ³⁹ Te nuū ní quendacoo de nuū ndúte, te Espíritu maá Jítoho yō ni sáha ya jeē ní ndoñúhún-ni Felipe. Te tē Etiopía vēsú tuá ni jíto de nuū Felipe, te cúsiñi ni de cuahān de. ⁴⁰ Te ni nane Felipe ñuu Azoto. Te nácani de jnūhun ndese jnáma ya ñayuu, cuahān de tācá ñuu nde ni jinū de Cesarea.

*Jeē ní nasāma ini Saulo ni sáha Jesucristo
(Hch. 22.6-16; 26.12-18)*

9

¹ Te Saulo chi máni cáhán de jeē cáhni de tāca ñáyuu cáncándíje i máá Jítoho yō, te jeē yúcuan ní jehēn de nuū sutú cujéhnu ga. ² Te ni jicān de carta jeē cahán jeē quihín de tācá vehe iñ sinagoga ñuu Damasco te cuhni de tēe ñahan jeē cáncándíje i Jesús, quiji de jíin i ñuu Jerusalén

nuú. ³ Te ni quihin de ichi cuahān de. Te cuacuyajni de ñuu Damasco, te sanaa-ni te ichi ándiví ní stíndēé ñin luz nuū de. ⁴ Te ni cotúú-ni de nuū ñúhun, te ni jini sōho de ñin jnūhun cáhán jíin de:

Saulo, Saulo, ¿najehē jíto xeēn rō ruhū? achí.

⁵ Te ni cahān maá de:

¿Na nihín cúu jeē cahán, Tátā?

Te ni cahān yā jíin de:

Máa rí cúu Jesús, te jeē jíto xeēn rō ñayuu cávandíje i ruhū cúu jeē jíto xeēn rō ruhū. Te jeē sáha ró súcuan cúu nájñūhun stiquē jeē tu jéndíje tí te jéñú yatá tí xiní pulla, te súcuan stóho tí maá tí, achí yá.

⁶ Te máa de chi quísi i de jeē yūhú de, te ni cahān de:

Tátā, ¿na vé cuní ni jéē sáha ná núu súcuan? achí de.

Te ni cahān maá Jítóho yō jíin de:

Ndocuiñī, quívi ró ini ñuu, te yūcuan íyó ñin tēe jeē cachi nuū rō na vé cúu jeē cánuú sáha ró, achí yá.

⁷ Te tēe cuangoo jíin Saulo, ni canaa ndasí ni de cájini sōho de ndusu jeē cahán, te tu ní cájito cuiñi de nuū jeē cahán un. ⁸ Yūcuán na te ni ndocuiñī Saulo. Te ni nducú de coto de, te tuá cúu coto de, te ni cajñiñi tēe ún ndaha de ni jinūcoo jíin de nde ini ñuu Damasco. ⁹ Te yūcuan ní condee de uní quivī. Te tu ní cúu cuiñi coto de, ni tú na vé ni yéji de, ni tú na vé ni jíhi de.

¹⁰ Te ñuu Damasco néne ñin tēe cándíje, nání de Ananías. Te máa Jítóho yō ni steén ndijin ya maá yá nuū de te ni cahān yā jíin de:

Ananías, achí yá.

Te máa de ni cahān de jíin yá:

Naun ní sáña, Tátā, achí de.

¹¹ Te ni cahān maá Jítóho yō jíin de:

Quihin ichi te quihīn rō calle jeē naní Calle Derecha, te vehe Judas cajñūhun ró ñin tēe nání Saulo ñuu Tarso, chi

jícán tahu de. ¹² Te nájnūhun ni jito ndijin de jeē maá ró, Ananías, ni jinū rō, te ni soó ró ndaha ró xínī de, te ni nanune tinūú de, áchí yá.

¹³ Yūcuán na te ni cahān Ananías:

Tátā, cuehē ñayuu cácahān jeē tée yúcuán yōhyo jító xeēn de ñayuu cácañdije i nínín ñuu Jerusalén. ¹⁴ Te vijna ni quee de yāhá, chi sutū cácujeñnu ni catejníñu de vēji de jñi de tāca ñayuu cácahān ndahú i jíin ní, áchí de.

¹⁵ Te ni cahān maá Jítóho yō jíin de:

Cuáhán, chi máá rí ni nacāji tēe un jēē quihīn de nacani de jnūhun ri nuū tāca ñayuu nación Israel jíin núū ñayuu tāca gá nación nde jíin núū tāca rey. ¹⁶ Chi stéén rī nuū de jeē cánuu ndoho de cuehē jnūndóho jeē siquí rī, achí yá.

¹⁷ Yūcuán na te cuahān Ananías. Te ni quivī de ini vehe nuū néne Saulo, te ni soó de ndaha de xínī Saulo, te ni cahān de:

Hermano Saulo, máá Jítóho yō Jesús, Yaā ní quenda ndijin nuū ní ichi jeē vēji ní, ni tají yá sāña vēji ná núū ni návāha na nánune tinūu ní, te návāha na cúnuú Espiritu Santo yā jíin ní, áchí de.

¹⁸ Te ni nanune-ni tinūu Saulo, chi ni nungoo-ni nájnūhun soō chácá ní condihyū tinūú de ún. Te ni ndocuiñī de ni jendute de. ¹⁹ Yūcuán na te ni nacaji de staā, te ni nanihīn ni de. Te ni condee de jecu quivī jíin tēe cácañdije jeē cáyucú ini ñuu Damasco.

Jeē ní nacani Saulo jnūhun ini ñuu Damasco

²⁰ Te ni quejéé-ni de nácani de jnūhun Jesús ini tācá vehe īi sinagoga, áchí de jeē Jesús cúu Sēhe Yaā Dios. ²¹ Te tāca ñayuu ni cajini sōho jnūhun cáhán de ni canaa ni i, te ni cacahān i:

¿A násūu tēe yáha cúu jeē yóhyo jító xeēn de tāca ñayuu Jerusalén jeē cájicān tahu nuū Jesús? Te siquī yúcuán ní

quee de yāha jeē cūhni de ñayuu cá candíje, te quihīn de jíin i nuū sutú cá cujé hnu núú, á chí i.

²² Te víhyá gā ni nacani Saulo jnūhun ya, te ni steén cají de jeē Jesús cúu Cristo, Yaā ní jeni Yaā Dios jeē jnáma ya yohó. Te tēe hebreo jeē cá yūcú ñuu Damasco, tu ní cá nihīn de modo cahān de jeē tu íyó ndáā jeē cahán Saulo.

Jeē ni cácu Saulo nuū jnáhan de hebreo

²³ Te ni yāha cuehē quivī. Te jnáhan de hebreo ni casquí jnáhan jnūhun de jeē cá hni de Saulo. ²⁴ Te ni nihīn Saulo jnūhun jeē cá ndito de nduú ñuu táca yéhyí pared jeē ní condúu ndihyú ñuu ún. ²⁵ Yūcuán na te ĩn jecuáā te tēe cá candíje ni caquihīn de Saulo, te ini ĩn jīca cá hnu ni cascuun de Saulo jicā pared ún, te súcuan ni cācu de.

Jeē ní najinū Saulo ñuu Jerusalén

²⁶ Te nuū ní najinū de ñuu Jerusalén, te cúní de najnáhan de jíin tēe cá candíje. Te ni cayūhu tēe un ní cajito de Saulo, chi tu ní cá candíje de jeē ní nduu Saulo tēe cá ndíje nuū Jesús. ²⁷ Te Bernabé cuahān de jíin Saulo nuū cá yūcu tēe apóstol, te ni nacani de jnūhun nuū tēe ún ndese ni jini Saulo nuū maá Jítoho yō ichi nuū cuahán de, jíin jeē ni cá hān yā jíin de, jíin jeē jé hnu-ni ni nacani de jnūhun Jesús ini ñuu Damasco. ²⁸ Te ni condee Saulo ñuu Jerusalén ni jica de jíin táca tēe apóstol. ²⁹ Te jé hnu-ni ni nacani de jnūhun máá Jítoho yō. Te jnáhan ñuu de hebreo jeē cá cahān yuhu griego, ni castá hān jnáhan jíin de, te máá tēe un cá cuni de cahni de Saulo. ³⁰ Te ni cajini tēcá hermano cá candíje, te ni cajendēca de Saulo nde ñuu Cesarea. Te yūcuan ní canatajé de Saulo cuanuhun de nde ñuu de Tarso.

³¹ Te ñayuu cá candíje Jesús jeē cá yūcú Judea jíin Galilea jíin Samaria, tuá ni cá jito xeēn ñayuu i. Te ni ije ga i jíin

jnūhun ya, te cándiso īyo i nuū maá Jítóho yō. Te Espiritu Santo ni chindéé ñáhán yá i te ni nducuehē gā i.

Jeē ní nduvāha Eneas

³² Te tāca lado jécondēhe Pedro ñayuu cácondíje, te suni ni jecondēhé de ñayuu cácondíje cáyūcú ñuu Lida. ³³ Te yūcuan ní jini de nuū ĩn tēe nání Eneas jeē ní cuu unā cuiyā cáa de chi ni ĩjin de. ³⁴ Te ni cahān Pedro jín de:

Eneas, Jesucristo cúu Yaā nasávāha ya rohó. Ndocuiñī te natuu rō yuu ró, áchí de.

Te ni ndocuiñī-ni tēe ún. ³⁵ Te tāca ñáyuu cáyūcú ñuu Lida jín ndúhvā Sarón ni cajito i jeē ní nacaca Eneas, te ni casquéndō i tāca jnūhun jeē tu íyó ndáā te ni cacandíje i máá Jítóho yō.

Jeē ní natecu Dorcas

³⁶ Te nde ñuu Jope ni īyo ĩn ñahan cándíje, nání ña Tabita, te nuū yúhu griego nání ña Dorcas. Te ñahan yáha máni jniñu váha ni sáha ña, te ni sáha ña caridad ni chindéé ñáhán ña ñayuu cúmanī nuū. ³⁷ Te tiempo yúcuan ní quejéé cuéhyī jín ña, te ni jihī ña. Te ni cascúchi i ndīyi ún, te ni cajequin i ndīyi un ndé ini cuarto xinī véhe. ³⁸ Te yajni íne ñuu Lida jín ñuu Jope, te tēe cácondíje ñuu Jope ni cajini jnūhun de jeē néne Pedro ñuu Lida, te ni catajī de uū tēe cuacana de Pedro, te ni cacahān de:

Ma cucuéé ní na quíhín yachī yō ñuu Jope, achí de.

³⁹ Yūcuán na te ni quihin Pedro ichi cuahān de jín tēe ún. Te nuū ni jínū de, te ni cacao tēe un jín de nde xinī véhe nuū catú ndīyi ún. Te tācá ñahan viuda ni candicó ndūū ña de cándahyū ña, te cástéén ña tācá sahma jín tícāchi jéē ni sáha Dorcas te ni saja ña nde na técu ña. ⁴⁰ Yūcuán na te ni ndacu Pedro jniñu jeē na quéndacoo ndihī ñayuu ún quingoo i nde yatā véhe. Te ni jecuiñī yití

de ni jicān tahu de, te ni nandió cóto de nuū catú ndýyi ún, te ni cahān de:

Tabita, ndocuiñī ní, áchí de.

Te máá ña ni ndacoto-ni ña te ni jito ña nuū Pedro, te ni nucōo-ni ña. ⁴¹ Te ni jniñ de ndaha ña, te ni ndonehen de ña. Yūcuán na te ni nacana de xinī ñáyuu cácanđje nde jíin ñahan viuda ni ndīvicoo i, te ni steén de ña nuū i jeē ní natecu ña. ⁴² Te ni jitē jnūhun jniñu yáha nñi ñuu Jope cuahān, te cuehē ñayuu ni cacandje i jnūhun máá Jítoho yō. ⁴³ Te cuehē quivī ni ndōo Pedro ini ñuu Jope, néne de vehe ñin tēe sáha curtir ñiñi, nání de Simón.

Pedro jíin Cornelio

10

¹ Te ini ñuu Cesarea ni iyo ñin tēe nání Cornelio, ni cuu de capitán grupo soldado jeē naní Italiano. ² Te cúu de tēe ndíso iyo nuū Yaā Dios nde jíin ndīhi ñayuu vehe de, te yōhyo caridad ni tēe cúu de, chi jéhe de xūhun núu ñáyuu hebreo cándoho ndáhú, vēsú nasūu tēe hebreo cúu de. Te níni jícan tahu de nuū Yaā Dios. ³ Te ñin quivī ni steén ndijin yā nuū tēe yáha nájnūhun cahunī jehíni, te ni jito de jeē ñin ndajéhé máá Yáā Dios ni quivī ya nuū néne de. Te ni cahān yā jíin de:

Cornelio, achí yá.

⁴ Te máá de ni ndacoto vāha de nuū yā, te ni yūhú de. Te ni cahān de:

¿Na vé cuní ni, Tátā? achí de.

Te ni cahān yā jíin de:

Je chíhi Yaā Dios cuenta jeē jícan tahu rō jíin jēe sáha ró caridad. ⁵ Vijna te tají ró jecu tēe na quíngoo de nde ñuu Jope, quicana de Simón jeē suni nání de Pedro, na quíji de.

⁶ Chi néne núu de vehe tocayo de Simón, tēe sáha curtir

ñii, te ndéé vehe ún yajni yumar. Te máá de castūhun núū rō na vé cúu inga jeē cánuú sáhá ró, áchí ndajéhé yā.

⁷ Te ndajéhé yā jeē ni cáhān jíin Cornelio, cuahān-ni ya. Te ni cana de uū mozo de jíin ñn soldado jeē yíñúhún núū Yaā Dios, chi cúcāhnu ni de jeē squícu vāha tēe ún. ⁸ Te ni nacani ndíhi de jnūhun nuū tāca tēe ún, te ni tají de cuangoo nde ñuu Jope.

⁹ Te inga quivī un cájica de ichi cuangoo de, te cuacuyajni de ñuu Jope. Te je yajni cahuxī uū cúu, te suu hora un ní caa Pedro siquī véhe chi cándaā, te yūcuan cácan tahu de. ¹⁰ Te ni quee sōco chíji de, te ni cuni de caji de staā. Te sáá cásáha ña ndeyu te ni steén ndijin yā nuū de. ¹¹ Te ni jito de jeē núne andiví. Te ni jito de nájnūhun ñn sahma manta jité cáhnu te núhni jnáhan ndicúun punta, te ni cuun vēji nuū de. ¹² Te chíji un cáñūhun ndinuū quití, tācá quití cúun ndaha jíin táca cóō jíin táca quití cándava. ¹³ Te ni jini sōho de ñn jnūhun ni cahān:

Pedro, ndocuiñī te cahni rō tācá quití jiñā, te caji rō tī, áchí.

¹⁴ Te ni cahān Pedro:

Ma cáji na, Tátā, chi tu yéji cuití na táca quití jeē cahán ley ni jéé tú vāha caji na tí, chi nájnūhun jeē tu cáhiyo ndoo tī nuū ní, áchí de.

¹⁵ Te ni cahān tucu jnūhun un jíin de:

Achí rí jeē iyó vāha caji rō tācá quití jiñā, chi ni sándoo ri, te ma cahán maá ró jeē tu cáhiyo ndoo tī, áchí. Te súcuan ni steén cají yá nuū de jeē cúu quihín de nuū ñáyuu vésú násūu jnáhan ñuu de hebreo cúu.

¹⁶ Te unī jínu ni cahān súcuan jíin de. Te sahma un ní ndaa cuanuhun andiví. ¹⁷ Te níni nácani ndasí ni Pedro na vé cuní cahān jeē ní jito ndijin de ún, te ni jinūcoo-ni tēe ni tají Cornelio, cácajnūhún de vehe Simón nde ni jinūcoo de yéhyí tēe ún. ¹⁸ Te cácahān jee de cácajnūhún de núu

yūcuan ndéé Simón jeē suni nání de Pedro. ¹⁹ Te níní nácani ga ni Pedro siquī jeē ní jito ndijin de ún, te Espíritu Santo ni cahān yā jíin de:

Ni quecoo unī tēe cánanducú róhó. ²⁰ Ndocuiñī te nanuu ró, te ma cáni ni rō jeē tú vāha quihīn rō jíin de, vēsú nasūu jnāhan ñuu rō hebreo cácuu de, chi máá rí ni tají rí de vējicoo de, áchí yá.

²¹ Yūcuán na te ni nanuu Pedro nuū tēe ni tají Cornelio, te ni cahān de:

Máá ná cúu tēe cánanducú ní. ¿Te na siquī vējicoo ní núu na núu súcuan? áchí de.

²² Te ni cacahān mozo un:

Cornelio, tēe cúu capitán, ni tají de sãñá. Te tēe ndaā, tēe ndíso iyo nuū Yaā Dios cúu de, te tãca ñáyuu hebreo suni cácahān i jeē tēe vāha cúu de. Te ni cahān ñin ndajéhé yā jíin de jeē na cána de níhín jēe ní vehe de te chusóhó de jnūhun cahān ni jíin de.

²³ Yūcuán na te ni cahān Pedro jíin mozo un jēe na cúcōo de ini vehe ún, te ni candōo de yūcuán. Te nuū ní cundijin, te ni quihīn Pedro ichi cuahān de jíin mozo un. Te suni cuangoo jecu hermano cácañdije ñuu Jope jíin de.

²⁴ Te nde ñnga quivī ni jinūcoo de ñuu Cesarea. Te Cornelio ndétu de jinūcoo Pedro, chi ni nastútú de tãca jnāhan de jíin táca amigo de jeē quijnāhan vāha ga de jíin.

²⁵ Te nuū ni jínū Pedro jijnāhan de, te ni quenda Cornelio ni cahān de jíin Pedro, te ni jecuiñī yití de jeē chiñúhún de Pedro nuú. ²⁶ Te Pedro ni ndonehen de Cornelio, te ni cahān de:

Ndocuiñī ní, chi sãñá suni ñin tēe-ni cúu ná, áchí de.

²⁷ Te cándajnūhún de ni quívicoo de ini vehe. Te ni jito Pedro jeē cáyūcu cuéhē ñayuu ini vehe de. ²⁸ Te ni cahān Pedro jíin ñáyuu ún:

Je cájini vāha ni jijnāhan ní jēe ley jeē cánevāha sãña ñáyuu hebreo, cáhán jeē tú vāha jeē quijnāhan ná jíin ní

quĩvicoo ná vehe ní s'quĩ jeē cúu ní ñáyuu s'ñn nación. Te Yaā Dios chi ni steén yā nuū na jēē ma kujēē ni na núu ní iin ñayuu. ²⁹ Jeē yúcuán cúu jeē vēji-ni ná, chi ni cana ní sáña, te tu ní sájēē ni ná. Te na cájnūhun ná nihín, ¿na siquĩ ni cana ní sáña? áchí Pedro.

³⁰ Yūcuán na te ni cahān Cornelio:

Vijna íyó cúun quivĩ nájñūhun máá hora yáha jēē cúu cahunĩ jehíni, te ndite ni ná chi súcuán chíñúhún ná nuū yā, te jícan tahu na ini vehe ná. Te ni quiji iin ndajéhé yā nuū ná, te ndíndēé sahma ñúhun ya. ³¹ Te ni cahān yā jíin ná: Cornelio, je ni jini sōho Yaā Dios jeē jícan tahu rō, te chíhi ya cuenta jeē sáha ró caridad. ³² Núu súcuán te tají ró mozo na quíngoo de ñuu Jope quicana de Simón jeē suni nání de Pedro, na quíji de nuū rō. Chi tēe un néne de vehe tocayo de Simón, tēe sáha curtir ñi, te yajni yumar ndeé vehe de. Te quee tēe ún te castūhún de nuū rō jñūhun cánuú, áchí yá jíin ná. ³³ Súcuán ni cuu te ni tají-ni ná mozo na cuajēcoo de cana de níhín, te na cútahū ná, chí vāha ni sáha ní jēē véji ní. Te vijna ni candutútú ná yāha návāha tāca ná cuni sōho ná ndihĩ jñūhun Jitoho yō Yaā Dios jeē ni jēhe ya cahān ní, áchí de.

Jeē ní nacani Pedro jñūhun ya vehe Cornelio

³⁴ Yūcuán na te ni cahān Pedro:

Vijna te ni jini vāha ná jēē Yaā Dios inuú-ni sáha ya jíin táca ñáyuu, cúu ñayuu hebreo jíin ñáyuu tāca gá nación. ³⁵ Chi cúsi ni yā jíin ñáyuu tāca-ni nación núu cándiso iyo i nuū ya te cásáha i jniñu ndaā. ³⁶ Chi ni cahān yā jíin ñáyuu Israel jeē ndívicoo tāca ñáyuu nuū jñūhun manĩ yā jíin i sáha Jesucristo. Te máá yá cúu Jitoho tāca yóhó. ³⁷ Máá ní je cájini ní ndese ni cuu. Chi ná ni jĩnu ni nacani Juan jñūhun jíin jēē ni scuándute de ñayuu, te ni quejéé Jesús nácani ya jñūhun nde Galilea, te ni jitē jñūhun un n'í cáhnu Judea. ³⁸ Te cájini ni jēē Yaā Dios ni jēhe ya Espíritu

Santo jíin poder nuū Jesús, Yaā ní jehnu ñuu Nazaret. Te cájini ni jēē ní jica cuu ya ni sáha ya jniñu váha, te ni nasávāha ya tāca ñáyuu jeē cándoho i sáha jexeén, chi Yaā Dios ni chindéé ñáhán yá Jesús. ³⁹ Chi máá ná cánacani cájí ná jnūhun tācá jniñu ní cajito ná ní sáha ya nií cáhnu Judea jíin ini ñuu Jerusalén. Yūcuán na te ni cajehni i ya, chi ni cata caa i ya jicā cruz. ⁴⁰ Te Yaā Dios ni nastécu yā maá Jesús nuū uní quivī, te ni ndiji ya nuū na ní cajito ná núū yā ni sáha Yaā Dios. ⁴¹ Te tu ní quíji ya nuū tācá inga ñayuu, chi nuū maá-ni tāca ná jeē jé ni nacāji Yaā Dios sāña jéē nácani ná jnúhun tācá jniñu jeē ní cajito ná. Chi ni cayejí na stáā ni cajihí ná ndute jíin yá ná ni nane ya jeē ní natecu yā. ⁴² Te ni ndacu ya jniñu nuū na jíjnáhan ná jéē na nácani ná jnúhun ya nuū tāca ñáyuu te cahān cají ná jeē maá Yāā Dios ni jeni ya Jesús jeē sándaā yā jniñu ñayuu cátecu jíin ñáyuu ní cajihī. ⁴³ Chi jnūhun Jesús cúu jeē ní cacahān tāca téē ni canacani jnūhun Yaā Dios nde jenahán. Chi ni cacahān de jeē tāca ñáyuu jeē candíje i Jesús, cone cáhnu ni yā nuū cuéchi i, áchí Pedro.

Jeē ni quiví Espíritu Santo ini anuá ñayuu jeē násūú hebreo cácuu

⁴⁴ Te níni cáhán gā Pedro tāca jnúhun yáha te ni quiví-ni Espíritu Santo ini anuá tāca ñáyuu cájini nahín jnūhun ya jeē cahán de. ⁴⁵ Te tēē hebreo jeē ni jínūcoo jíin Pedro jeē suni cácandíje de Jesús, nahán ní canaa ni de ni cajito de jeē suni ni quiví Espíritu Santo ini anuá ñayuu jeē násūú hebreo cácuu. ⁴⁶ Chi ni cajini sōho de cácahān ñayuu un sñn yuhu, te cácahān i jeē yōhyo cújéhnu Yaā Dios. ⁴⁷ Yūcuán na te ni cahān Pedro:

¿Ndé ñin casi jeē ma cuándute ñayuu yáha? Chi ni quiví Espíritu Santo ini anuá maá i, nájnūhun ni quiví ya ini anuá maá yó, áchí de.

⁴⁸ Te ni cahān de jíin i jeē na cuándute i siquī jeē ní cacandíje i Jesucristo. Yūcuán na te ni cacahān ndahú i jíin Pedro jeē na quéndō de jecu quivī jíin i.

Jeē ní nacuāha Pedro cuenta nuū ñayuu cácandíje ini ñuu Jerusalén

11

¹ Te tēe apóstol jíin táca hermano cáyucú Judea, ni canihīn de jnūhun jeē súni ñayuu sīn nación ni cacandíje i jnūhun Yaā Dios. ² Te cuanuhun Pedro ñuu Jerusalén. Te sava tēe hebreo jeē cácandíje de ya ni cacahān de nuū Pedro:

³ ¿Najehē ni condee ní vehe ñayuu jeē násūu ñáyuu nación yō cúu? Te ni yeji ni jíin i, áchí.

⁴ Yūcuán na te ni nacani cájí Pedro jnūhun nuū tēe ún ndihī ndese ni cuu siquī tēe sīn nación:

⁵ Néne ná ñuu Jope. Te níni jíicán tahu na, te ni steén ndijin yā nuū ná, te ni jito ná nájnūhun ĩn sahma manta jité cáhnu jeē nuhní jnáhan ndicúún punta, te nde ichi ándiví ní cuun ni quiji nuū ná. ⁶ Te ni jito vāha ná, te ni jini na jēe chíji un cáñūhun quitī cúún ndaha jíin quitī xéén jíin cóo jíin quitī cándava. ⁷ Te ni jini sōho ná ĩn jnūhun ni cahān jíin ná: Pedro, ndocuiñī te cahni rō tācá quitī jiñā, te caji rō tī, áchí jíini ná. ⁸ Te ni cahān ná: Ma cáji na, Tátā, chi tu yéji cuiñī na táca quitī jeē cahán ley ni jēe tu cáhiyo ndoo ti nuū ní, áchí ná. ⁹ Yūcuán na te jnūhun jeē véji nde ándiví ní cahān tucu jíin ná: Ni sándoo máá rí tī, te ma cahán gā rō jeē tu cáhiyo ndoo ti, áchí jíini ná. ¹⁰ Te unī jínu ni cahān súcuan. Yūcuán na te ni ndaa sahma un cuánuhun ándiví. ¹¹ Te hora un ní jinūcoo unī tēe vehe nuū ni cóndee ná un, cánanducú de sãñá, te ĩn jnáhan ñuu de Cesarea ni tají de vējicoo de. ¹² Te máá Espíritu ni cahān yā jíin ná jeē ma cáni ni na jēe tú vāha quihīn na jíin de.

Te suni iñū hermano yáha ní jengoo jíin ná, te ni quīvicoo ná ini vehe tēe nání Cornelio. ¹³ Te tēe un ní nacani de jnūhun nuū na jíjnáhan ná jēe ní jito de iin ndajéhé Yaā Dios, índichi yā ini vehe de, te ni cahān yā jíin de: Tají ró jecu tēe na quíngoo de ñuu Jope, quicana de Simón jeē suni nání de Pedro, na quíji de. ¹⁴ Te tēe ún cachi de nuū rō ndese jnama Yaā Dios rohó jíin ndihi ñayuu cáyūcú vehe ró, áchí yá. Achí Cornelio jíin ná. ¹⁵ Te nuū ní quejéé ná cahán na, te ni quīvi-ni Espíritu Santo ini anuá i jíjnáhan i, nájnūhun ni quīvi ya ini anuá maá yó xīhna gā. ¹⁶ Yūcuán na te ni nucūhun ni na jnúhun ni cahān maá Jítoho yō: Jendaá jeē maá ndute-ni ni scuándute Juan ñayuu. Te róhó jíjnáhan ró chi nájnūhun cuandute ró jíin Espíritu Santo, cúu jeē cóndee yā ini anuá rō, achí yá. ¹⁷ Te suni ni jēhe Yaā Dios Espíritu yā nuū maá i nájnūhun ni jēhe ya nuū maá yó jeē cácadíje yó Jítoho yō Jesucristo. Núu súcuan ¿te ndé iin cúu ná jēe cási ná jniñu jeē sáha Yaā Dios? áchí Pedro.

¹⁸ Súcuan ni cajini sōho de jnūhun yáha, te tuá ni cácahān de nuū Pedro, chi sa suhva ni cacahān de jeē yóhoyó cújéhnū Yaā Dios. Te ni cacahān de:

Suni ni jēhe Yaā Dios jnūhun jeē na nácani ni ñayuu tāca gá nación jeē stóo i cuēchi i návāha cotecu i nń cáni núu súcuan, áchí de.

Ñayuu cácadíje ini ñuu Antioquía

¹⁹ Te quīvī ní cajehni de Esteban ni quejéé de cájito xeēn de ñayuu cácadíje, te jeē yúcuan ní cajitē núu ñayuu un tāca ñuu cuango i, te ni jinūcoo i Fenicia jíin Chipre jíin ñuu Antioquía. Te ni canacani i jnūhun vāha ya nuū máni jnáhan hebreo i jeē cáyūcu yúcuan, te tu ní canacani i jnūhun ya nuū ínga ñayuu. ²⁰ Te jecu tēe cácadíje jeē cáyūcu Chipre jíin ñuu Cirene ni jinūcoo de ñuu Antioquía, te suni nuū ñayuu tāca nación jeē tu cájini

HECHOS 11:21 42 HECHOS 11:30

i jnūhun ya ni canacani de jnūhun máá Jítóho yō Jesús jeē jnáma ya i. ²¹ Te máá Jítóho yō ni chindéé ñáhán yá de, te cuehē ñayuu ni castóo i jniñu jeē tu íyó ndáá te ni cacandíje i máá Jítóho yō.

²² Te ñayuu cácandíje ini ñuu Jerusalén ni cajini jnūhun i, te ni catajǐ i Bernabé cuahān de nde ñuu Antioquía. ²³ Te nuū ni jínū Bernabé yūcuán, te ni jini de jeē yóhoyo vāha ni sáha Yaā Dios jíin i, te ni cusih̄ ndasí ni de. Te ni stihvǐ ni de tāca ñáyuu un jéē jíin ini jíin ánuá i na cóndihvǐ ni i squícu vāha i nuū maá Jítóho yō, te ma náyūhú i. ²⁴ Chi tēe vāha cúu Bernabé, te ni cunuú Espíritu Santo jíin de, te cándíje nihin de. Te ni cacandíje cuehē ñayuu nuū maá Jítóho yō ni sáha de.

²⁵ Yūcuán na te cuahān de nde ñuu Tarso cuananducú de Saulo. Te ni nanih̄n jnáhan de jíin Saulo, te ndéca de tēe un ní ndee de ñuu Antioquía. ²⁶ Te níh̄ in cuiyā ni candutútú de jíin ñáyuu cácandíje yūcuán, te ni castéén de jnūhun ya nuū cuehē ñayuu. Te ñuu Antioquía cúu nuū xih̄na ñúhún gá ni caconaní ñayuu cristiano siquǐ jeē ní cacandíje i Cristo.

²⁷ Te suni tiempo un ní quendacoo tēe cácanani jnūhun Yaā Dios ñuu Jerusalén cuango de nde ñuu Antioquía. ²⁸ Te in jnáhan de jeē naní Agabo ni ndocuiñ̄ nuū hermano cácandíje. Te ni steén Espíritu Santo nuū de, te ni castūhún de jeē cóo in jnamā xeēn níh̄ cáhnu. Te ni cuu jnamā ún in parte tiempo jeē ní ndacu Claudio jniñu jeē ní cuu de rey. ²⁹ Yūcuán na te ni candajnūhun tēe cácandíje ñuu Antioquía jeē cuáha in in de nasaa canda de cuáha de te tajǐ de quih̄n cotecu hermano cáyūcú Judea. ³⁰ Te súcuán ni casáha de. Te ni catajǐ de Bernabé jíin Saulo ni cajendéca de nuū tēe jéhnú cándiso jniñu nuū ñáyuu cácandíje cáyūcú Judea.

Jeē ní jehni Herodes Jacobo, te ni chune de Pedro vecāa

12

¹ Te suu tiempo un ní quejéé rey Herodes jíto xeēn de sava ñayuu cá candíje. ² Te ni ndacu de jniñu jeē jífn espada na cáhni i Jacobo ñani Juan. ³ Te ni jini de jeē ní cacusiñ ni tēe hebreo jeē ni sáha de súcuan, te jeē yúcuán suni ni jniñ de Pedro. Te máá quívī un ní cuu vico jeē yéji ñayuu pan jeē tu yłhi levadura. ⁴ Te nuū ní jniñ de Pedro, te ni chune de vecāa, te ni jeni de cuūn grupo soldado jeē cóndito Pedro, cuūn cuūn soldado cúu jeē ífn ñn grupo. Chi cúní Herodes jeē na yáha vico un jéē cúu vico pascua te quenehen de Pedro vecāa un stéén de nuū ñáyuu cuehē. ⁵ Te súcuan íne Pedro vecāa, te cándito soldado un de. Te ñayuu cá candíje chi níhin ní cajicān tahu i jehē Pedro nuū Yaā Dios jeē na cácu de.

Jeē ní quenehen Yaā Dios Pedro vecāa

⁶ Te jéni ni Herodes jeē na cúndijin ñnga quívī te quenehen de Pedro vecāa, te stéén de nuū ñáyuu un núú. Te núhni Pedro jífn úū cadena, cá tú de quíxí de mēhñu úū soldado jecuāā ún, te suni cáhñn ga soldado cándito yéhyí vécāa ún. ⁷ Te suu jecuāā ún te sanaa-ni te ni jinū ñn ndajéhé maá Jítoho yō, te ni ndindēé ini vecāa. Te ni squłhi ya Pedro, te ni natahū ni de. Te ni cahān yā:

Yachī ndocuiñī rō, achí yá.

Te cadena nuhní ndaha de un ní canandajī-ni. ⁸ Te ni cahān ndajéhé yā jífn de:

Nacuhni níhin chíji ró, te nuqułhi ró ndíjēn rō, achí yá.

Te súcuan ni sáha de. Te ni cahān tucu ndajéhé yā jífn de:

Condii ticāchi ró, te condiquñ rō ruhū na qułhín yō, achí yá.

⁹ Te ni quenda de ndíquín de ya cuahān de jíin yá, te jéni ni de jeē násūu jéndaá cúu jeē sáha ndajéhé yā jíin de, chi jéni ni de jeē ìin jeē ni stéén yā jíto ndijin de cúu. ¹⁰ Te ni yāha ya jíin de uū nuū cándito soldado. Te ni jinū yā jíin de yéhyí cáa nuū quénda de caca de calle, te yéhyí un ní nune ìi-ni máá. Te ni quenda ya jíin de, te ni yāha de ìin calle cuahān de. Yūcuán na te ni cujiyo-ni ndajéhé yā nuū de cuahān yā. ¹¹ Te ni nducájí ni Pedro te ni cahān maá ní cahān ìin de:

Vijna te ni jini ndaā rī jeē ní tají máá Jítóho rī ndajéhé yā ni quiji, te ni jnama ya ruhū nuū Herodes jíin núu tāca ñáyuu hebreo jeē cácu ni i sáha xeēn i jíin rí nuú, áchí de.

¹² Te nuū ní jini de jeē ni cácu ndije de, te ni quihin de ichi cuahān de vehe María naná Juan jeē suni nání de Marcos. Te yūcuan cáhīin tútú cuéhē ñayuu cájicān tahu i jehē Pedro. ¹³ Te cáhān Pedro ni jinū de yéhyí fuera, te ìin sūchi síhí nání Rode cuahān i jeē cúni i núu ndé ìin cúu jeē cahán. ¹⁴ Te ni nacuni i tachī Pedro, te jeē ní cusī ni i te tu ní núne i yéhyí un, chi ni nandió cóo i te jínu i ni ndívi i ini cuarto. Te ni castūhún i jeē ní quee Pedro índichi de yéhyí fuera. ¹⁵ Te ni cacahān jíin i:

Jeē cahán neé ró, achí.

Te máá i nīhin cáhān i jeē maá de cúu. Yūcuán na te ni cacahān:

Ndajéhé yā jeē ndíto Pedro cúu núu sūcuan, áchí.

¹⁶ Te víhyá gā cahán Pedro. Yūcuán na te ni canune i yéhyí, te ni canacuni i nuū de, te nahán ní canaa ni i cájito i. ¹⁷ Te máá de ni sáha de ndaha de jeē ma cúvāa gā i, te ni castūhún de ndese ni quenehen máá Jítóho yō de vecāa. Te ni cahān de:

Castūhun núu Jacobo jíin núu tāca gá hermano jeē ní quenehen ya ruhū vecāa, áchí de.

Te ni quenda de cuahān de ìnga lugar.

¹⁸ Te nuū ní cundijin, te ni cacuvaā teyí soldado jeē tuá Pedro. ¹⁹ Te ni ndacu Herodes jniñu jeē na nánducú váha i Pedro. Te tu ní cánanihīn i de, te nuū ní cuu ni stichí de soldado jijnáhan, te ni ndacu de jniñu jeē na cúu. Yūcuán na te ni quenda Herodes Judea cuahān de ñuu Cesarea, te ni condee de yūcuán.

Jeē ni jīhī Herodes

²⁰ Te yōhyo ni quitī ni rey Herodes nuū ñáyuu ñuu Tiro jíin ñuu Sidón. Te ñáyuu un ní candajnūhún i jeē inuú-ni quīvicoo ndihī i nuū rey un. Te ni casáha i amigo i jíin Blasto, tēe cújēhnu jéjníñu nuū rey un. Te ni cacahān ndahú i jíin de jeē na cáhán ndahú de jíin rey un jēe na ndēe ni de jíin i. Chi nde ñuu maá rey un cájeen i jeē cáyeji i. ²¹ Te ni jeni Herodes ĩn quivī. Te ni nucūhun de sahma yíñūhún de, te ni cucōo de mesa nuū ndácu de jniñu, te ni cahān de ĩn jnūhun jehū ni cajini sōho i. ²² Te ñáyuu un ní caquejéé i cácahān jee i jnūhun yíñūhún jíin de:

Nasūu tēe-ni cúu ní, chi ĩn yaā cúu ní, áchí i jíjnáhan i.

²³ Te máá hora un ní sáha-ni ĩn ndajéhé maá Jítóho yō jeē ní jniñ ĩn cuehyī xeēn rey Herodes, te ni cayeji tindācú de, te ni jihī de, chi ni sandúxí-ni de máá de te tu ní cáhán de jeē Yaā Dios cúu jeē cújēhnu.

²⁴ Te ni jītē gā jnūhun máá Jítóho yō, te cuehē ndasí ñáyuu ni cacandíje i tācá-ni lugar.

²⁵ Te ni jínu jniñu jeē ní quindecá Bernabé jíin Saulo jeē cótecu ñáyuu Judea. Te ni quendacoo de Jerusalén cuanungoo de Antioquía, te cándēca de Juan jeē suni nání de Marcos cuahān jíin de.

Jeē ní caquejéé Bernabé jíin Saulo caca cuu de nacani de jnūhun ya

13

¹ Te mēhñu grupo ñayuu cácandíje ini ñuu Antioquía ni cahīyo tēe cástéén jíin tēe cánacani jñūhun Yaā Dios, te cánani de Bernabé, Simón jeē suni nání de Negro, Lucio ñuu Cirene, Saulo, jíin Manaén tēe ni jehnu jíin inga Herodes jeē ní cuu gobernador Galilea. ² Te ñin quivī jeē cáhīyo ndite ni tēe yáha cáchiñúhún de nuū maá Jítóho yō, te ni cahān maá Espíritu Santo jíin de:

Cúni rī jeē sasñin ró Bernabé jíin Saulo na quíngoo de jniñu jeē ní jeni ri de, áchí yá.

³ Yūcuán na te ni cajicān tahú ndite ni de, te ni casoó de ndaha de xinī Bernabé jíin Saulo, te súcuan ni catajī de ndindúú tēe ún cuanacani de jñūhun nuū tāca ñáyuu.

Jeē ní canacani Bernabé jíin Saulo jñūhun ya nde Chipre

⁴ Te ni sáha Espíritu Santo jeē íchi ñūū Seleucia cuangoo de. Te yūcuan ní quivícoo de ñin barco cuangoo de nde Chipre, ñuhun jeē íne sñin nuū ndúte. ⁵ Te ni jinūcoo de ñuu Salamina nuū cájecuññī barco, te ni canacani de jñūhun Yaā Dios ini tācá vehe ñi sinagoga jnáhan hebreo de. Te suni cuahān Juan chindéé ñáhán jíin de. ⁶ Te ni cajica nuu de ññi-ni Chipre nde ni jinūcoo de ñuu Pafos jeē suni íne nuū Chipre. Te yūcuan ní cajini de nuū ñin tēe hebreo nání Barjesús. Te tēe tásí cúu de, te cáhán stahú de jeē ñin tēe nácani jñūhun Yaā Dios cúu de. ⁷ Te tēe tásí un jéjníñu de nuū gobernador Sergio Paulo, te tēe ndíchí cúu gobernador ún. Te ni cana de Bernabé jíin Saulo jeē cúni nahín de jñūhun Yaā Dios. ⁸ Te tēe tásí un suni nání de Elimas. Te ndúcú ndéyí de casi de jeē ma cándíje gobernador ún. ⁹ Te Saulo jeē suni nání de Pablo, ni cunuú Espíritu Santo jíin de, te ni ndacoto vāha de nuū tēe tásí un. ¹⁰ Te ni cahān de:

Tēe sáha jniñu néé stahú ñáhán cúu ró, chi sēhe jexeén cúu ró te jési rō nuū tācá jniñu ndaā. Te tu jécuiññī rō jeē

sáca núu ró síquī jnúhun ndaā maá Jítóho yō návāha ma candíje ñayuu nuū yā. ¹¹ Te máá Jítóho yō stóho ya rohó vijna, te cucuáá ró jeē ma cóto ga rō niāndii jecu quivī, achí Pablo.

Te ni cunee-ni nuū tée tásí un, te quéndāha quéhiyú de cuahān de ndúcú de ndé vé jñí ndaha de stéén ichi nuū de quinhun de. ¹² Yūcuán na te ni jini gobernador jeē súcuan ni cuu, te ni candíje de jnúhun máá Jítóho yō, te náā ni de jíní sōho de jnúhun ya.

Jeē ní coyūcu Pablo jíin Bernabé Antioquía ndañúū Pisidia

¹³ Yūcuán na te ni quendacoo Pablo jíin Bernabé jíin Juan ñuu Pafos, te ni quīvicoo de barco te cuangoo de ñuu Perge ndañúū Panfilia. Te yūcuan ní cusín Juan, te cuanuhun de ñuu Jerusalén. ¹⁴ Te ni quendacoo Pablo jíin Bernabé ñuu Perge cuangoo de, te ni jinūcoo de ñuu Antioquía ndañúū Pisidia. Te quivī ndétātu ní quīvicoo de ini vehe iī sinagoga, te ni cacucōo de. ¹⁵ Te ni cahu tutu ley yā jíin tutu ní catee tēe ni canacani jnúhun ya nde jenahán. Yūcuán na te tēe cácujuhnu ini vehe iī sinagoga, vii-ni ni catajǐ de tēe cahān jíin Pablo jíin Bernabé:

Amigo, núu íyó jnúhun cahān ni jéē stihvǐ ni ni ñáyuu yáha, te cahān ní na cúni nahín i núu súcuan, áchí de.

¹⁶ Yūcuán na te ni ndocuññī Pablo te ni sáha de seña jíin ndaha de jeē nahín-ni coo ñayuu ún, te ni cahān de:

Níhín jnáhan ñuu yō Israel jíin níhín tée jeē suni cáchiñúhún ní Yaā Dios, cuni nahín ní jijnáhan ní. ¹⁷ Máá Yáā Dios yohó ñáyuu Israel, ni nacāji ya jíí yō jijnáhan de. Te ní ní jéē cáyūcu tátú de ñuu Egipto, te ni sáha ya jeē ní nducuehē de. Yūcuán na te jíin poder máá yá ni quenehen ya de nación Egipto. ¹⁸ Te uū xico cuiyā ni cajica de nuū ñúhun téhé, te ni jendeyǐ ni yā jíin de jeē ní castívi de. ¹⁹ Te ni snáā yā uxā nación Canaán, te ni jēhe ya ñuhun

un núū tāca jíí yō cúu tahū de. ²⁰ Yūcuán na te ni jeni ya tāca téē ni candacu jniñu nuū de nájñūhun cuñn ciento uū xico uxī cuiyā, nde quivī ní cotecu Samuel, tēē ni nacani jñūhun ya. ²¹ Yūcuán na te máá ñáyyu un ní cajicān i ññ rey, te ni jeni Yaā Dios Saúl ni ndacu de jniñu nuū i uū xico cuiyā. Te yucūn Benjamín sēhe Cis ni cuu Saúl. ²² Te ni quenehen ya jniñu Saúl, te ni jeni ya David ni cuu de rey nuū i. Te ni cahān cají yá jñūhun de: Cúsñ ni rī jíín David sēhe Isaí, chí sáha de tāca jéē cuní rī, achí yá.

²³ Te cáhán gā Pablo:

Te sēhe yucūn David ni cacu Jesús, Yaā ní jeni Yaā Dios jeē jnáma ya yohó ñáyyu Israel, chí súcuan ni jeññūhun ya. ²⁴ Te nde ná tu quejéé Jesús nacani ya jñūhun nuū ñáyyu, te ni nacani Juan jñūhun nuū tāca jnáhan ñuu yō Israel jeē na nácani ni i jeē stóo i cuēchi i, te cuandute i. ²⁵ Te nuū cuácuyajni jeē cúū Juan, te ni cahān de: Cándētu ró jéē quíji Cristo, te jéni ni rō jeē ruhū cúu, te nasūu rí cúu. Chí quiji ya, te cújéhnu ndasí yá jeē ni ndijēn yā tu cújéhnu ri tava rī, achí de.

²⁶ 'Amigo jijnáhan ní, tāca níhín jéē cácuu yó séhe yucūn Abraham jíín táca níhín jéē suni cándiso iyo ní núū Yaā Dios, chí cúní Yaā Dios jeē na cúní yō jñūhun yáha jeē cáhán ndese jnáma ya yohó. ²⁷ Chí tāca ñáyyu ñuu Jerusalén jíín táca téē cácujuhnu nuū i, tu ní cájecūhun ni i jeē Jesús cúu Cristo, Yaā ní jeni Yaā Dios jeē jnáma ya yohó. Te ndijnahan quivī ndétātu ní cajini sōho i jñūhun ni cacahu jeē ní cateē tēē ni canacani jñūhun Yaā Dios nde jenahán. Te vēsú súcuan te tu ní cájecūhun ni i, te ni candonda i ni cacahān i jeē na cúū yā. Te súcuan ni casquícu i siquī tāca jñūhun jeē ní cacahān tēē ni canacani jñūhun ya nde jenahán. ²⁸ Vēsú tu ní cánihín i ni ññ cuēchi siquī yā jeē cúū yā, te ni cacahān níhín i jíín Pilato jeē na cúū yā. ²⁹ Te ná ni jīnu ni squícu siquī yā tāca

jnúhun cáhán nuū tútu iī, te ni casnúu de ya jicā cruz, te ni cachindūji de ya iin yaū ní jete jicā cáva. ³⁰ Te ni sáha Yaā Dios jeē ní natecu yā. ³¹ Te ñayuu Galilea jeē ni jéngoo jíín yá nde Jerusalén nde na técu yā, nuū maá i ni steén ndijin yā maá yá cuehē quivī ná ni natecu yā, te ñayuu un cácuu jeē cánacani cájí jnúhun ya nuū táca gá jnáhan yó hebreo vijna.

³² Te máá ná jijnáhan ná cánacani ná jnúhun vāha yáha núū ni jíjnáhan ní jéē súcuan ni jejnūhun ya nuū tāca jíí yō. ³³ Te jnúhun yáha ní squícu Yaā Dios nuū maá yó jeē cácuu yó séhe yucūn de, chí ni nastécu yā Jesús. Chi suhva cáhán salmo uū jeē cahán yā jíín Séhe ya Jesús: Máá ró cúu Séhe ri, te vijna ni sajhénu ri rohó jéē cúu ri Tatá rō, achí yá. ³⁴ Te ni nastécu yā Séhe ya Jesús návāha ma tehyú cuítī yā, chí suhva cáhán tutu iī jeē ni cáhān Yaā Dios nde jenahán: Te nihīn maá ró tāca jéē váha ni jejnūhun ri nuū David, áchí. ³⁵ Te suni súcuan cáhán inga salmo jeē ní tee David jnúhun jeē cahán Jesús jíín Yáā Dios: Ma cuáha ni jnúhun tehyū ná, chí jéjníñu ná núū ní te manī ni jíín ná, achí. ³⁶ Te David chí jíín yō jeē ní jejníñu de nuū ñáyuu ní cotecu de jíín, nájnūhun ni cuni Yaā Dios. Te ni jihī de, te ni quindūji de nájnūhun ni quindūji tāca jíí yō, te ni tehyū de. ³⁷ Te Jesús, Yaā ní nastécu Yaā Dios, chí tu ní téhyú cuítī yā. ³⁸ Jeē yúcuan jííní ñúhún jecūhun ni ní, amigo, jeē Jesús cúu Yaā cóne cáhnu ni nuū tāca cuéchi yó. ³⁹ Chí ni canducú ní ndahva ni cuéchi ní jéē squícu ní ley jeē ni jéhe ya nuū Moisés, te tu ní cúu ndahvā cuéchi ní súcuan. Te Jesús cúu Yaā ndáhva ndíhi cuéchi ñayuu jeē cácanđje i tāca jéē ni sáha ya jehē i. ⁴⁰ Núu súcuan te coto ní jíjnáhan ní jéē ma ndóho ní táca castigo jeē ní cacahān tēe ni canacani jnúhun Yaā Dios nde jenahán, chí suhva ni cahān Yaā Dios:

⁴¹ Tāca rōhó ñáyuu jeē casácatā, na cóto ró na castigo xeēn

quiji siquī rō,
 te naa ni rō coto ró, te cuu rō.
 Chi tiempo maá ró te sáha ri jniñu xeēn
 jeē ma cándíje cuiti rō jeē súcuan sáha ri vēsú nacani
 ñayuu jnūhun un núū rō, achí yá.

Achí Pablo.

⁴² Te ni quendacoo Pablo jíin táca jnáhan de vehe iī sinagoga jnáhan hebreo de. Te ñayuu sñn nación ni cacahān ndahú i jíin de jeē inga quivī ndétátú nacani tucu de jnūhun yáha núū i. ⁴³ Te ni jitē ñayuu un cuángoo i. Te cuehē ñayuu hebreo jíin ñáyuu sñn nación jeē ní cacandíje sahān hebreo te cáchiñúhún i nuū Yaā Dios, cuángoo i jíin Pablo jíin Bernabé. Te ni cacahān nīhin de jíin i jeē na cuñi nīhin i jíin jnúhun jeē maní Yaā Dios jíin i.

⁴⁴ Te quivī ndétátú inga semana te je yajni ndihi ñayuu ñuu un ní candutútú i jeē cúni nahín i jnūhun Yaā Dios.

⁴⁵ Te nuū ní cajini tēe hebreo jeē ní candutútú cuehē ñayuu, te ni cacucuésún ni de, te ni cacahān de jeē násūu jnúhun vāha cúu jeē steén Pablo, te ni cacahān neé de nuū Pablo. ⁴⁶ Yūcuán na te jéhnū-ni ni cacahān Pablo jíin Bernabé, achí de:

Cánuú jéē xíhna gā nuū maá ní jeē cácuu ní jnáhan ñuu yō hebreo nacani ná jnúhun Yaā Dios, te tu ní cájetáhú ní. Núu súcuan te cuēchi máá ní cúu jeē ma nihín tahu ni cotecu ni nñ cáni. Te vijna te quinacani ná jnúhun ya nuū ñáyuu tācá nación jeē tu cájini i jnūhun ya. ⁴⁷ Chi suhva ni ndacu máá Jítóho yō jniñu nuū na jíjnáhan ná:

Ni jeni ri rohó jéē cúu ró nájnūhun luz jeē steén ini anuá
 ñayuu tācá nación,

chi nñ ñayivī stéén rō jnūhun ri nuū ñáyuu jeē jnáma ri i,
 achí yá.

Achí de.

⁴⁸ Te ñayuu sñn nación, nuū ní cajini sōho i jnūhun yáha te ni cacusñ teyí ni i. Te ni cacahān i jeē yōhyo vāha jnūhun cúu jnūhun máá Jítóho yō, te tāca ñáyuu jeē ní nacāji Yaā Dios i jeē cótecu i nñí cáni, ni cacandíje i. ⁴⁹ Te ni jitē jnūhun máá Jítóho yō cuahān nñí región yūcuán. ⁵⁰ Te ñuu Antioquía cáyūcú ñahan cácuu nuū te cáchiñúhún ña Yaā Dios. Te tēe hebreo ni cascáhán de ña, te suni ni cascáhán de tēe cácujuhnu ñuu ún, te ni cajito xeēn i Pablo jíin Bernabé te nde ni cascúnu i de cuango de. ⁵¹ Te ni cascóyo de ticachā jehē de jeē steén de jeē iyó cuéchi i. Te ni jinūcoo de ñuu Iconio. ⁵² Te vēsú súcuan te ñayuu cácuandíje un ní cunuú Espíritu Santo jíin i, te cácusñ teyí ni i.

Jeē ní coyūcu Pablo jíin Bernabé ñuu Iconio

14

¹ Te ñuu Iconio ni quñvicoo Pablo jíin Bernabé ini vehe i sinagoga jnáhan de hebreo. Te jíin jnúhun jeē ní canacani de te ni cacandíje cuehē jnáhan de hebreo, te suni súcuan cuehē ñayuu sñn nación ni cacandíje i. ² Te jnáhan de hebreo jeē tu ní cácuandíje, ni cascáhán de ñayuu sñn nación, te ni cajeni ni i jeē násūu ñáyuu váha cácuu ñayuu cácuandíje. ³ Te ni caquendō Pablo jíin Bernabé yūcuan cuéhē gā quivī. Te jénu-ni ni canacani de jnūhun Jítóho yō, chi cácuáhnu ni de ya jeē váha quihñ jniñu un sáha ya. Te máá yá chi ni steén yā jeē iyó ndáa jnūhun jeē yóhyo vāha ni yā jíin i jeē cánacani de, chi ni jēhe ya jeē sáha de jniñu jénu jeē steén jeē cujénu ya. ⁴ Te ñayuu ñuu un ní cacusñn ni i jíjnáhan i, sava i jíin tēe hebreo jeē tu cácuandíje de Jesús, te sava ga i jíin tēe apóstol. ⁵ Te ñayuu hebreo jíin ñáyuu sñn nación jíin tēe cácuu tohō ni casquíjnáhan jnūhun jeē sáha xeēn jíin Pablo jíin Bernabé, jíin jēe cuáha yuū xinī de núú. ⁶ Te ni cajini de jeē súcuan

cácuni sáha, te ni cajinu de cuangoo de nde ñuu Litra jíin ñuu Derbe ndañúú Licaonia jíin táca ñuu yajni yūcuán.
 7 Te yūcuan ní canacani de jnūhun jeē jnáma ya yohó.

Jeē ní cajēhe i yuū xinī Pablo ini ñuu Litra

8 Te ñuu Litra néne ìin tēe jeē tu cúu caca, te tu jíca cuiti de chi nde quiv̄ ní cacu de cácójó de. 9 Tēe un ní jini sōho de jnūhun jeē cahán Pablo, te ni jito vāha Pablo nuū de, te ni jini de jeē candíje vāha tēe un jēe ndúvāha de.

10 Te ni cahān jee Pablo jíin de:

Ndocuiñī, condichi rō, achí de.

Te ni scánda tēe un máá de ni nucōndichi-ni de, te ni quejéé de caca de. 11 Te ni cajini ñayuu ún jniñu jéhnū jeē ni sáha Pablo, te ni cacahān jee i jíin yuhu máá i jeē cúu yuhu Licaonia:

Ni cuun yaā ni quecoo nuū yō, te cájica nájñūhun cájica tēe, áchí i.

12 Te ni cacahān i jeē Bernabé cúu yaā Júpiter, te Pablo cúu yaā Mercurio chi Pablo cúu tēe nácani jnūhun. 13 Te yajni yuñúú un néne veñūhun yaā Júpiter. Te máá sūtū jejníñu ini veñūhun un ní quihin de stiḡuḡ jijnáhan ti te ni scutú de ti ita te vēji de nde nuū quiv̄ i yuñúú, te máá de jíin ñáyuu ñuu un CÁCUNI de cahni de stiḡuḡ un sócō de nuū Bernabé jíin Pablo nuú. 14 Te Bernabé jíin Pablo, tēe cácuu apóstol, ni cajito de jeē súcuan CÁCUNI ñayuu un sáha i, te ni candatá de sahma de jeē steén de jeē castiv̄i ndasí i jeē casáha i súcuan. Te ni quenendava de ni quiv̄icoo de mēñu ñáyuu cuehē ún, te ni cacana jee de:

15 Tātā jijnáhan ní, ma sáha cuiti ni súcuan, chi sãñá suni tēe-ni cácuu ná nájñūhun máá ní jijnáhan ní. Te vējicoo ná nacani ná jnūhun vāha Yaā Dios nuū ní, chi cahān na jíin ní jeē ma sáha ga ni táca jniñu yáha jēe tu ndé jéjníñu cuiti, chi sa suhva na chíñúhún ní máá Yáá Dios, Yaā técu, Yaā ni sáha andiv̄i jíin ñáyiv̄i jíin ndute mar

jiín táca gá jeē iyó ní cáhnu. ¹⁶ Te nde jenahán ní jēhe ya jñūhun jeē na sáha tāca ñáyuu modo cácu ni maá i. ¹⁷ Te vēsú súcuan te níní stéén yā ndese Yaā cúu ya, chi máni sáha ya jniñu váha jíin yó, chi scúun ya saū, te sáha ya jeē cúu vāha itu yō, te jēhe ya jeē jíni ñúhún yó návāha caji yō te coo siī ni yō, achí ndindúú de.

¹⁸ Te vēsú súcuan ni cacahān de, te yōhyo uhū ni cajesi de nuū ñáyuu un návāha tú socō i stiquī un núú de jeē chiñúhún i ndindúú de.

¹⁹ Yūcuán na te ni quecoo jecu tēe hebreo ñuu Antioquía jíin ñuu Iconio, te ni cascáhán de ñayuu cuehē ún, te ni cajēhe i yuū xinī Pablo. Te ni caquenehen i de yatā ñúú ún, chi ni cajeni ni i jeē jé ni jihī de. ²⁰ Te tēe cá candíje ni cacondúú de Pablo, te ni ndonda Pablo, te ni ndīvi de ini ñuu. Te inga quiṽi ni quihin de ichi cuahān de jíin Bernabé nde ñuu Derbe.

²¹ Te ini ñuu un ní canacani de jñūhun jeē jnáma ya ñayuu, te ni cacandíje cuehē ñayuu ni casáha de. Te ni canandicó de cuanuhun de ñuu Listra jíin ñuu Iconio jíin ñuu Antioquía. ²² Te ni cahije ga ni ñayuu cá candíje yūcuán ní casáha de. Te ni castíhvī ni de i jeē na cuñi nihin i jíin jnúhun ya, chi ni cacahān de jeē niní quiji cuehē jñūndóho siquī yō te yūcuán na te jinū yō ñuu nuū ndácu Yaā Dios jniñu. ²³ Te tācá ñuu ni cajeni de tēe jéhnu cándiso jniñu condito de ñayuu cá candíje. Te ni cahiyó ndite ni Pablo jíin Bernabé nuū yā, te ni cajicān tahu de, te ni cacahān de jíin máá Jítóho yō jeē na cóto ya ñayuu ún chi cá candíje i máá yá.

Jeē cuánuhun tucu Pablo jíin Bernabé ñuu Antioquía ndañúú Siria

²⁴ Te ni cayāha de cuango de región Pisidia, te ni najinūcoo de región Panfilia. ²⁵ Te ni canacani de jñūhun ya ini ñuu Perge región Panfilia, te sáa te cuango de ñuu

Atalia. ²⁶ Te yūcuan ní quīvīcoo de barco, te ni najinūcoo de ñuu Antioquía. Te ñuu yūcuan cúu nuū ní cajicān tahuñayuu nuū Yaā Dios jehē de jeē na chíndéé ñáhán yá de jeē quíngoo de nacani de jnūhun. Te ni jīnu jniñu, te ni najinūcoo de ñuu ún. ²⁷ Te nuū ní najinūcoo de yūcuán, te ni casáha de junta jíin ñáyuu cácandíje, te ni canacani de jnūhun tācá ndese cuehē jeē váha ni sáha Yaā Dios jíin de, chi ni jēhe ya jnūhun jeē suni candíje ñayuu tācá nación jeē tu ní cájini i jnūhun ya. ²⁸ Te ni caquendōo de yūcuan cuehē quivī jíin ñáyuu cácandíje.

Siquī junta ñuu Jerusalén

15

¹ Yūcuán na te jecu tēe Judea ni quijicoo de ñuu Antioquía, te ni castéén de nuū tācá hermano jeē núu tu sáha i circuncidar, nájñūhun cáhán ley jeē ni jēhe ya nuū Moisés, te tú na modo cācu i. ² Te Pablo jíin Bernabé ni catejnáhan de jíin tēe ún, te tu ní cūndaā. Te jeē yūcuan ní candajnūhún de jeē quíngoo Pablo jíin Bernabé jíin jecu gā tēe cácandíje un ndé ñuu Jerusalén, te yūcuán ndajnūhún de siquī jnúhun yáha jíin tēe cácuu apóstol jíin tēe jéhnu cándiso jníñu nuū ñáyuu cácandíje yūcuán.

³ Te ñayuu cácandíje un ní canachuhun íchí i de. Te ni cayāha de ichi Fenicia jíin Samaria, te cánacani de jnūhun jeē suni ñayuu tāca gá nación jeē tu ní cájini i jnūhun ya, ni castóo i jniñu jeē tu íyó ndáā te ni cacandíje i Yaā Dios. Te yōhyo ni cacusī ni tācá hermano jeē ní canihīn de jnūhun jeē súcuan ni cacandíje ñayuu ún.

⁴ Te ni najinūcoo de ñuu Jerusalén, te ñayuu cácandíje yūcuan jíin tēe apóstol jíin tēe jéhnu cándiso jníñu nuū ñáyuu un, ní cacusī ni de jeē ní najinūcoo jnáhan de ún. Te Pablo jíin Bernabé ni canacani de tāca jnúhun ndese cuehē jeē váha ni sáha ya siquī jníñu jeē ní canacani de

jnūhun ya. ⁵ Te sava tēe grupo fariseo jeē cācandíje ni candocuiñī te ni cacahān:

Ñayuu sīn nación jeē cācandíje i Jesús, jíni ñúhún jēē sáha i circuncidar nájñūhun cásáha máá yó, te cánuú ndacu yó jniñu nuū i jeē na squícu i ley jeē ni jēhe ya nuū Moisés, áchí.

⁶ Te tāca tēe apóstol jíin táca tēe jéhnu cándiso jniñu nuū ñáyuu cācandíje, ni candutútú de junta návāha nda-jñūhún de te sándaā de síquī jñūhun yáha. ⁷ Te tācá de ni cacahān de ndese cájeni ni de. Yūcuán na te ni ndocuiñī Pedro, te ni cahān de:

Hermano jijnáhan ní, je cájini vāha ni jēē je íyó tiempo jeē ní nacāji Yaā Dios sāña jēē quihín na núū ñáyuu sīn nación te nacani ná jñūhun nuū i jeē jnáma ya i, návāha candíje i Jesucristo. ⁸ Te Yaā Dios chi jíni yā ndese cáa ánuá ndíhi ñayuu, te ni steén yā jeē jetáhu yá i, chi suni ni jēhe ya Espíritu Santo nuū i jíjnáhan i, nájñūhun ni jēhe ya nuū máá yó. ⁹ Te ínuú-ni sáha ya jíin yó jíin máá i, chi síquī jeē suni ni cacandíje i jñūhun jeē jnáma ya i, te jeē yúcuán ní sándoo ya anuá i nuū tāca cuéchi i. ¹⁰ Te vijna ¿naun cácuni ní ndacu ní jniñu jeē na squícu i ley un? Chi tu nújnahan ni Yaā Dios jeē súcuán. Chi cácuni ní tee ní jniñu yí yáha síquī ñáyuu cācandíje ún, te ni tāca jíi yō tu ní cácundeyí de squícu de, te ni máá yó. ¹¹ Chi sa suhva cācandíje yó jēē jnáma ya yohó súcuán-ni síquī jeē yóhyo vāha ni máá Jítoho yō Jesús jíin yó, te suni súcuán-ni jnáma ya máá i, nasūu síquī jeē squícu i ley un, áchí de.

¹² Yūcuán na te tēe cuehē un ní cacuu nayúú de, te ni cajini nahín de jñūhun cacahān Bernabé jíin Pablo. Chi ni cacastūhún de jeē ni jēhe ya poder jeē ní casáha de tācá jniñu jéhnu jeē steén jeē kujéhnu ya, ni cajito ñayuu

tācá nación jeē tu cájini i jnūhun ya. ¹³ Te nuū ni jínu ni cacahān Pablo jíin Bernabé, te ni cahān Jacobo:

Hermano jijnáhan ní, cuni sōho ní na cáhán na. ¹⁴ Ni nacani Simón Pedro jnūhun ndese ni quejéé nuú jniñu jeē jnáma Yaā Dios ñayuu tācá nación jeē tu cájini i jnūhun ya, chi suni mēhñu máá i nácāji ya ñayuu jeē ndúu i ñayuu máá yá. ¹⁵ Te quíjnáhan jnūhun ni cahān de yāha jíin jnúhun ni catee tēe ni canacani jnūhun Yaā Dios nde jenahán jeē yosó núu tútu i:

¹⁶ Achí Yáa Dios:

Nájñūhun ni cotúu vehe David cúu jeē tuá ndácu sēhe yucūn de jniñu,

nájñūhun ni ndacu máá de jniñu nde jenahán.

Te ñin quivī te ndee rī

te jeē nasáha ri vehe de cúu jeē sáha ri jeē nandacu Sēhe yucūn de jniñu.

¹⁷ Súcuán sáha ri návāha tāca gá ñayuu na nánducú i ruhū nde jíin ñáyuu tācá nación jeē tu cájini jnūhun ri, tācá i jeē cána ri i candíje i ruhū.

¹⁸ Súcuán cáhán máá Jítóho yō, te nde jenahán ní steén yā jnūhun yáha núu ñáyuu.

Achí tutu i.

¹⁹ Jeē yúcuán jéni ni na jéē ñáyuu tāca gá nación jeē ní castóo i jniñu jeē tu íyó ndáa te ni cacandíje i máá Yáa Dios, ma stáhān yō i jeē ndácu yó jniñu jeē squícu i ley Moisés. ²⁰ Chi sa suhva na tée yó carta quihīn nuū i jeē ma cāji i ndeyu jeē ni sócō nuū ídolo, te ma cáca jnéni í, te ma cāji i cūñu quitī jeē jihí jeē tu jéti niñī tī, te ni ma cāji i niñī. ²¹ Jnūhun yáha-ni tee yó quihīn nuū i nájñūhun je cástéén nde jenahán. Chi nde jenahán je íyó tée cástéén jnūhun ley jeē ni jéhe ya nuū Moisés, te ndijnahan quivī ndétātu cácahu de ley un ini vehe i sinagoga tācá ñuu, achí Jacobo.

²² Yūcuán na te tēe apóstol, jíin tée jéhnū cándiso jníñu, jíin ndivii ñayuu cácanđíje, ni cacundaā ni de jeē nácāji de tēe quingoo jíin Pablo jíin Bernabé nde ñuu Antioquía. Te tēe ni canacāji de un cácuu Silas jíin Judas, te inga sihví de cúu Barsabás. Te cándiso jníñu de nuū tācá hermano cácanđíje. ²³ Te ni cajendēca de carta jeē cahán suhva:

Máa ná cácuu tēe apóstol, jíin táca tée jéhnū cándiso jníñu nuū ñáyuu cácanđíje, jíin táca gá hermano yō. Te cátee ná carta yáha cuájeē nuū ni jíjnáhan ní, hermano, jeē cácuu ní ñáyuu sín nación jeē cáyūcu ní ñuu Antioquía jíin Siria jíin Cilicia. Cuandeyí ni ni jíjnáhan ní. ²⁴ Ni cajini jnūhun ná jéē ní quendacoo sava jnáhan ná yáha ní jengoo nuū ní, te jíin jnūhun jeē ní cacahān de te ni casáha jeē ní canacani ndasí ni ní, te ni cacuxíí ni ní, chi cándacu de jníñu jeē sáha ní circuncidar jíin jéē squícu ní jníñu cáhán ley jenahán jéē ni jéhe ya nuū Moisés. Te nasūu sáña ní cátají tēe un jéē jeé de nuū ní. ²⁵ Jeē yúcuán ní cajeni ni ná, te inuú-ni ni cacundaā ni ná, te ni nacāji ná tēe cuajēcoo nuū ni jíin úū hermano yō jeē maní yō jíin, cúu Bernabé jíin Pablo. ²⁶ Te ndíndúú de je ni catana de máa de nuū jnúndóho vēsú na cúu de jeē siquí jnūhun Jitoho yō Jesucristo. ²⁷ Núu súcuán te cátají ná Judas jíin Silas jeē nuū ní, te suni nájnūhun cáhán carta yáha suni súcuán castūhún de nuū ni jíjnáhan ní. ²⁸ Chi máa Espíritu Santo ni steén yā ĩn modo jeē ní cacundaā ni na jéē ma tēe ná táca jníñu yí ley Moisés siquí ní, chi máa-ni jníñu yáha jéē cánúú gá: ²⁹ Ma cáji ni táca jéē ní casocō nuū ídolo, ni ma cáji ni níñi ni quití jeē jihí jeē tu jéti níñi tī, te ma cáca jnéni ní. Te vāha squícu ní núu tuá sáha ní táca jéē yáha. Súcuán na cóo te sándeýí ni ní, áchí carta.

³⁰ Yūcuán na te tēe quingoo un cuángoo de nde ñuu Antioquía. Te ni cacana de xinī ñáyuu cácanđíje ni candutútú de junta, te ni cajēhe de carta un núu i. ³¹ Te

ni cacahu i, te ni candusiñ ni i jeē ni níhīn i jñūhun ndeyí ni nuū carta ún. ³² Te suni tēe cánacani jñūhun Yaā Dios cácuu Judas jíin Silas, te jíin cuéhē jñūhun ni cacahān de te ni candundeyí ni tācá hermano un, te ni cahije ga ni i jíin jñūhun ya. ³³ Te ni coyūcú de yūcuán jecu quivī. Yūcuán na te hermano yūcuán ní canacuatáhú i nuū de jeē quinhun de nuū tēe jeē ní catají de. ³⁴ Te Silas ni nujnahan ni de ni quendōo de yūcuán. ³⁵ Te suni ni caquendōo Pablo jíin Bernabé ñuu Antioquía, te máá de jíin sava ga tēe ni castéén de te ni canacani de jñūhun vāha máá Jítóho yō.

Jeē quihín Pablo inga jíinu nacani de jñūhun ya

³⁶ Te ni cuu ga quivī, te ni cahān Pablo jíin Bernabé:

Vijna te na quícondēhe yó tācá hermano yō ndijnahan ñuu nuū ní nacani yó jñūhun máá Jítóho yō, na cóndēhe yó ndese cáhīyo i, áchí de.

³⁷ Te Juan jeē suni nání de Marcos, cúní Bernabé jeē quihín tēe un jíin de. ³⁸ Te tu ní cúní Pablo jeē quihín tēe un jíin de, chi nde Panfilia ni cusín Marcos nuū Pablo jíin Bernabé, chi tuá ni chindéé ñáhán de ndindúú tēe un síquī jñíñu ya nde saá. ³⁹ Te nahán ní candajnūhun Pablo jíin Bernabé, te tu ní cácondaā ni de síquī Marcos, te ni cacusín de. Te Bernabé ni jeca de Marcos, te ni quivícoo de barco cuango de nde Chipre, ñuhun jeē íne sīn nuū ndúte. ⁴⁰ Te Pablo ni nacāji de Silas quihín jíin de. Te tācá hermano cácandíje ni cajicān tahu de nuū maá Jítóho yō jeē síquī jeē váha ni yā te na chindéé ñáhán yá Pablo. Te cuahān Silas jíin Pablo. ⁴¹ Te ni cajica cuu de ní Siria jíin Cilicia. Te tāca grupo ñayuu cácandíje ni cahije ga ni i jíin jñūhun ya ni casáha de.

Jeē cuahán Timoteo jíin Pablo jíin Silas

16

¹ Yūcuán na te sáá te ni jinū Pablo jíin Silas ñuu Derbe jíin ñuu Listra. Te yūcuan néne ñin tēe suchí cándíje, nání i Timoteo. Sēhe yí ñin ñahan hebrea cúu i, te ñahan cándíje cúu ña. Te tátá i chi tēe griego cúu de. ² Te tãcá hermano ñuu Listra jíin ñuu Iconio cájejnúhún de Timoteo. ³ Te cúní Pablo condeca de Timoteo quihín de jíin i. Te ni cahān Pablo jeē quihín i cuu i circuncidar, chi tu cúní Pablo jeē cahān ñayuu hebreo jeē tu ní squícu Timoteo costumbre un, chi ndíhi ñayuu cájini i jeē tēe griego cúu tátá i. ⁴ Te tãcá ñuu nuū cuángoo de te ni cacastūhún de nuū ñáyuu cácandíje jeē na squícu i máá jniñu jeē ní casándaā tēe apóstol jíin táca tēe jéhnú cáyūcú ñuu Jerusalén jeē cándiso jniñu nuū ñáyuu cácandíje. ⁵ Te ñayuu cácandíje ni cahije ga ni i. Te ndijnahan quivī ni cacandíje cuehē gā ñayuu.

Jeē ní jito ndijin Pablo ñin tēe ñuu Macedonia

⁶ Te tu ní jéhe Espíritu Santo yā jnūhun jeē nácani de jnūhun ya níí Asia. Jeē yūcuan ní cayāha de ichi Frigia jíin Galacia cuangoo de. ⁷ Te ni jinūcoo de nuū quijnáhan Misia jíin Bitinia. Te cácani de quingoo de Bitinia, te máá Espíritu Jesús tu ní jéhe ya jnūhun quingoo de. ⁸ Te ni cayāha de ñin lado Misia cuangoo de ñuu Troas jeē íne yajni yumar. ⁹ Te ñin jecuāā te nájnūhun ñin jēni ni jito ndijin Pablo, te ni jito de jeē índichi ñin tēe ñuu Macedonia nuū de cáhán ndahú jíin de: Nehen ní ñuu ná Macedonia te chindéé ñáhán ní sãña jíjnáhan ná, áchí. ¹⁰ Te súcuan ni jito ndijin de. Yūcuán na te sãña, Lucas, ni quijnáhan ná jíin de. Te ni casátūhva ná jíin de jíjnáhan de jeē quíngoo ná Macedonia, chi ni cajini cají ná jeē maá Yáā Dios táj yá sãña jíjnáhan ná jéē castūhun ná nuū ñáyuu yūcuan jnūhun jnama ya i.

Jeē ní coyūcu Pablo jíin Silas ñuu Filipos

¹¹ Te jíin barco ni quendacoo ná ñuu Troas, te cuango ndaā-ni ná ndé Samotracia, ñuhun jeē íne sín nuū ndúte. Te inga quivī ni jinūcoo ná ñuu Neápolis. ¹² Te yūcuan ní quendacoo ná, te ni jinūcoo ná ñuu Filipos jeē cúu ñuu kujéhnú ga íne Macedonia, chi máá ñáyuu ñuu Roma ni casáha i ñuu i ún. Te ni coyūcu ná ñuu Filipos jecu quivī. ¹³ Te ñin quivī ndétātu ní quendacoo ná ñuu ún, te ni jengoo ná ñin yuyúte, chi yūcuan cúu ñin lugar nuū cájicān tahu ñayuu. Te ni cacucōo ná, te ni canacani ná jnúhun ya nuū tācá ñahan ní canataca yūcuán. ¹⁴ Te ñin ña nání Lidia jeē véji ña ñuu Tiatira, xíco ña sahma ndihí jéē yáhu ga ndeé. Te máá ña níní chíñúhún ña Yaā Dios. Te ni jini sōho ña jnúhun canacani ná, te máá Jítóho yō Jesús ní sáha ya jeē ní candíje ña jnúhun jnáma ya ña jeē ní cáhān Pablo. ¹⁵ Te ni jendute ña nde jíin ñáyuu cáyūcú vehe ña, te ni cahān ndahú ña jíin ná:

Núu cácuáhnu ni ni jéē candíje ndije ná máá Jítóho yō, te cuajeē ní coyūcu ní vehe ná, áchí ña.

Te ni cana fuerza ña sãña jíjnáhan ná.

¹⁶ Te ñin quivī te cuango tucu ná suu lugar nuū jéngoo ñayuu cájicān tahu. Te ni canajnáhan ná jíin ñin sūchi síhí jéē ñúhun tachī ini i, te máá un sáha jeē cahán i tācá ndese coo te cúndaā jeē cahán i. Te sūchí un ní cajeen patrón i, návāha nihīn de cuehē xūhun síquī jeē cástūhún i nuū ñin ñin ñayuu ndese coo ichi núú. ¹⁷ Te sūchí un ndíquín i sãña jíjnáhan ná cána jee i:

Tēe yáha cájejníñu de nuū Yaā Dios, Yaā kujéhnú téyí, te cácastūhún de ndese cācu ní núú cuéchi ní jíjnáhan ní, áchí i.

¹⁸ Te cuehē quivī ni cuu súcuan te nde ni jnaniní ni Pablo. Te ni ndió cóto de nuū i, te ni cahān de jíin táchí ún:

Jín poder maá Jesucristo ndácu ri jniñu nuū rō jeē na quénda ró ini i quihñ rō, achí de.

Te hora un ní quenda-ni cuahān.

¹⁹ Yūcuán na te ni cajini patrón i jeē ma níhín gā i xūhún cuu de, te jeē yúcuan ní cajniñ de Pablo jín Silas cuangoo jín de nde vehe juzgado nuū cáyūcu tóhō. ²⁰ Te ni cajeni ún de nuū juez, tēe cásándaā jniñu, te ni cacahān:

Tēe hebreo cácuu tēe yáha, te cástóna de ñayuu ñuu yō cúvaā i. ²¹ Te cájequin de inga costumbre jeē ma cúu cuatáhu cuiti yō, ni ma cúu sáha yó, chi tu jéhe ley nación yō jñūhun, chi ñayuu nación Roma cácuu yó, áchí.

²² Te suni ni candonda ñayuu siquī Pablo jín Silas. Te tēe cácuu juez ni candacu de jniñu jeē na quénda sahma ndíndúú de te cani yujnu siquī de. ²³ Te nuū ni jínu ni cacani téyí un de, te ni casquíví de vecāa. Te ni candacu jniñu nuū tēe ndíto vecāa jeē na cóndito ndasí de jeē ma cácu ndíndúú tēe ún. ²⁴ Te jeē súcuan ni tahū jniñu nuū tēe ndíto vecāa te ni squíví de Pablo jín Silas nde ichi íni gā, te ni squíví jehē de tīsín yujnu ndéé yaū te ni cajihni de.

²⁵ Te nuū ní cuu sava ñuú, te cájicān tahu Pablo jín Silas, te cájita de yaa íi nuū maá Yáa Dios. Te ñayuu cáhīn jín de vecāa un ní cajini nahín i. ²⁶ Te sanaa-ni te ni jñāa níhín téyí, te nde nuū cimientto vecāa un ní canda. Te ni canune-ni yéhyí vecāa ún, te ni canandajī-ni cadena jeē cánuhni tāca ñayuu ún. ²⁷ Te ni natahū ni tēe ndíto vecāa, te ni jito de jeē núne yéhyí vecāa ún. Te ni tava de espada jeē cáhni de máá de núú, chi ni jeni ni de jeē ndívii cuiti ñayuu cáhīn vecāa un cuángoo i. ²⁸ Te ni cana jee Pablo:

Ma cáhni ni máá ní, chi cáhīn ndihí ná, áchí de.

²⁹ Yūcuán na te máá tēe ndíto vecāa ni cana de jeē na quíndeca i ñuhūn, te yachí ni quíví de ini vecāa. Te ni jecuiñí yití de nuū Pablo jín Silas, te quísi i de jeē yūhú

de. ³⁰ Te ni quenehen de Pablo jíin Silas, te ni cajnuhún de:

Tátā, ¿na vé cánuú sáha ná te jnama ya sãñá? áchí de.

³¹ Te ni cacahān de jíin tée ún:

Candíje ní táca jéē ni sáha Jítoho yō Jesucristo jehē ní te cācu ní, te suni súcuan cācu ndihí ñayuu cáyucú vehe ní, áchí de.

³² Te ni canacani de jnūhun máá Jítoho yō nuū tée un jíin núu táca ñayuu cáyucú vehe de. ³³ Te suu máá jecuáā yúcuan ní nacate tēe ndíto vecāa un núu ní catují Pablo jíin Silas jeē ní cacani yujnu siquī de. Yūcuán na te ni jendute de jíin ndihí ñayuu cáyucú vehe de. ³⁴ Te ni jeca de Pablo jíin Silas cuahān de jíin vehe de, te ni jēhe de staā ni cayejí de, te cácusī ni ndihí de vehe de jeē ní cacandíje de Yaā Dios.

³⁵ Te nuū ní cundijin, te tēe cácuu juez ni catajé de policía cuangoó jíin jnúhun jeē na siáá tēe ndíto vecāa un Pablo jíin Silas quingoo de. ³⁶ Te tēe ndíto vecāa un ní castūhún de jnūhun yáha núu Pablo:

Tēe cácuu juez ni catajé de jnūhun vēji jeē na siáá na níhín quingoo ní. Núu súcuan te quendacoo ní quíhín ní, te cuandeyí ni ní, áchí de.

³⁷ Te ni cahān Pablo jíin policía:

Cuehē ñayuu ni cajito i jeē ní cacani de sãñá, te ni tu ní casándaā de xīhna gā núu ndaā jeē iyó cuéchi ná. Te ni cachuhun de sãñá vecāa, vēsú cácuu ná séhe nación Roma, te íyó ley jeē ma cúu sáha súcuan jíin ñayuu cácuu sēhe nación Roma. Te vijna ¿á quenehen sãhí de sãña cácuni de naún? Ma cúu cuiṭi. Na quícoo máá de quenehen de sãña jíjñáhan ná, áchí Pablo.

³⁸ Te ni canandió cóo policía ni castūhún de jnūhun yáha núu tée cácuu juez, te ni cayūhú de jeē ní cajini sōho de jnūhun jeē séhe nación Roma cácuu Pablo jíin Silas.

³⁹ Te ni quecoo tēe cácuu juez ún, te yōhyo ni cacahān ndahú jíin Pablo jíin Silas jeē na cóne cáhnu ni de. Te ni caquenehen de vecāa ún, te ni cacahān ndahú jíin de jeē na quéndacoo de ñuu un quíngoo de. ⁴⁰ Yūcuán na te ni quendacoo de vecāa, te ni jengoo tucu de vehe Lidia, te ni cacahān de jnūhun ndeyí ni jíin táca hermano. Te ni caquihin de ichi cuangoo de.

Jeē ní cacuvaā ñayuu Tesalónica

17

¹ Te Pablo jíin Silas ni cayāha de ñuu Anfípolis jíin ñuu Apolonia cuangoo de, te ni jinūcoo de ñuu Tesalónica nuū iyó iin vehe iī sinagoga jnāhan de hebreo. ² Te ni coyūcú de yūcuan únī semana, te tāca quívī ndétātu jéhén Pablo vehe iī sinagoga, nájñūhun sáha sáha de, te ni nacani de jnūhun ya nuū tée un. ³ Te jíin jnūhun cáhán tutu iī ni steén de jeē súcuan ni jini ñúhún ndoho Cristo jeē cúu yā te natecu yā. Te ni cahān de:

Jnūhun nácani ná núu ni cúu jnūhun Jesús, te máá yá cúu Cristo, Yaā ní jeni Yaā Dios jeē jnáma ya yohó, áchí de.

⁴ Te ni cacandíje sava jnāhan de hebreo jíin cuéhē ñayuu griego jeē cáchiñúhún i Yaā Dios, jíin cuéhē ñahan cácuu nuū, te ni nduu inuú ni i jíin Pablo jíin Silas. ⁵ Yūcuán na te yōhyo ni cacucuésún ni jnāhan de hebreo jeē tu cacandíje, te ni castútú tée cunée jéé cájica cúxí-ni, te ni quejéé cácana ndee cuangoo. Te súcuan ni casaca núu de xinī ñáyuu ñuu ún. Te ni jengoo de vehe Jasón cánanducú de Pablo jíin Silas jeē jnā de tēe un quíndeca de nuū ñáyuu cuehē. ⁶ Te tu ní cánanihin de, te ni cañuhun de Jasón jíin sava ga hermano cuangoo de jíin núu tohó ñuu ún. Te jeē siquí Pablo jíin Silas ni cacana jee de:

Tēe jeē castívī xínī ñáyuu ní ñáyívī, je ni quecoo de nde yāhá. ⁷ Te máá Jasón ni jēhe núu vehe cáyūcu tée ún. Te

tēe ún tu cájetáhú de ley maá rey yohó ñáyuu Roma, chi sa suhva cácahān de jeē cájetáhú de nuū inga rey jeē naní Jesús, achí de jíjnáhan de.

⁸ Te ñayuu jíin tée cácuu tohō ni cajini sōho i jnūhun yáha, te ni cacuvaā i siquī. ⁹ Te Jasón jíin táca gá hermano ni castóo de xūhún de, chi ni cacahān tohō un jíin de jeē nde núu tají de Pablo jíin Silas quíngoo de inga ñuu, yūcuán na te nacuaña tohō un xūhun de. Te súcuan te ni casiáá de Jasón jíin táca gá hermano cuangoo de.

Jeē ní coyūcu Pablo jíin Silas ñuu Berea

¹⁰ Yūcuán na te tēcá hermano un, yachī-ni ni cascáca de Pablo jíin Silas jecuáa un, cuángoo de nde ñuu Berea. Te nuū ni jínūcoo de yūcuán, te ni quivícoo de vehe iī sinagoga jnáhan ñuu de hebreo. ¹¹ Te jnáhan ñuu de hebreo cáyūcu yúcuan, vāha ga ni maá de vēsú jnáhan ñuu de hebreo cáyūcú ñuu Tesalónica, chi vāha ni cacusiñ ni de jíin jnúhun ni cacahān Pablo jíin Silas. Te ndijnahan quivī cánanducú yúcún de nuū tútu iī núu súcuan cáhán chí tuú. ¹² Jeē yúcuan ní cacandíje cuehē jnáhan ñuu de hebreo te suni nde jíin cuehē ñayuu griego, cúu tēe cúu ñahan cácuu nuū. ¹³ Te jnáhan ñuu de hebreo cáyūcú ñuu Tesalónica ni cajini jnūhun de jeē suni nde ñuu Berea nácani Pablo jnūhun Yaā Dios, te ni caquihin de ichi cuangoo de Berea, te suni yūcuán ní castónda de ñayuu siquī Pablo. ¹⁴ Yūcuán na te tēcá hermano ni catajī-ni de Pablo cuahān de nde yumar. Te ni ndōo Silas jíin Timoteo ñuu Berea. ¹⁵ Te jecu hermano ni cajendēca de Pablo nde ñuu Atenas. Te ni cahān Pablo jíin de jeē cahān de jíin Silas jíin Timoteo jeē na quíngoo yachī de nuū Pablo. Te vendícoo de ñuu Berea.

Jeē ni íne Pablo ñuu Atenas

¹⁶ Te níní ndétu Pablo jeē jinúcoo Silas jíin Timoteo nuū de ñuu Atenas, te ni jini de jeē ñáyuu ñuu ún yōhyo cáchiñúhún i ídolo, te ni nacani cuíhyá ni de. ¹⁷ Te ini vehe íi sinagoga ni cahān de jnūhun ya jíin jnáhan ñuu de hebreo jíin táca gá tēe cáchiñúhún Yáa Dios. Te suni tāca quívī ni nacani de jnūhun ya nuū tāca ñáyuu cáhiin nuū yáhu. ¹⁸ Te sava tēe cáscuáha jnūhun jeē castéén grupo epicúreo, jíin inga sava tēe cáscuáha jnūhun jeē castéén grupo estoico, ni caquejéé cacahān jíin Pablo. Te sava ni cacahān:

¿Na jnūhun cáhán tēe t́lólhlé yāha? áchí.

Te sava ga de ni cacahān:

Tēe nácani jnūhun tāca yáa jeē tu cánevāha yó cúu de, áchí.

Súcuan ni cacahān de, chi nácani Pablo jnūhun vāha Jesús jeē ní natecu yā mēhñu ndýi. ¹⁹ Te ni cajeca de Pablo cuango de, te ni jinúcoo de nde lugar nuū naní Areópago nuū cándutútú ñáyuu cándacu jniñu, te ni cacahān de:

Cácuni ná cachí ni núu na jnúhun jeé jēe steén ni. ²⁰ Chi cáhán ni jnúhun jeē ná tu cuni cuíti na jíjnáhan ná, te jeē yúcuan cácuni ná jecūhun ni na síquī tāca jnúhun yáha, áchí jíin de.

²¹ Chi tāca ñáyuu ñuu Atenas jíin táca ñáyuu inga ñuu jeē cáyūcu núu i yūcuán, tuá na inga jniñu cácusñi gā ni i jíin chi máa-ni jeē cuni nahín i jnūhun jeé chí jēe cahán i jnūhun jeé.

²² Te índichi Pablo mēhñu ñáyuu ní candutútú núu naní Areópago, te ni cahān de:

Tēe ñuu Atenas jíjnáhan ní, jíto ná jēe yóhyo cáchiñúhún ní yāa máa ní. ²³ Chi ni jica nuu ná, te ni jecondēhe ná nuū jeē cáchiñúhún ní, te ni jito ná ñn altar jeē yosó jnúhun yáha: Yāha cúu altar yāa jeē ná tu cuni yō jnūhun ya, achí. Te máa Yáa un jēe cáchiñúhún ní,

vēsú ná tu cuni ni jnúhun ya, suu jnúhun Yaā un cúu jeē nácani ná núū ní vijna.

²⁴ Chi Yaā un cúu Yaā jeē ni sáha ñayīvi jíin táca ndihi jeē iyó, te máá yá cúu Jitoho andiví jíin ñayīví, te tu ndéé yá ini veñūhun cásáha ñayuu. ²⁵ Te ni tu cúmanī ni ñin nuū yā jeē cuáha ñayuu nuū yā, chi máá yá sáha jeē técu ñayuu, jíin jéē stáa i tachī i, jíin jéē nihín i ndihi jeē jíni ñúhún i.

²⁶ Te ni sáha ya jeē chíji ñin-ni yucūn ni tahū tāca ñayuu jeē ní nduu tācá nación, návāha coyūcú i ní cáhnu ñayīví, te ni tana yā cuiyā cotecu ñayuu jíin lugar coyūcú i jíjnáhan i. ²⁷ Te súcuan ni sáha ya chi cúni yā jeē nanducú yó yā, chi núu nanducú yó yā te cuni yō jeē iyó yá, chi jajni-ni cúu ya jíin ñin ñin yó. ²⁸ Chi máá yá sáha jeē iyó yó jíin jéē cátecu yō jíin jéē cácanda yō. Chi suni súcuan ni cacahān sava tēe ñuu ni jéē cátava yaa: Suni nde yucūn maá yá cácuu yó, áchí. ²⁹ Te núu yucūn Yaā Dios cácuu yó, te ma cáni ni yō jeē ídolo oro chí plata chí yúū cúu ya, chi cájeni ni ñayuu jeē súcuan cáa ya, te súcuan cásávāha i ídolo. ³⁰ Te ni jendeyí ni yā siquī jeē tu ní cájecūhun ni i ní ndé saá, te vijna chi ndácu ya jniñu jeē ñayuu ní cáhnu ñayīví na nácani ni i jeē stóo i cuēchi i. ³¹ Chi Yaā Dios, je ni jeni ya quiví jeē ndaā sándaā yā siquī ñayuu ñayīví, te ni jeni ya Jesús jeē maá yá sándaā. Te je ni steén cají Yaā Dios nuū tāca ñayuu jeē maá yá ni jeni Jesús, chi ni nastécu yā Jesús, achí Pablo.

³² Te jeē ní cajini sōho i jnúhun jeē nátecu ndīyi te sava i ni cacahān catá i, te sava ga i ni cacahān i:

Vāha te núu cuu cuni sōho na jnúhun cáhán ni ndé inga jínu, áchí i.

³³ Te ni quenda Pablo mēhñu ñayuu un cuáhān de. ³⁴ Te cuahān jecu ñayuu jíin Pablo, te ni cacandíje. Te ñin de cúu

Dionisio, tēe ndútútú jíin tēe cácujéhnu cásáha junta nuū naní Areópago, jíin ññ ñahan nání Dámaris, jíin jecu gā i.

Jeē ni íne Pablo ñuu Corinto

18

¹ Yūcuán na te ni quenda Pablo ñuu Atenas, te cuahān de nde ñuu Corinto. ² Te yūcuan ní jito de nuū ññ jnáhan ñuu de hebreo, nání Aquila, te tēe región Ponto cúu de. Te sáá jecu-ni tiempo ni quee de jíin ññasíhí de Priscila jeē ní quenda de Italia, chi rey Claudio ni ndacu de jniñu jeē na quéndacoo tāca ñáyuu hebreo ñuu Roma, jeē cúu capital Italia. Te ni jinū Pablo vehe Aquila jíin Priscila jeē cáyūcú de ñuu Corinto. ³ Te suni jniñu sáha tēe un sáha Pablo, chi cáquicu de ññ cuu vehe. Te ni quendōo Pablo jíin tēe ún, te ni casájniñu de. ⁴ Te tāca quívī ndétātu ní jehēn Pablo vehe íi sinagoga ni nacani de jnūhun ya, te ni nducú ndéyí de jeē na cándíje ñayuu jnūhun Jesús, cúu jnáhan ñuu de hebreo jíin ñáyuu tācá nación jeē tu ní cájini i jnūhun ya.

⁵ Te ni jinūcoo Silas jíin Timoteo ñuu Corinto jeē véjicoo de nde Macedonia. Yūcuán na te tuá na inga jniñu ní sáha Pablo, chi máni jnūhun ya nácani cáj de nuū ñáyuu cácuu jnáhan de hebreo, jeē maá Jesús cúu ya Cristo, Yaā jeē cáñūhun ní i quiji ya. ⁶ Te ni caquejéé i ni cacahān i siquī jnūhun ún, te ni cacahān xeēn i nuū Pablo. Te máá de ni caja de sahma de jeē cúu seña jeē stóo de i jíin cuéchi i, te ni cahān de jíin i:

Cuéchi máá ní cúu jeē jnahnū ndetū ni núu súcuan, te nasūu cuéchi máá ná cúu. Nde vijna te quihīn na núu ñáyuu tācá nación jeē tu cájini i jnūhun ya, te nacani ná jnūhun ya nuū i, áchí de.

⁷ Te ni quenda de ini vehe íi sinagoga, te ni jinū de vehe ññ tēe nání Justo ni condee de. Te chíñúhún tēe un Yáá Dios, te vehe tēe un néne yajni xiin véhe íi sinagoga. ⁸ Te

Crispo, tēe cújéhnū ini vehe iī sinagoga, ni candíje de máá Jítóho yō nde jíin ndíhi ñayuu vehe de. Te cuehē ñayuu ñuu Corinto ni cajini nahín i jnūhun nácani Pablo, te ni cacandíje i, te ni cajendute i. ⁹ Te iin jecuáa ni sáha máá Jítóho yō jeē ní jito ndijin Pablo yā ni cahān yā jíin de:

Ma yūhu ró ni ma cási rō yuhu ró, chi níni nacani ró jnúhun ri. ¹⁰ Chi ndíto ri rohó, te ma cúu sáha xeēn ni iin ñayuu jíin ró. Nacani ró jnúhun ri, chi coo cuehē ñayuu candíje jnūhun ri ñuu yáha, áchí yá.

¹¹ Te ni condee Pablo yūcuán iin cuiyā yosáva ni steén de jnūhun Yaā Dios nuū ñáyuu ún.

¹² Te ná cúu Galión gobernador Acaya, te ñayuu hebreo jeē cúu jnáhan ñuu Pablo, iin cáhnu-ni ni candonda i siquī Pablo. Te ni cajeca i de cuangoo i jíin de nde vehe juzgado.

¹³ Te ni cacahān i jíin Galión:

Tēe yáha yōhyo scáhán de tāca ñáyuu jeē inga modo chíñúhún i Yaā Dios, suu iin modo jeē cúu contra siquī ley, achí i.

¹⁴ Te quejéé Pablo cahān de núú, te ni cahān-ni Galión jíin ñáyuu hebreo un:

Ñayuu hebreo jijnáhan ró, núu iin cuēchi xeēn cúu, te cánuú cuni nahín rí jnūhun cácahān rō núú. ¹⁵ Te tuú, chi máni siquī jnúhun-ni jíin síquī ley maá ró jíin síquī tée cástéén cúu. Te na sándaā maá ró siquī jníñu yáha, chi tu sándaā rí siquī maá iin jeē súcuan-ni, áchí de.

¹⁶ Te ni cahān de nuū i jeē na quíngoo i fuera. ¹⁷ Yūcuán na te ñayuu griego ni cajni i Sóstenes, tēe cújéhnū ini vehe iī sinagoga, te máá fuera yehyí vehe juzgado ni cacani i de, te Galión chi tu ní sáha cuiti de cuenta.

Jeē ní najinū Pablo ñuu Antioquía, te cuahān de vuelta uní jeē nacani de jnūhun ya

¹⁸ Te cuehē gā quivī ni condee Pablo ñuu Corinto. Yūcuán na te ni nacuatáhu de nuū tācá hermano yúcuan,

te Aquila jíin ñasihí de Priscila cuango de jíin Pablo, te ni jinūcoo de ñuu Cencrea. Te yūcuan ní saté líi Pablo xiní de, te súcuan stéén de jeē squícu de nuū Yaā Dios jeē ni jéjnūhun de. Te ni quívicoo de barco jíin Aquila jíin Priscila quihīn de región Siria. ¹⁹ Te ni jinūcoo de ñuu Efeso, te yūcuan ní caquendō Aquila jíin Priscila. Te ni jehēn-ni Pablo vehe īi sinagoga, te ni cahān de jnūhun ya jíin jnāhan ñuu de hebreo jeē cándutútú yúcuan. ²⁰ Te ni cacahān ndahú i jíin de jeē na cōnēne de jecu gā quivī jíin i, te tu ní jéhe de jnūhun. ²¹ Chi ni nacuatáhu de nuū i, te ni cahān de:

Cánuú jéē nuhūn ná ñuu Jerusalén cone ná vico. Te núu cúní Yaā Dios te ndee tucu ná núū ní, áchí de.

Te ni quenda de ñuu Efeso, te ni quivī de barco cuahān de. ²² Te ni jinū de ñuu Cesarea, te ni jehēn de ñuu Jerusalén. Te nuū ní ndīhi ni cahān de jíin grupo ñayuu cácandíje yūcuán, te cuanuhun de ñuu Antioquía. ²³ Te ni coyūcú de yūcuán jecu quivī, te sáá te ni quenda tucu de cuahān de ni jica cuu de ní Galacia jíin Frigia. Te ñayuu cácandíje ni cahije ga ni i jíin jnūhun ya ni sáha de.

Jeē ní nacani Apolos jnūhun Jesús ñuu Efeso

²⁴ Te ñuu Efeso ni quee īin tēe hebreo nání Apolos, te tēe ñuu Alejandría cúu de. Te vāha nácani de jnūhun ya, chí vāha jíiní de jnūhun jeē cahán tutu īi. ²⁵ Te je ni cutūhva vāha tēe un jíin jnūhun máá Jítóho yō Jesús, vēsú jíiní de máni máá jnūhun ya jeē ni stéén Juan ná ni scuándute de ñayuu, te ndīhvī ni de stéén cají de jnūhun ya nuū ñáyuu. ²⁶ Te jéhnu-ni ni nacani de jnūhun ya ini vehe īi sinagoga. Te ni cajini sōho Aquila jíin Priscila jnūhun nácani de, te ni cajeca de Apolos cuango sīn de, te ni cacastūhun yúcún ndīndúú de jnūhun ya jeē ná tu cuni Apolos. ²⁷ Te cúní Apolos quihīn de nde región Acaya. Te je cácandíje sava ñayuu yúcuan ní sáha Yaā Dios siquī jeē vāha ni yā. Te tācá

hermano ñuu Efeso ni cachindéé ñáhán i de, chi ni catee i carta quihîn de jíin núu ñáyuu cácanđíje cáyūcú Acaya jeē na cuátáhú i Apolos. Te nuū ni jínū de yūcuán, te vāha ni chindéé ñáhán de tāca ñáyuu cácanđíje un jíin jnúhun ya. ²⁸ Te nuū tāca ñáyuu ñuu un ndé jíin jnáhan ñuu de hebreo jeē cáyūcu yūcuan, ní steén cají de ndese cástívi tāca jnáhan hebreo de síquī jnúhun ya. Te tu ní canihîn jnáhan de un jnúhun cahān síquī jeē ni stéén de, chi jíin jéē cahán tutu īi ni steén de jeē Jesús cúu Cristo, Yaā jeē cáñūhun ni de quiji ya.

Jeē ni íne Pablo ñuu Efeso

19

¹ Te níní néne Apolos ñuu Corinto, te ni yāha Pablo ichi síquī ñuu Efeso, te ni nanuu de ni jinū de máá ñuu ún. Te yūcuan ní nijnáhan de jíin tijni tēe cácanđíje. ² Te ni cajñūhún de tēe ún:

¿A ní canihîn ní Espíritu Santo ná ni cacandíje ní, chí ná tuú? áchí de.

Te ni cacahān de jíin Pablo:

Tuú, chi ni ná tu nihîn na jnúhun jeē iyó Espíritu Santo, achí de.

³ Yūcuán na te ni cahān Pablo:

¿Na síquī ni cajendute ní núu súcuan? áchí de.

Te ni cacahān de:

Ni cajendute ná síquī jnúhun ni steén Juan, achí de.

⁴ Te ni cahān Pablo:

Jeē ní scuándute Juan ñayuu cúu jeē ni stéén de jeē na nácani ni i jeē stóo i cuēchi i, te ni cahān de jeē na cándíje i máá Yáā quiji jeē cúu Cristo Jesús, áchí Pablo.

⁵ Te nuū ní cajini sōho tēe un jnúhun yáha, te ni cajendute de jeē ní cacandíje de máá Jítóho yō Jesús. ⁶ Te ni soó Pablo ndindúú ndaha de xinī tāca tēe ún, te ni quīvi ni Espíritu Santo ini anuá de jíin náhan de, te ni cacahān

de sĭn sĭn yuhu te ni canacani de jnūhun ya. ⁷ Te ni ĭyo nájñūhun uxĭ uū jnahán tēe.

⁸ Te unĭ yoō ni jehēn jehēn Pablo vehe ĭi sinagoga. Te jēhnu ni nacani de jnūhun ya, te ni nducú ndéyĭ de jeē na cándĭje ñayuu jnūhun ndese ndácu Yaā Dios jniñu. ⁹ Yūcuán na te sava i ni cacunĭhni ni i te tu ní cácanđĭje i, chi sa ni cacahān neé i siquĭ jnúhun vāha Yaā Dios jíin ñáyuu cánataca. Jeē yúcuán ní cujiyo-ni Pablo nuū ñáyuu ún, te ñayuu cácanđĭje cuangoo i jíin de. Te ndijnahan quivĭ ni steén de nuū ñáyuu ún ini escuela ĭn tēe nánĭ Tiranno. ¹⁰ Te súcuán ni sáha de uū cuiyā, te tāca ñáyuu cáyūcu Asia, cúu ñayuu hebreo cúu ñayuu tāca gá nación, ni cajini sōho i jnūhun máá Jítóho yō Jesús. ¹¹ Te ni jēhe Yaā Dios poder nuū Pablo jeē sáha de cuehē jniñu jēhnu téyĭ. ¹² Te nde pañú jíin sahna jeē ní jniĭ de ni cajengoo jíin núu ñáyuu cácuĥū, te ni canduvāha-ni i cuehyĭ cándoho i, te ni quendacoo tachĭ ini i cuangoo.

¹³ Te jecu tēe hebreo cájica cuu de jeē quēnehen de tachĭ ini ñayuu, te ni cajeni siquĭ ni de jeē suni jíin poder maá Jítóho yō Jesús quenehen de tachĭ, te suhva ni cacahān de jíin táca táchĭ:

Jíin poder Jesús jeē nácani Pablo jnūhun ya, cáhán niĭhin ri jíin ró jeē na quénda ró quĭhĭn rō, achí de.

¹⁴ Te súcuán ni casáha uxā sēhe yĭ ĭn tēe hebreo nánĭ Esceva, cúu de ĭn sutū kujéhnu. ¹⁵ Te ná ni casáha de, te ni cahān-ni tachĭ ún:

Je jíinĭ rĭ Jesús, te suni jíinĭ rĭ Pablo. Te róhó jíjnáhan ró ĩndé tée cácuu ró jeē cuatáhú rĭ rohó? áchĭ jíin de.

¹⁶ Te tēe ndóho tachĭ un ní ndonda de, te ni cundeyĭ de siquĭ ndĭhúxá tēe ún. Te ni sáha xeēn ndasĭ de jíin ndé ni catujĭ te ni cacuvichĭ lĭ ni quendacoo vehe un ní cajinu cuangoo. ¹⁷ Te jnūhun yáha ní cajini tāca ñáyuu cáyūcú ini ñuu Efeso, cúu ñayuu hebreo cúu ñayuu tāca gá nación, te

yōhyo ni cayūhú i, te ni cacahān i jeē yóhyo cújéhnu máá Jítóho yō Jesús.

¹⁸ Te cuehē ñayuu jeē ní cacandíje ni quijicoo i nuū Pablo ni nacani ndaā i jnūhun tācá jniñu neé ní casáha i.

¹⁹ Te cuehē i jeē ní casáha jniñu tásí ní jinūcoo i cándiso i tutu i, te ni cajehmu i tutu un jíto nuū tāca ñáyuu. Te ni catava i cuenta nasaa ndéé tutu ni cáyū ún, te ni cajini i jeē uú xico uxī mil xūhun plata cúu. ²⁰ Te ni jitē jnūhun máá Jítóho yō cuahān, te ndīhi ñayuu ni cajini i jeē cujéhnu ndasí jnúhun ya.

²¹ Te nuū ní ndīhi tācá jniñu yáha, te jéni téyí ni Pablo jeē quihīn de Macedonia jíin Acaya, te sáa te najinū de ñuu Jerusalén. Te ni cahān de jeē na nájínū de ñuu Jerusalén, yūcuán na te jíni ñūhún quihīn de nde ñuu Roma. ²² Te uū tēe jeē cáchindéé ñáhán jíin Pablo cúu Timoteo jíin Erasto, te ni scāndu de ndindúú tēe yāhá cuángoo de nde Macedonia, te ni quendōo máá de Asia jecu gā quivī.

Jeē ní cacuvaā ñayuu ñuu Efeso

²³ Te suu quivī ún yōhyo ni candonda ñayuu siquī jnúhun ya. ²⁴ Chi ni īyo ñin tēe sájniñu siquī plata, nání de Demetrio. Te máá de jíin ndīhi tēe cásájniñu jíin de, cánihīn de cuehē xūhún, chi jíin plata casáha de vehe lulí jēe modo veñūhun ídolo i jeē cúu yaā Diana. ²⁵ Te Demetrio ni nastútú de tēe cásájniñu jíin de jíin táca gá tēe jeē suni jniñu yúcuan casáha, te ni cahān de:

Tátā, cájini ni jēe siquí jniñu casáha yó yáha vāha cánihīn yō xūhún. ²⁶ Te cájito ní te cájini sōho ní jēe ñin tēe nání Pablo chi cáhán de jeē násūu yāā cácuu jeē casáha ñayuu. Te je ni scandíje de cuehē ñayuu, nasūu máá ñin-ni ñuu Efeso yāhá chi ní cáhnu Asia. ²⁷ Te quíyūhú ni na jēe cahān ñayuu jeē tu ndé jéjníñu jeē casáha yó. Te sanaa te suni súcuan cahān i coto i máá veñūhun yaā síhí Diana

jeē cujéhnū, te suni sájéē ni i nuū yaā Diana, te ma cúu ga cujéhnū ya vēsú ndivii ñayuu Asia jíin ñáyuu ní cáhnu ñayiví cáchiñúhún i ya vijna, áchí de.

²⁸ Súcuan ni cajini sōho de jnūhun yáha te yōhyo ni caquitī ni de, te ni cacana jee de:

Cujéhnū téyí Diana, yaā cúu patrona ñuu yō Efeso, achí de.

²⁹ Te ñayuu ñuu Efeso ni cacuvaā i, te ñin cáhnu-ni ni candonda i ni cajni i Gayo jíin Aristarco cuango i jíin de nde vehe nuū cándutútú ñayuu casáha i junta. Te ndíndúú téē un cácuu tēē Macedonia, te cájica de jíin Pablo. ³⁰ Te cúní Pablo quívi de nuū ñáyuu cuehē un cáhān de jíin i, te ñayuu cácandíje tu ní cájēhe i jnūhun quihín de. ³¹ Te suni sava tohō jeē cácuu amigo de cáyūcu Asia, ni catajī jnūhun cuahān nuū de, cácahān ndahú jíin de jeē ma quihín de nuū ní cacutútú ñáyuu ún. ³² Te ñayuu ní cacutútú un, sava i ni cacana jee i ñin jnūhun te sava ga i inga jnūhun, te súcuan ni cacuvaā téyí i, te cuehē i ni tu cájini cuítī i na siquī cúu jeē ní cacutútú i. ³³ Te sava tēē hebreo ni cajeni de ñin jnáhan de jeē naní Alejandro nuū ñáyuu cuehē ún, te ni cacastūhún de nuū téē ún na siquī cúu jeē cacuvaā i. Yūcuán na te Alejandro ni sáha de seña jíin ndaha de jeē na cúnayúú ñáyuu, chí cúní de cahān de jíin i jeē násūu cuéchi tāca ñáyuu hebreo cúu. ³⁴ Te ni canacuni ñayuu un jéē téē hebreo cúu de, te jeē yúcuan ní cacana jee téyí gá i nájnūhun uū hora:

Cujéhnū téyí Diana, yaā cúu patrona ñuu yō Efeso, achí i.

³⁵ Yūcuán na te ni cacunahín ñáyuu ni sáha tēē cúu secretario ñuu ún, te ni cahān de:

Níhín ñáyuu ñuu yō Efeso, ndíhi ñayuu chí je cájini i jeē cándito vāha yó veñūhun yaā Diana jíin imagen Diana jeē ní ñinga nde andiví. ³⁶ Te ni ñin chí ma cúu cahān

jeē tú ndaā jnūhun yáha. Núu súcuan te vāha ga na cási ní yuhu ní, te ma sáha yachī ní ìn jeē tu ní nácani vāha ni ní síquī. ³⁷ Chi tēe yáha ní caquindeca ní de yāhá vēsú tu ní cásáha de ni ìn cuēchi síquī Diana yō, ni tu ní cácahān ndevāha de ni ìn jnūhun síquī. ³⁸ Te Demetrio jíin táca gá tēe jeē ìn-ni jniñu cásáha jíin de, núu cáciu de cahān de cuēchi síquī ìn tēe, te na quíngoo de nde vehe juzgado nuū cáyūcu juez, tēe cásandaā jniñu, te yūcuán cundaā síquī de jíināhan de. ³⁹ Te núu íyó jnúhun jeē ma cúu cundaā yūcuán, te jíni ñúhún cundaā nuū ìn junta nájnūhun tájnúní ley. ⁴⁰ Chi yúhú ná jeē sanaa te cahān tāca tóhō Roma jeē síquí gobierno de ni candonda yó, chi ma nihín yō jnūhun castūhun yó na síquī cúu jeē ní cacutútú yó ni cacuvaā yō vijna, áchí de.

⁴¹ Te nuū ní ndíhi ni cahān secretario jnūhun yáha, te ni cajitē ñayuu un cuángoo.

Jeē ni jéhēn Pablo Macedonia jíin Grecia

20

¹ Te ná ni yāha jéē ní cacuvaā ñayuu, te ni cana Pablo ñayuu cącandíje, te ni jeni ichí de i. Te ni cañunundee jnāhan de jíin Pablo jeē ní nacuatáhu de, te cuahān de Macedonia. ² Te ni jica cuu de tēcá ñuu yúcuan. Te jíin cuéhē jnūhun ni stihví ni de tēcá hermano cącandíje. Te ni jinū de Grecia. ³ Te ni condee de yúcuan únī yoō. Te je yajni quihīn de jíin barco nde Siria nuú, te máá quívī ún te ni nihīn de jnūhun jeē jnāhan ñuu de hebreo ni casquíjnāhan jnūhun jeē ndonda síquī de ichi nuū quihín de, te jeē yúcuan ní nacani ni de te cuahān tucu de ichi Macedonia. ⁴ Te ni cahīyo sava tēe cájica jíin Pablo, te cánaní de Sópater ñuu Berea, Aristarco jíin tēe nání Segundo nde ñuu Tesalónica, Gayo ñuu Derbe, Tíquico jíin Trófimo nde Asia, jíin Timoteo. ⁵ Te ni cacandu tēe yáha,

te cándētu de Pablo jíin sáña, Lucas, nde ñuu Troas. ⁶ Te nuū ni yáha vico jeē cáyeji i pan jeē tu yíhi levadura, te jíin barco ni quendacoo ná ñuu Filipos, te nde nuū uhún quiv̄i te ni canajnáhan ná jíin de nde ñuu Troas. Te ñuu yúcuan ní coyūcu ná uxā quiv̄i.

Jeē ni íne Pablo ñuu Troas

⁷ Te máá quiv̄i domingo ni candutútú ñáyuu cácandíje jeē cáji i pan, nájnūhun ni steén maá Jítóho yō jeē núcūhun ni yō siqūi yā. Te ni steén Pablo jnūhun nuū ñáyuu ún. Te siqūi jeē inga quiv̄i un jíini ñúhún quenda de quih̄in de, te nahán ní nacani de jnūhun nde ni cuñuú. ⁸ Te vehe yósó jnáhan cúu vehe ún. Te nde cuarto xinī nuū ní candutútú ná un ní íyo cuehē lámpara ni cundijin. ⁹ Te ñin sūchi yí nání i Eutico, néne i yuhu ventana. Te jeē ní cunahán nacani Pablo jnūhun, te yōhyo jíi i máhná, te ni quixī-ni i. Te nde piso unī un ní ñinga i nde nuū ñúhún. Te je ni jihī i ni candonehen de i. ¹⁰ Yūcuán na te ni nuu Pablo te ni jita ndeyi de ni canehen de i ni ñunundee de i, te ni cahān de:

Ma yūhu ní jíjnáhan ní, chí ni natecu i, áchí de.

¹¹ Te ni ndaa Pablo, te ni yeji de pan jíin i jíjnáhan i jeē cánucūhun ni de siqūi yā. Te nahán gá ni nacani de jnūhun nde cuacundijin. Yūcuán na te ni quenda de cuahān de. ¹² Te Eutico chí íyó váha i cuanuhun i jíin de jíjnáhan de, te ndivii ñayuu ún yōhyo cácusī ni i.

Jeē ní quenda Pablo ñuu Troas cuahān de ñuu Mileto

¹³ Te ni quiv̄icoo ná ini barco cuangoó ná. Te Pablo chí cúní de caca jéhé de, te ni cundaā jeē najnáhan ná jíin de nde ñuu Asón. ¹⁴ Te nuū ní canajnáhan ná jíin de ñuu Asón, te ni quiv̄i de barco te cuangoó ná jíin de nde ñuu Mitilene. ¹⁵ Te yúcuan ní quendacoo tucu ná jíin barco te inga quiv̄i ni jinūcoo ná xiin Quío, ñuhun jeē íne sñin

nuū ndúte. Te quiv̄ uní ni jinūcoo ná Samos jeē súni nuū ndúte íne, te ni caquendōo ná Trogilio. Te quiv̄ cuún ni jinūcoo ná ñuu Mileto. ¹⁶ Te tu ní jéngoo ná ñuu Efeso, chí jéni ni Pablo jeē yáha-ni de ñuu un quíh̄in de, návāha ma cucuéé de Asia te naa tiempo nuú, chí núú de jinū yach̄i de ñuu Jerusalén cone de máá quiv̄ Pentecostés núu na cúu.

Jeē ní jeni ichí Pablo tē jéhnu cándiso jniñu nuū ñáyuu cá candíje ñuu Efeso

¹⁷ Te ná íne ga Pablo ñuu Mileto, te ni tají de jnūhun cuahān nde ñuu Efeso jeē na quíjicoo tē jéhnu cándiso jniñu nuū ñáyuu cá candíje yūcuán. ¹⁸ Te nuū ní quecoo tē ún, te ni cahān de:

Je cájini vāha ní ndese ni jica ndaā na ndé ná ni quee nuú ná Asia te nde vijna. ¹⁹ Chi ní tiempo jeē ni íne ná jíin ní te nde vijna, jéjniñu vāha na síqū jnúhun máá Jítóho yō, te tu ní sándúxí ná maá ná. Te íyó jínu ni ndahyū na jéhē ñáyuu. Te ni ndoho ná jnúndóho ni casáha jnáhan ñuu ná hebreo, chí ni casquíjnáhan jnūhun i síqū ná. ²⁰ Te cájini ni jéē tu ní táñúhún ná ni ñin, vēsú ndese ga cácahān ñayuu síqū ná, chí ni nacani ná ndíhi jnūhun ya jeē quéndōo vāha ní sáha. Te ni steén na jnúhun ya nuū ni jíjnáhan ní, cúu nuū chitú cúu tācá vehe ní. ²¹ Te ñnuú-ni jnūhun ni nacani ná núū ndíhi ní, cúu jnáhan ñuu ná hebreo cúu ñayuu tāca gá nación, chí ni cahān na jéē na nacani ni ni jéē stóo ni cuéchi ní te na cándíje ní máá Jítóho yō Jesucristo. ²² Te vijna chí ñúhun ichí ná quíh̄in ná ñuu Jerusalén, chí stíhv̄i ni Espíritu Santo sãña quíh̄in ná. Te tu jíni ná ndese ga coo jíin ná yūcuán. ²³ Te íyó ñin jeē jíni na, cúu jeē chune i sãñá vecāa te quiji jnúndóho síqū ná, chí Espíritu Santo súcuan cáhan jíin ná ndíjnahan ñuu nuū jíca ná. ²⁴ Te ni tu sáha ná cuenta vēsú na cáhni i sãñá, chí jeē cuní na cúu jeē na sínu vāha

ná jniñu jeē ní tee máá Jítóho yō Jesús siquī ná, te súcuan cusī ni ná. Te jniñu un cúu jeē nácani ná jnúhun vāha ya nuū tāca ñáyuu ndese vāha ni Yaā Dios jíin yó.

²⁵ Te je ni jica cuu ná, ní nacani ná jnúhun ya nuū ní ndese ndácu Yaā Dios jniñu. Te vijna chi jíin na jēē ni ñin ní ma najnáhan ga yō nuū ñáyivī yáha. ²⁶ Jeē yúcuan cástūhun cájí ná nuū ni jíin náhan ní vijna jeē násūu cuéchi ná cúu núu ndé ñin ní stívi. ²⁷ Chi ni nacani ná núu ní ndihī jnúhun Yaā Dios jeē ni sándaā yā ndese coo, te tu ní quéndōo ni ñin jnúhun. ²⁸ Núu súcuan te coto vāha ní máá ní jíin ndihī ñayuu cácandíje, chi Espíritu Santo ni jeni ya nihín jēē cóndito ní ñáyuu maá Jítóho yō, chi ni nacuaan ya i jíin níñi yā. ²⁹ Chi jeē quihín na te jíin na jēē quijicoo tēe cástáhú quívicoo mēñu ní, te nducú de snāa de jnúhun ni cajetáhú ñáyuu cácandíje, te xeē sáha jnúhun stáhú de nájnūhun xeē sáha yihī jeē cájehni tī lanchi. ³⁰ Te suni nuū grupo maá ní quejéé sava de cahān de jnúhun stáhú, te stáhú de sava ñayuu cácandíje jeē na cóndiquin i jnúhun stáhú stéén de. ³¹ Jeē yúcuan condito ní jēē ma cóo súcuan. Te ma náā ni ni jēē uní cuiyā ndiquivī ndíñuu ni condihvī ndasí ni na ndé ndahyú na jéhē ni, ní jeni ichí ná ñin ñin ní jíin náhan ní.

³² Te vijna, hermano, jícan tahu na núu Yaā Dios jeē coto ya nihín. Chi jnúhun jeē vāha ni yā ndíso poder sáha jeē íje ga ni jíin, te suu sáha jeē ñin quivī te cuāha ya tahū jeē ndujéñu luu ní ndé jíin ndihī ñayuu ní nacāji ya jeē cóo ndoo coo i i nuū yā. ³³ Tu ní nducú ná jeē nihín na xúhun chí sahma nuū ní ñin i. ³⁴ Chi je cájini vāha ni jēē sa suhva ni sájniñu nihin ná návāha nihin na jēē cótecu na ndé jíin táca tēe cájica jíin ná. ³⁵ Te níni ní steén na núu ni jēē súcuan jíni ñúhún sájniñu yó návāha nihin yō jeē cuāha yó núu ñayuu cúmanī nuū. Te ma náā ni ni jnúhun jeē ni cahān maá Jítóho yō Jesús, chi suhva ni cahān yā:

Ndetū gā quendōo yó jēē cuáha yó vēsú jeē nihín yō, achí yá. Achí Pablo.

³⁶ Te ni ndihí ni cahān de tāca jnúhun yáha, te ni jecuiñī yití de, te ni jicān tahu de jín ndihí tēe ún. ³⁷ Yūcuán na te ndihí de ni cajecunundee jnáhan de jín Pablo ni catechūhú de jeē cánacuatáhu de, te ni candahyū de. ³⁸ Chi cácuquíhyá ndasí ni de jín jnúhun ni cahān Pablo jeē ma ndácoto jnáhan ga de. Te cuangoo-ni de jín Pablo nde núū ín barco.

Jeē cuánuhun Pablo ñuu Jerusalén

21

¹ Yūcuán na te ni caquendōo tācá hermano ñuu Efeso, te ni quivícoo ná barco, te cuangoo ndaā-ni ná ndé Cos. Te inga quiví ni jinūcoo ná Rodas, te yūcuan ní quendacoo ná te ni jinūcoo ná ñuu Pátara. ² Te ni cane in barco jeē quihín Fenicia, te ni quivícoo ná cuángoo ná. ³ Te nuū ní cajito ná núū Chipre jeē íne sín nuū ndúte, te ni quendōo ichi lado jecó barco, chi ni cayāha ná cuángoo ná nde Siria. Te ni jinūcoo ná ñuu Tiro, chi yūcuan ndóo jeē ndíso barco ún. ⁴ Te ni jenanducú ná ñayuu cácandíje, te ni caquendōo ná jín i uxā quiví. Te máá Espíritu Santo ni steén nuū i jeē quíji jnūndóho siquī Pablo ñuu Jerusalén, te jeē yúcuán ní cacahān i jín de jeē ma quihín de. ⁵ Te ni yāha uxā quiví ún, te ni quendacoo ná. Te tāca tēe cácandíje jín ñasihí de jín séhe de ni cachuhun ichí de sāña ní jengoo de jín ná nde yatā ñuū, te ni cajecuiñī yití ná jín de yumar te ni cajicān tahu na. ⁶ Te ni cañunundee jnáhan ná ní canacuatáhu ná yūcuán, te ni quivícoo ná barco cuangoo ná. Te ni canandió cóo de cuanungoo de vehe de.

⁷ Te ni quendacoo ná ñuu Tiro cuangoo ná jín barco, te ni jinūcoo ná ñuu Tolemaida ni quendacoo ná ini barco. Te yūcuan ní jengoo ná ní cacahān na jín táca hermano,

te ni caquendōo ná jíin de ñin quivī. ⁸ Te inga quivī un ní cajica jéhé ná jíin Pablo, te ni jinūcoo ná ñuu Cesarea, te ni quivicoo ná vehe Felipe, tēe nácani jnūhun vāha ya. Tēe un cúu jnáhan jeē ndihúxá tēe jeē ní casaja staā nuū ñáhan viuda. Te ni caquendōo ná jíin de. ⁹ Te tēe un íyó cúūn sēhe síhí de jeē cáhīyo máá i, te cánacani i jnūhun Yaā Dios. ¹⁰ Te ni coyūcu ná yūcuán tijni quivī. Te ichi Judea ni quiji ñin tēe nácani jnūhun Yaā Dios, nání de Agabo. ¹¹ Te ni quee de nuū ná. Te ni quihin de sanchíi Pablo, te ni jihni de ndaha de jíin jéhē de, te ni cahān de:

Suhva cáhán Espíritu Santo. Jnáhan yó hebreo súcuan cuhni i tēe chíi sanchíi yáha ini ñuu Jerusalén, te nastúu i de nuū ñáyyuu sín nación, áchí de.

¹² Te jeē ní cajini sōho na jnúhun yáha te máá ná jíin táca tēe cácanđije cáyūcú ñuu Cesarea ni cacahān ndahú ná jíin Pablo jeē ma quihín de ñuu Jerusalén. ¹³ Yūcuán na te ni cahān Pablo:

¿Najehē cándahyū ni jíjnáhan ní, te cásáha ní jēe cucuíhyá ni ná? Chi sñá je íyó túhva ná jēe násūu máá jēe cónuhni ná ini ñuu Jerusalén, chi suni jeē vēsú na cúū na jēe siquí máá Jítóho yō Jesús, áchí de.

¹⁴ Te jeē tu ní cúu cuiti casícoo ná, yūcuán na te sa suhva ni cacahān ná:

Na cóo ndese cúní máá Jítóho yō nuu súcuan, áchí ná.

¹⁵ Yūcuan na te sáa te ni casátūhva ná, te cuangoo ná ñuu Jerusalén. ¹⁶ Te suni jecu tēe ñuu Cesarea jeē cácanđije cuangoo de jíin ná. Suni cuahān ñin tēe Chipre nání de Mnasón, te je ni cuu cuehē cuiyā candíje de. Te ná ni jinūcoo ná ñuu Jerusalén, te ni cacoyūcu ná vehe de.

Jeē ni jécondēhe Pablo Jacobo

¹⁷ Te nuū ni jínūcoo ná ñuu Jerusalén, te hermano cáyūcú ñuu ún yōhyo ni cacusiñi ni de jeē ni jínūcoo ná. ¹⁸ Te inga quivī un ní cajengoo ná jíjnáhan ná jíin

Pablo vehe Jacobo, te yūcuan ní candutútú táca tée jéhnū cándīso jníñu nuū ñáyuu cácañdije. ¹⁹ Te Pablo ni sáha de saludar tēe ún jijnáhan de. Yūcuán na te ni castūhún de ndihí jniñu ní sáha Yaā Dios ná ni nacani de jnūhun ya nuū ñáyuu tācá nación jeē tu cājini i jnūhun ya. ²⁰ Te ni cajini sōho de jnūhun yáha, te ni cacahān de jeē yóhoyo cújéhnū Yaā Dios. Te ni cacahān de jín Pablo:

Hermano, vijna te jíní ni náa cuehē mil jnáhan ñuu yō hebreo ni cacandije i Jesús, te cácahān nīhin i jeē cánuú squícu yó ley jeē ni jéhe ya nuū Moisés. ²¹ Te ni canihīn i jnūhun cácahān jeē stíví ní steén ni núū tāca jnáhan yó ñáyuu hebreo cáyūcu jícá i tāca gá nación, chí ni steén ni núū i jeē ma cuatáhú gá i nuū ley Moisés, ni ma sáha ga i circuncidar sēhe i, ni ma cuatáhú gá i tāca gá jeē tajnúní jenahán. ²² ¿Nde se sáha ní núu sūcuan? Chi cuni ñayuu un jēe ní ndee ní te cutútú cuehē i. ²³ Suhva sáha ní núu sūcuan. Yáha íyó cúūn tēe jeē ní cajejnūhun de ñin jeē squícu de nuū Yaā Dios. ²⁴ Cueva ní tēe yáha quíhīn ni jín de templo, te cuchi ní nasándoo ní máá ní jín de nuū yā, te cuaan ní jeē socó de nuū Yaā Dios jijnáhan de. Yūcuán na te cuu sāté de xinī de, te suu stēen jeē ní casquícu de ndihí jeē ní cajejnūhun de nuū yā. Yūcuán na te cuni ndihí ñayuu jeē tú ndaā tāca jnúhun ni cajini sōho i siquī ní, chí coto i jeē suni máá ní sa squícu ní ley yā. ²⁵ Te ñayuu tācá nación jeē násūu ñáyuu hebreo cácuu i te ni cacandije i ya, je ni catee ná carta cuahān nuū i jeē tu cánuú squícu i ley un, chí máá-ni jeē ma cāji i cūñu jeē ni sóco nuū ídolo ní niñí ni quití jeē jihí jeē tu jéti niñí tī, te ni ma cáca jnéni i, áchí de.

Jeē ní cajni de Pablo ini templo

²⁶ Yūcuán na te ni jeca Pablo tēe ún, te ñga quivī un ní cajichi de ni canasándoo de máá de nuū yā. Te ni quiví

Pablo ini templo ni cachi de nuū sutú na quiv̄i jínu jeē nasándoo tēe un máá de nuū yā, te quindecas de quiti jeē socó de nuū yā.

²⁷ Yūcuán na te cácuu de jeē sínu de ndihúxá quiv̄i jeē cándundoo de nuū yā, te sava jnánhan hebreo de jeē véjicoo Asia ni cajini de jeē íne Pablo ini templo, te ni cascáhan de ndihi ñayuu, te ni cajni i Pablo. ²⁸ Te ni cacana jee i:

Tēe ñuu yō Israel, cuāha núú ní ndaha jínánhan ní na jni yó téé yáha. Chi máá de cúu tēe jica cuu ní cáhnu stéén de nuū tāca ñáyuu, te cáhán de síquī nación yō jín síquī ley jeē ni jéhe ya nuū Moisés jín síquī templo yáha. Te suni je ni quiv̄icoo de jín jecu tēe griego ini templo i yāhá, te súcuan stívi de jnūhun i jeē cahán jeē ma cúu quiv̄i ñayuu ini templo te núu nasūu ñáyuu hebreo cúu i, áhí.

²⁹ Chi nde na íne Pablo ini ñuu un ní cajini tēe hebreo jeē jica de jín Trófimo, tēe ñuu Efeso jeē násūu hebreo cúu de, te cájeni ni de jeē ni quiv̄i tēe un jín Pablo ini templo.

³⁰ Te ndihi ñayuu ñuu un ní cuvaā, te ni cacutútú-ni i, te ni cajni i Pablo, te ni castáa i de ni quenehen i de ini templo un, te ni canacasi-ni i yéhyí. ³¹ Te ni cacuni i cahni i de núu. Te general, tēe cújéhnú nuū ndihi soldado, ni nihin de jnūhun jeē ndihi ñayuu ñuu Jerusalén ni candonda i cácuvaā i. ³² Te ni jeca general táca soldado jín capitán, te cájini de cuango de nde nuū cáhiin ñayuu cuehē ún. Te ná ni cajito ñayuu jeē ni jínūcōo general jín soldado, te ni cajecuiñi i jeē cácani i Pablo. ³³ Yūcuán na te ni quiv̄i general mēhñu ñáyuu, te ni jni de Pablo, te ni ndacu de jniñu jeē conuhni de jín úu cadena. Yūcuán na te ni cajnūhún general ndé téé cúu Pablo te na cuēchi ni sáha de. ³⁴ Te ni cacana ñayuu cuehē ún, sava i in jnūhun te sava ga i inga jnūhun, te tu ní cúu cuni de na cuēchi ni sáha Pablo, chí cácuvaā i. Te ni ndacu de jniñu cuahán Pablo nde cuartel. ³⁵ Te nuū ni jínū Pablo escalera cuartel

ún, te soldado ni cajniñ de Pablo cándiso de siquī jeē cáconi ñayuu ún jniñ i Pablo sáha xeēn i jíin de. ³⁶ Chi ndihi i vējicoo i ichi yátá soldado, te cácana jee i:

Cahni ni téē jíñá, achí i.

Jeē ni cáhān Pablo jehē maá de nuū ñáyuu

³⁷ Te cásquívī de Pablo ini cuartel nuú, te jíin jnúhun griego ni cáhān Pablo jíin general:

¿A cuáha ni jnúhun cáhān ná ñin jnúhun jíin ní? achí de.

Te ni cáhān general jíin de:

Te jíiní rō cahán rō yuhu griego jeē súcuan. ³⁸ Núu súcuan te nasūu róhó cúu tēe Egipto jeē jé ni cuu quivī ni ndonda siquī gobierno te ni quenehen cuūn mil tēe jéhni ndīyī cuangoo jíin de nde nuū ñúhun téhé, achí.

³⁹ Yūcuán na te ni cáhān Pablo:

Tuú, chi tēe hebreo cúu ná, te ni cacu ná ñuu Tarso, ñin ñuu jeē kujéñnu ndañúu Cilicia. Te quíñúhun ni ni cuáha ní jnúhun na cáhān na jíin ñáyuu yáha jíináhan i, achí de.

⁴⁰ Te general ni jēhe de jnúhun jeē cáhān de. Te ni jecondichi Pablo nuū escalera, te ni sáha de seña jíin ndaha de jeē na cúu nayúú ñáyuu ún. Te nuū ní cuu nayúú-ni i, te jíin jnúhun yuhu ñúu de hebreo ni cáhān de:

22

¹ Ndihi níhín jeē cácuu ní jnáhan ñuu yō jíin ndihi níhín jeē cácujeñnu ní núu ñúu yō, cuni sōho ní jnúhun cáhān na jehē maá ná, achí de.

² Te ni cajini sōho i jeē cáhān Pablo yuhu hebreo jeē cúu yuhu ñúu i, te víhyá gā ni cacunahín i. Te ni cáhān Pablo:

³ Máá ná cúu jnáhan ñuu yō hebreo, te ni cacu ná ini ñuu Tarso ndañúu Cilicia. Te ini ñuu Jerusalén yáha ní jehnu ná, te ni cutūhva ná núu Gamaliel, te ni steén de nuū ná ndihi siquī ley jeē ni jēhe ya nuū jíi yō. Te nde jíin ini jíin

ánua na ní nducú ndéyí ná squícu ná súcuan nuū Yaā Dios, nájnūhun cásaha máá ní vijna. ⁴ Te ni jito xeēn na ñáyuu cáčandíje i jnūhun Jesús te nde cuní na jéē na cúu ndihí i núú. Chi cúu tēe cúu ñahan ni jnií ná ni chuhun ná vecāa. ⁵ Te sutū kujéhnū ga jíín táca tēe jéhnū cándiso jniínu nuū ñúū yō, cácuu de testigo jeē súcuan ni sáha ná, te suni máá de ni cajēhe de tijni carta cuahān na jíín jéē cuáha na núū tāca jnáhan yó cáyūcú ñuu Damasco. Chi cuahān ná ñuu un jéē jnií ná ñáyuu cáčandíje i Jesús te quindecā ná i ñuu Jerusalén yāha, návāha ndoho i núú.

*Jeē ní cachi Pablo ndese ni sama ya de
(Hch. 9.1-19; 26.12-18)*

⁶ Te ni quihín ná ichi cuahān ná, te cuacuyajni ná ñuu Damasco, te nájnūhun caxū cúu. Te ichi ándiví ní quiji ñn nduva ní ndindēé ndaxín núū ná. ⁷ Te ni cotúú-ni ná núū ñūhun, te ni jini sōho ná ñn jnūhun cáhán jíín ná: Saulo, Saulo, ¿najehē jito xeēn rō ruhū? achí. ⁸ Yūcuán na te ni cahān ná: ¿Na nihín cúu jeē cahán, Tátā? achí ná. Te ni cahān yā jíín ná: Máá rí cúu Jesús jeē ní jehnu ñuu Nazaret, te jeē jito xeēn rō ñáyuu cáčandíje i ruhū cúu jeē jito xeēn rō ruhū, achí yá. ⁹ Te tēe cuangoo jíín ná ni cajini ndije de jeē ndindēé, te ni cayūhú de, te tu ní cájini sōho de ndese ni cahān yā jíín ná. ¹⁰ Yūcuán na te ni cahān ná: Tátā, ¿na vé cuní ni jéē sáha ná? achí ná. Te ni cahān maá Jítóho yō jíín ná: Ndocuññi te quihín rō ñuu Damasco, te yūcuan íyó ñn tēe jeē cachi nuū rō na vé cúu jeē cánuú sáha ró, achí yá jíín ná. ¹¹ Te jeē ní ndindēé un ní sacuaá núū ná, te tēe cuangoo jíín ná un ní cajnií de ndaha ná cuángoo de jíín ná ní jinūcoo ná ndé ñuu Damasco.

¹² Te yūcuan ní condee ñn tēe nání Ananías, te tāca jnáhan yó hebreo yūcuan cácahān jeē tēe vāha cúu Ananías, chi vāha squícu de ley jeē ni jéhe ya nuū Moisés.

¹³ Te ni quee tēe un nūū néne ná, te ni cahān de jíin ná: Hermano Saulo, na ndúndijin tinūu ní, achí de. Te ni ndundijin-ni tinūu ná, te ni jito ná nūū de. ¹⁴ Te ni cahān Ananías: Máá Yáā Dios tāca jíi yō, je ni nacāji ya nihín návāha cuni ní na vé cuní yā jeē sāha ní, te coto ní nūū maá Cristo, Yaā ndaā, te cuni sōho ni jnúhun jeē cahán yā. ¹⁵ Te nacani ní jnúhun ya nuū ndivii ñayuu tāca jēe ní jito ní jíin jēe ní jini sōho ní. ¹⁶ Ma cúhuun ni ni núu súcuan. Ndocuññí ní, te cuandute ní te cahān ndahú ní jíin máá Jítóho yō, návāha nacate ya anuá ni núu cuéchi, achí de jíin ná.

Jeē ní cachi Pablo ndese ni tají Yaā Dios de nuū ñayuu tāca gá nación

¹⁷ Te ni nandió cóo na ní ndee ná ñuu Jerusalén. Te jícán tahu na ini templo, te ni sāha máá Jítóho yō jeē ní jito ndijin ná. ¹⁸ Te ni jini na nūū yā ni cahān yā jíin ná: Yachī quenda ró ñuu Jerusalén yāhá, chi ma cuatáhú ñayuu yáha jēe nácani ró jnúhun ri nuū i, achí yá. ¹⁹ Te ni cahān na jíin yá: Tuú, chi cuatáhú i, Tátā, chi je cájini i jeē ni quíví ná ndijnahan vehe i sinagoga ni jni ná táca ñayuu cácadíje i nihín, te ni cani ná i, te ni chuhun ná i vecāa. ²⁰ Te je cájini i jeē quíví ní cajehni i Esteban, tēe ni nacani cáj jnúhun ní, suni ni indichi na yúcuan, te ni jejnúhún ná jeē na cúu de, chi ni condito ná sahma tēe ni cajehni Esteban, achí ná jíin yá. ²¹ Te ni cahān yā jíin ná: Cuáhán, chi máá rí tají rí rohó quíhñi jicá ró nde nuū ñayuu táca nación jeē tu cájini i jnúhun ri, achí yá jíin ná. Achí Pablo.

Jeē ni íne Pablo nuū general

²² Te tāca ñayuu ún vāha-ni ni cajini sōho i te nde jnúhun sandñhi yáha jēe ní tají yá de nuū ñayuu tāca gá nación. Yūcuán na te ni cacuvaā i, te ni cacahān jee i:

Na cúu tēe jíñá, chi tú vāha jeē cótecu gā de, áchí i.

²³ Te súcuan cácana jee i, te ni cascándoó i ticāchí i, te ni cascánda i ticachā. Te súcuan cástéén i jeē cáquiti xeēn ni i. ²⁴ Te ni ndacu general jniñu jeē na quívi Pablo ini cuartel, te ni cahān de jeē na stíchí soldado Pablo nde jíin cuarta ññi, návāha cujnúni ni general na siquī cúu jeē ní candonda ñayuu un síquī de. ²⁵ Te ni cajihni de Pablo návāha súcuan te caní de. Te ni cahān Pablo jíin capitán jeē índichi tūhva:

¿A jéhe ley jnūhun jeē caní ní cuarta tēe cúu sēhe nación Roma núu ná tu sándaā ní núu íyó cuéchi de? áchí de.

²⁶ Te ni jini sōho capitán jnūhun yáha, te ni jecahān jíin general:

Coto vāha ní jéē ma stívi ní sáha ní jíin tēe yáha, chi cúu de sēhe nación Roma, achí.

²⁷ Yūcuán na te ni jinū general nuū Pablo, te ni ca-jnūhún de:

Cachi núu jendaá cúu jeē séhe nación Roma cúu ró, áchí.

Te ni cahān Pablo:

Suu cúu ndije ná, áchí de.

²⁸ Te ni cahān general:

Ruhū chi nde jeē ni jéhe ri cuehē xūhún te ni nduu ri sēhe nación Roma, áchí.

Te ni cahān Pablo:

Te sãñá chi nde quivī ní cacu ná cúu ná séhe nación yō Roma, achí de.

²⁹ Yūcuán na te tāca tēe jeē cáconi caní Pablo nuú, ni cacujiyo-ni cuango, te suni nde general ni yūhú de, chi ni stívi de jeē ní jihni de Pablo, chi tu íyó váha sáha súcuan jíin séhe nación Roma.

Jeē ni índichi Pablo nuū junta cujéhnu ga jnáhan ñuu de hebreo

³⁰ Te inga quiv̄i un cúní general cundaā vāha ni de na siqūi cúu jeē ní candonda tēe hebreo siqūi Pablo. Te ni ndají de cadena jeē nuhní Pablo, te ni ndacu de jniñu ni cacutútú táca sūtū cácujuhnu jíin táca tée cásáha junta cujéhnu ga, te ni quenehen de Pablo, te ni jeni de nuū tée ni candutútú un.

23

¹ Yūcuán na te ni ndacoto Pablo nuū tée ni candutútú junta un, te ni cahān de:

Tátā jijnáhan ní, ní ndé vijna vāha íyó ni anuá na jēe tú na cuēchi ná, jíto jínuū Yaā Dios, áchí de.

² Yūcuán na te Ananías, sutū cujéhnu ga, ni cahān jíin tée cáhiin yajni nuū de jeē na cátu maá yuhu de. ³ Te ni cahān Pablo jíin sūtū cujéhnu ga ún:

Yaā Dios stóho ya nihín chi tēe stáhú-ni cúu ní, chi néne ní jēe sándaā ni núu ni stívi ná ley yā, ¿te naun stívi máá ní ley jeē ndácu ní jniñu jeē cáni de sãñá? áchí de.

⁴ Te ni cacahān tēe cáhiin nuū de ún:

¿Naun cáhán rō súcuan jíin sūtū cujéhnu ga? Chi nuū Yaā Dios jejniñu de, áchí jíin de.

⁵ Te ni cahān Pablo:

Tátā jijnáhan ní, tu ní jíiní na jēe sutú cujéhnu ga cúu de, chi núu ní jíiní na te ma cahān na súcuan núu, chi yósó núu tútu iī jeē ni cáhán yā jeē ma cahān neé yó coto yó táca tée cácujuhnu nuū yō, áchí Pablo.

⁶ Te nuū ní jini Pablo jeē sava de cácuu grupo saduceo te sava ga de cácuu grupo fariseo, te ni cahān jee de:

Tátā jijnáhan ní, máá ná cúu iin jnáhan grupo fariseo, te suni súcuan ni iyo tátá na. Chi suni máá ná ñúhun ni na jēe nastécu yā ndīyi, te siqūi yúcuan cúu jeē cacahān ni cuéchi siqūi ná, áchí de.

⁷ Te jeē súcuan ni cahān de te ni cacusñin ni tēe junta jeē cácuu grupo fariseo jíin grupo saduceo, te ni cacahān nihin. ⁸ Chi cacahān tēe grupo saduceo jeē ma nátecu ndīyi, ni tu cáhiyo ndajéhé yā ni ánuá, te tēe grupo fariseo cájejnúhún de ndinúní jnúhun yáha. ⁹ Te yōhyo ni cuvaā. Te sava tēe cástéén jnúhun cáhán tutu ley yā jeē cácuu jnáhan grupo fariseo, ni candocuiñī de, te ni cacahān de:

Tú ni ñin cuēchi cánihin na síquī tēe yáha. Sanaa te ni cahān ndije ñin ánuá jíin de chí ñin ndajéhé yā. Ma sáníhni ni yō nuū Yaā Dios nuu súcuan, áchí.

¹⁰ Te yōhyo ni catejnéhan, te yúhú general jeē quende i chiyō Pablo, te ni ndacu de jniñu jeē na quívī soldado te quenehen de Pablo sava mēhñú i, te na ndívi de ini cuartel.

¹¹ Te jecuáā un ní quee-ni máá Jítóho yō nuū de, te ni cahān yā jíin de:

Pablo, cuandeyí ni rō, chi nájnūhun ni nacani ró jnúhun ri ini ñuu Jerusalén yāhá, suni súcuan nacani nahín ró jnúhun ri ini ñuu Roma, achí yá.

Jeē ní casquijnáhan jnúhun cahni Pablo

¹² Te nuū ní cundijin te ni cacutútú sava ñayuu hebreo, te ni casquijnáhan jnúhun, te ni cacahān teyí i jeē ma cáji cuítī i ni ñin ni ma cóho cuítī i nde núu tu cahni i Pablo. ¹³ Te víhyá gā uū xico tēe hebreo ni cacahān teyí jnúhun yáha. ¹⁴ Te ni jengoo nuū sutú cácujuhnu jíin núu tēe jéhu cándiso jniñu nuū ñayuu hebreo, te ni cacahān jíin tēe ún:

Ni cacahān teyí ná jeē ma cáji cuítī ná ni ñin níní nde ná tu cahni na Pablo. ¹⁵ Núu súcuan te máá ní jijnáhan ní jíin táca gā tēe cásáha junta cujéhu ga, cuacáhān ni jíin general jeē quenehen de Pablo na jéé de nuū junta sajnē, chi cachi ni jéé cácuuni ni stíchí vāha ga ní de. Te máá ná

jijnáhan ná cotūhva ná cahni ná de nde ná tu quee de nuū cáhiin tūtú ní, achí.

¹⁶ Te sēhe yí cuáha Pablo ni nihīn i jnūhun jeē súcuan ni cacahān, te ni jehēn i cuartel, te ni castūhún i nuū Pablo.

¹⁷ Te ni cana Pablo xinī ĩn jnáhan capitán, te ni cahān de:

Condeca ní súchi yáha quhīn ni jíin i nuū general, chi íyó ĩn jnūhun castūhún i nuū de, achí de.

¹⁸ Te capitán un ní jeca de i cuahān i jíin de nuū general, te ni cahān de:

Pablo, tēe íne vecāa, ni cana de sāná, te ni cahān de jíin ná jeē quíndeca ná súchi yáha núū ní, chi íyó ĩn jnūhun cahān i jíin ní, achí de.

¹⁹ Te ni jniĩ general ndaha i cuahān de jíin i ĩn lado, te yuhu-ni ni cajnūhún de i:

Na jnūhun cúní rō cahān rō jíin rí, achí de.

²⁰ Te ni cahān i:

Tēe hebreo ni casquíjnáhan jnūhun de jeē cahān ndahú de jíin ní quenehen ní Pablo sajnē quihīn de nuū tāca tēe cásaha junta cujéhnu ga, chi cahān-ni de jíin ní jeē cācuni de jeē stichí vāha ga de Pablo. ²¹ Te ma cuáha ni jnúhun, chi víhyá gā uū xico de cándētu sāhí de ichi, te ni cacahān teyí de jeē ma cáji cuiti de ni ĩn ni ma cóho cuiti de nde núu tú cahni de Pablo, te vijna je cándētu tūhva de jeē cuáha ni jnúhun quihīn Pablo nuū junta, achí i.

²² Te ni cahān general jíin i jeē ma cáchi i nuū ní ĩn ñayuu jeē ni cáhān i jnūhun yáha jíin de, te ni tají de i cuanuhun i.

Jeē ní tají general Pablo cuahān de nuū Félix, tēe cúu gobernador

²³ Yūcuán na te ni cana general uū capitán de, te ni ndacu de jniñu jeē sátūhva de uū ciento soldado cájica jéhé jíin únī xico uxī jeē cáyōsó caballo jíin úu ciento jeē cándāha lanza, chi cahīn jecuāā ún quendacoo de jíin

Pablo quingoo de nde ñuu Cesarea. ²⁴ Te suni ni ndacu de jniñu jeē coo tūhva caballo jeē cóso Pablo, te condito vāha soldado un Pablo quingoo de nde nuū Félix, tēe cúu gobernador. ²⁵ Te ni tee de ñin carta jeē cahán jnūhun yáha:

²⁶ Máá ná cúu Claudio Lisias, te tēe ná carta yáha cuájeē nuū ní, señor Félix, gobernador kujéhu. Ndese tahū cúu ní. ²⁷ Ñayuu hebreo ni cajniñ i tēe yáha, te je yajni cahni i de núú, te ni jnama ná de jíin soldado, chi ni jini na jēe séhe nación Roma cúu de. ²⁸ Te ni jendeca ná de nuū junta maá i jíinánhan i jeē sándaā i núu na cuēchi ni sáha de. ²⁹ Te ni jini na jēe siquí ley maá i cúu cuēchi cácahān i siquí de, te tu níhín na ni ñin cuēchi siquí de jeē cúu de ni jeē cóne de vecāa. ³⁰ Te ni nihín na jnūhun jeē sava tēe hebreo ni casquínánhan jnūhun de jeē cahni de tēe yáha, te jeē yúcuan cúu jeē yachī ni tají ná de cuajeē de nuū ní. Te suni je ni cahān na jíin ñáyuu cájicān cuēchi siquí de jecoo i nuū ní, te jiñā cahān i jíin ní na cuēchi ni sáha de. Je ni cahān yō, achí carta.

³¹ Te ni cajeca ñuú-ni soldado Pablo cuangoo jíin de nde ñuu Antípatris, nájñūhun ni tahū jniñu nuū de. ³² Te ñnga quivī ni canandió cóo-ni soldado cájica jéhé cuánungoo nde cuartel, te soldado cáyōsó caballo cuangoo de jíin Pablo. ³³ Te ni jinūcoo ñuu Cesarea, te ni cachihí carta ndaha gobernador, te suni ni cajeni Pablo nuū de. ³⁴ Te ni cahu gobernador carta un. Te ni cajñūhún de ndé ñuu cúu Pablo, te ni jini de jeē tēe ndañúu Cilicia cúu Pablo. ³⁵ Te ni cahān de:

Nde na quécoo tēe cájequin cuēchi siquí rō te cuni nahín rí jnūhun cahān rō, áchí de.

Te ni cahān de jeē na quíndihyū Pablo ini palacio ndīyi Herodes.

Jeē ni cáhān Pablo jehē maá de nuū Félix

24

¹ Te nuū uhún quiv̄i te Ananías, sutū cujéhnu ga, ni quee de ñuu ún. Te suni ni quecoo sava tēe jéhnu cándiso jníñu nuū jnáhan ñuu de hebreo jíin ñn tēe cúu abogado, nání de Tértulo. Te ni quiv̄icoo de nuū gobernador jeē cahān de cuēchi siqūi Pablo. ² Te ni cana gobernador Pablo ni quee de. Te ni quejéé Tértulo cahān de cuēchi siqūi Pablo, chi suhva ni cahān de jíin Félix:

Tátā gobernador, siqūi jeē cúu ní tóhō jeē váha ndíchí ndácu ní jniñu, te jeē yúcuan tú na jnūhun cájejnáhan iyó, chi cáyūcu váha yó. ³ Te na cútahū ná, chi tāca quiv̄i váha cúu tāca núū ndácu ní jniñu jeē váha sáha ní, tátā Félix. ⁴ Te tu cúní na snāā na cuéhē tiempo ni, te cáhán ndahú ná jíin ní cuni nahín ní jecu-ni jnūhun cahān na jíin ní. ⁵ Chi ni cajini na tēe yáha jēe cúu de ñn tēe tíxín, te sáha de jeē cánacuajnáhan máá jnáhan ñuu ná hebreo ní cáhnu-ni tāca lado, te cúu de tēe cújéhnu nuū ñáyuu cascuáha jnūhun tēe nání Jesús jeē ní jehnu ñuu Nazaret. ⁶ Te suni je ndúcú de jeē stívi de tācá jniñu ini templo iī, te ni cajniñ ná de. Te cácuni na sándaā na síqūi de núú, nájnūhun cáhán ley ñuu ná. ⁷ Te ni jinū-ni general Lisias, te ni quende fuerza de tēe yáha núū na jíjnáhan ná. ⁸ Te ni ndacu de jniñu jeē tāca ná jeē cácahān na cuéchi siqūi tēe yáha quijicoo ná ndé nuū ní. Te vijna cuu stíchí maá ní de, te jíin jnúhun cahān maá de te cuni ni jēe ni sáha de cuēchi jeē cácahān na jíin ní, áchí Tértulo.

⁹ Te suni ni cacahān tēe hebreo jeē ni jínūcoo jíin de jeē iyó ndāā jeē súcuan cúu cuēchi Pablo. ¹⁰ Yūcuán na te ni sáha gobernador seña nuū Pablo jeē na cáhán de, te ni cahān Pablo:

Je jíiní na jēe cuehē cuiyā cúu ní gobernador ñuu yáha, te jeē yúcuan nújnahan ni na jēe sándaā ni síqūi ná. ¹¹ Chi máá ní cuu nanducú ní te cuni ni jēe sáá máá úxī uū quiv̄i

ni cuu jeē ni jéhēn ná ñuu Jerusalén jeē chiñúhún ná Yaā Dios. ¹² Te tu ní stáhān jnáhan ná jín ni ññ ñayuu, ni tu ní stóna ná ñáyuu ini templo ni ini vehe ññ sinagoga ni ini maá ñuu. ¹³ Ni tú na jín stéén de jeē iyó ndāā jnūhun cácahān de siquī ná. ¹⁴ Te jnūhun cáhān cají ná jín ní cúu jeē chiñúhún ná Yaā Dios tāca jíí na, te suu cúu jeē chiñúhún ná maá Jesucristo, te máá jnūhun yáha-ni cúu jeē cácahān de jeē stívi ná. Te cándíje ná tāca jnūhun yósó núū tútu ley yā jín núū tútu jeē ní catee tēe ni canacani jnūhun ya nde jenahán. ¹⁵ Te ñnuú ññhun ni na jín de jeē sáha Yaā Dios jeē nátecu tāca ndíyi, cúu ñayuu ní casáha vāha jín ñáyuu ní casáha néé. ¹⁶ Te jeē yúcuan máni jeē váha ndíhvi ni na sáha ná. Súcuan te vāha íyó ni anuá na jéé tú na cuēchi ndéé siquī na núū Yaā Dios ni nuū ñáyuu.

¹⁷ Te ni jica cuu ná tāca ñuu jicá jecu cuiyā, te sáa te ni ndee na jín xúhun jéé ní cajēhe tāca ñáyuu jeē chindéé ññhán i jnáhan ñuu na cáyucú Jerusalén. Te suni ni ndee na jéé socó na quití nuū Yaā Dios. ¹⁸ Te íne ná ini templo siquī jeē cuchi ná ndundoo ná núū Yaā Dios te socó ná. Te jecu jnáhan ñuu ná hebreo jeē véjicoo Asia ni cajito de sãñá ini templo, te tú na ñayuu cuehē ni cóyucu jín ná jeē sávaā i. ¹⁹ Te núu ni stívi ná ¿te naun tu ní quíjicoo tēe Asia un návāha suni cahān de ndese ni stívi ná? ²⁰ Chí tēe ní quecoo yāhá na cáhān maá de núu na cuēchi ni canihín de siquī na ná ni indichi na núū junta tēe cácujuhnu ini ñuu ná. ²¹ ¿Te chí cájequin de cuēchi siquī na jéé ni cáhān jee ná suhva ná ni ñyo ná nuū junta naún? Chi ni achi na jéé cándíje ná jéé nátecu tāca ndíyi, te jeē yúcuan cájequin ni cuēchi siquī ná, ni achi na jín de. Achí Pablo.

²² Te Félix chi je jíní vāha de ndese cácañdíje ñayuu Cristo. Te jeē ní jini sōho de jnūhun yáha te ni stétu de un jínjáhan, te ni cahān de:

Nde na quée general Lisias te cajnūhun gá rī siquī jniñu yáha, áchí de.

²³ Te ni ndacu de jniñu nuū capitán jeē na cóne ga Pablo vecāa, te ma cási jeē sáha de jeē cuní de, te ni ma cási jeē quíjicoo jnáhan de jeē chindée ñáhán i de.

²⁴ Te ni cuu jecu quivī, te ni quiji tucu Félix jíin ñasihí de Drusila, te ñahan hebrea cúu ña. Te ni ndacu de jniñu jeē na quíji Pablo návāha nacani de jnūhun ndese candíje yó Jesucristo. ²⁵ Te ni cahān Pablo jíin de jeē cánuú sáha yó jniñu ndaā, te cánuú coto yó máa yó jeē ma sáha yó jniñu stívi, chi quivī sándihí te sándaā Yaā Dios jniñu ndivii ñayuu ndese ni casáha i. Te ni yūhu Félix te ni cahān de:

Vijna te cuáhán, te inga quivī jeē núne ri te cana ri rohó quiji ró, áchí de.

²⁶ Te ñūhun ni de jeē cuāha Pablo xūhun núū de te siáa de quenda de vecāa. Jeē yúcuan tǐjni jínu ni cana de Pablo ni candajnūhún de. ²⁷ Te súcuan ni cuu uū cuiyā, te sáa te ni nucuiñī Porcio Festo nuū Félix. Te cúní Félix jeē na cúsiñi ni ñayuu hebreo jíin de, te jeē yúcuan ní squéndōo de Pablo vecāa.

Jeē ni índichi Pablo nuū Festo

25

¹ Te sáa únī quivī jeē ni quívi Festo cuu de gobernador Judea, te ni quenda de ñuu Cesarea cuahān de ñuu Jerusalén. ² Te tāca sūtū cácujeñnu jíin tée cácujeñnu nuū ñáyuu hebreo ni jinūcoo nuū Festo, te ni cajicān cuēchi siquī Pablo. ³ Te ni cacahān ndahú jíin Festo jeē núu vāha ni de te na nátají de Pablo ndiji ñuu Jerusalén. Súcuan ni cacahān, chi je ni casquíjnáhan jnūhun jeē cahni Pablo ichi. ⁴ Te ni cahān Festo jeē yíndesi vāha Pablo nde ñuu Cesarea, te je jéni ni de jeē jecu na quivī te nuhūn maá de ñuu Cesarea. ⁵ Te jeē yúcuan ní cahān de jíin táca tée ún:

Tāca níhín jeē cándiso jníñu, na quíngoo yó nde Cesarea, te yūcuan cácan ni cuēchi siquī de te núu íyó cuēchi de, áchí de.

⁶ Te ni ine de yūcuan únā chí úxī-ni quivī, te ni ndee de ñuu Cesarea, te inga quivī ni cucōo de mesa nuū sándaā de jniñu, te ni cahān de jeē na quíji Pablo. ⁷ Te je cáhiin tēe hebreo jeē ní quijicoo nde ñuu Jerusalén. Te ni quee Pablo, te ni cajicó ndūū nuū de, te ni caquejée-ni cásájnúhún téyí síquī de, te tú na jíin ní cástéén jeē iyó ndāā jnūhun cácahān. ⁸ Te ni cahān Pablo jehē maá de:

Tu ní sáha ná ni ññ cuēchi siquī ley ñuu na jéē cácuu ná ñayuu hebreo, ni siquī templo, ni siquī rey nación Roma, achí de.

⁹ Te Festo chi cúní de jeē cusī ni ñayuu hebreo jíin de, te ni cajnūhún de Pablo:

¿A tu cúní rō quínuhun rō Jerusalén te yūcuan sándaā rī síquī rō? achí de.

¹⁰ Te ni cahān Pablo:

Je índichi na núu cúndaā jniñu jeē ndácu máá tēe cúu rey nación Roma, te yāha cúu nuū cánuú cundaā jniñu ná. Máá ní je jíin vāha ni jéē tú na cuēchi ní sáha ná síquī tāca jnáhan ñuu ná hebreo. ¹¹ Chi núu ni sáha ná ññ cuēchi xeēn jeē jíin ñúhún cuu ná, te íyó váha jeē cúu na núu súcuan. Te núu tu íyó ndāā jnūhun jeē casájnúhún tēe yáha síquī ná, te ni ññ tēe ma cúu chihi de sāñá ndaha tēe yáha jíjnáhan de. Núu súcuan te cúní na quíhīn na núu maá rey nación Roma sándaā de síquī na, áchí de.

¹² Te ni cajnūhun Festo ndese cájeni ni tēe cándiso jníñu jíin de. Yūcuán na te ni cahān de jíin Pablo:

Je ni cahān rō jeē cuní rō quihīn rō nuū maá rey nación Roma sándaā de síquī rō. Núu súcuan te quihīn nahín ró nuū de, áchí de.

Jeē ni índichi Pablo nuū rey Agripa

¹³ Te ni cuu jecu quivī, te rey Agripa jíin Berenice ni jecondēhé de Festo nde ñuu Cesarea. ¹⁴ Te tijni quivī ni coyūcú de yūcuán. Te ni nacani Festo jnūhun siquī Pablo nuū rey un. Te suhva ni cahān de:

Félix jeē ní cuu de gobernador, ni stóo de ñin tēe íne vecāa yāhá. ¹⁵ Te ná ni jehēn ná ñuu Jerusalén, te sutū cácujuhnu jíin ñáyuu jéhnú cándiso jníñu nuū ñáyuu hebreo ni jinūcoo i nuū na cájequin i cuēchi siquī tēe ún, te cácuñi i jeē na cúu de. ¹⁶ Te ni cahān na jíin i jeē tu íyó costumbre tāca tóhō Roma jeē cahni de ñin tēe súcuān-ni, chi jíni ñúhún condichi de jíin ñáyuu cájequin cuēchi siquī de, návāha cahān de jehē maá de te cundaā núu íyó cuēchi de. ¹⁷ Yūcuán na te ni quecoo tútú i yāhá. Te ñnga quivī ún tu ní cúcuéé ná, chi ni cucōo na mesa nuū sándaā na siquī cuēchi, te ni ndacu ná jniñu jeē na quíji tēe ún. ¹⁸ Te cáhiin ñayuu cájequin cuēchi siquī de. Te ni jeni ni na jēe iyó cuēchi xeēn cahān de siquī tēe un núu, te tú cuiti. ¹⁹ Chi jeē cácahān de cúu máni siquī jnūhun cácañdije-ni máa de, jíin siquī ñin tēe nání Jesús jeē jé ni jihī de, te Pablo cahān nīhin de jeē ní natecu ndije tēe ún. ²⁰ Te tu ní cújnúní cuiti ni ná ndese sándaā ná, te ni cajnūhun ná de núu cúní de quihīn de ñuu Jerusalén te yūcuán cundaā siquī de. ²¹ Te máa Pablo ni cahān de jeē cúní de quihīn de nuū Augusto, rey yō nación Roma, te yūcuān sándaā rey cuēchi de, ni achi de. Te ni cahān na jēe na cóne de vecāa nde tají ná de quihīn de nuū rey un, áchí Festo.

²² Yūcuán na te ni cahān Agripa jíin Festo:

Suni cúní maá ná cuni sōho ná jēe cahān tēe un, áchí de.

Te ni cahān Festo:

Sajnē te cuni sōho ní jēe cahān de núu súcuān, áchí de.

²³ Te ñnga quivī un ní quecoo Agripa jíin Berenice. Te cáñūhun de sahma cújéhnú de, ni quivīcoo de ini vehe

juzgado jíin táca general jíin téé cácujuhnu ini ñuu ún. Te ni ndacu Festo jniñu jeē na quíji Pablo. ²⁴ Te ni cahān Festo:

Cáhán na jíin ní, tátā rey Agripa, jíin ndihi níhín jēé cáyūcu jíin yó yāhá vijna. Yāha cúu tēe jeē síquī de ni candonda ndivii jnāhan de hebreo ñuu Jerusalén jíin ndé ñuu Cesarea yāhá, te máni cácahān i jeē tú vāha jeē cótecu gā de. ²⁵ Te jéni ni maá ná jēé tú na cuēchi xeēn ni sáha de jeē cúu de. Te je ni cahān de jeē cuní de quihīn de nuū rey Augusto jeē sándaā rey un síquī de, te jeē yúcuan ní cahān na jēé tají ná de quihīn de nuū rey un. ²⁶ Te tu cúcāhnu ni ná na jnūhun tee ná núu tútu quihīn jíin de nuū rey yō. Jeē yúcuan ní ndacu ná jniñu ni quee de nuū yō jijnāhan yó, te cánuú gá nuū maá ní, tátā rey Agripa. Te stíchí ni de návāha nihīn na jnūhun tee ná síquī de, te quihīn jnūhun un jíin de nuū rey. ²⁷ Chi tu jéjníñu cuítí jeē tají ná ĩn preso quihīn te núu tú castūhun ná nuū tútu na cuēchi ni sáha de, áchí Festo.

Jeē ni cáhān Pablo jehē maá de nuū rey Agripa

26

¹ Yūcuán na te ni cahān rey Agripa jíin Pablo:

Vijna te jéhe ri jnūhun cahān rō jehē maá ró, achí de.

Te Pablo ni sáha de ndaha de jeē ní quejéé de cáhán de, te suhva ni cahān de:

² Tátā rey Agripa, cúsiñ ní ná vijna jeē cúu cahān na jíin ní síquī ndihi jeē casájnúhún ñáyuu ñuu yō hebreo síquī ná. ³ Chi je jíiní vāha máá ní tāca jéé ní tajnúiní ñayuu ñuu yō hebreo jíin táca jnūhun jeē tu cáhiin inuú i jíin. Jeē yúcuan cáhán ndahú ná jíin ní jeē coo paciencia ni cuni sōho ní jnūhun cahān na jíin ní.

Jeē ní cachi Pablo ndese ni sáha de nde ná tu sama ya ini de

⁴ Je cájini tāca jnáhan ñuu yō hebreo ndese ni sāha ná ini ñuu nuū ní cacu ná jíin ini ñuu Jerusalén nde ná lulí ná. ⁵ Te núu cácumí maá de cahān ndaā de, te je cájini de sāña jéē ndé lulí ná ni quīvi ná nuū grupo fariseo, te grupo un nihin ga cánducú ndéyí de squícu de ley yā vēsú tāca gá grupo tēe nación yō. ⁶ Te ñúhun ni na jnúhun ni jejnūhun Yaā Dios nuū tāca jíi yō jeē nastécu yā ndīyi, te máá síquī tāca jnúhun yáha-ni cúu jeē cájequin de cuēchi síquī ná. ⁷ Chi máá yó jeē cácuu yó jnáhan ndihúxí uū yucūn ñayuu Israel, cáñūhun ni yō jnūhun ni jejnūhun ya jeē nastécu yā ndīyi, te jeē yúcuan nduú ñuú cáchiñúhún yó Yaā Dios te cájejníñu yó núu yā. Te suni súcuan ñúhun ni maá ná, tátā rey Agripa, te síquī jeē nácani ná jnúhun jeē natecu ndīyi cúu jeē cájicān jnáhan ñuu yō hebreo cuēchi síquī ná. ⁸ ¿Te chí má nastécu Yaā Dios tāca ndīyi cájени ni ní naún?

Jeē ní cachi Pablo ndese ni jito xeēn de ñayuu cácadíje

⁹ Te máá ná chi ni jeni ni na jéē jíni ñúhún ndonda ná síquī ñayuu cácadíje i Jesús, Yaā ní jehnu ñuu Nazaret. ¹⁰ Te súcuan ni sāha ná ini ñuu Jerusalén, chi tāca sūtū cácujuhnu ni cajēhe de jnūhun jeē cóndiso jníñu ná chuhun ná cuéhē ñayuu vecāa síquī jeē cácadíje i Jesús, te íyó váha ni na núu cájehni de i. ¹¹ Te tíjni jínu ni sāha ndevāha na jíin i ini tācá vehe īi sinagoga jeē ni sāha fuerza na i jeē na stóo i jnūhun cácadíje i. Te xeēn ni quitī ni na núu i, chi nde ñuu jicá ní jehēn ná ni sāha xeēn na jíin i.

Jeē ní cachi tucu Pablo ndese ni sama ya ini de

(Hch. 9.1-19; 22.6-16)

¹² Te sūtū cácujuhnu ni cajēhe de jnūhun jeē cóndiso jníñu ná quíhīn na sāha xeēn na jíin ñáyuu cácadíje cáyūcú ñuu Damasco nuú. ¹³ Te cuahān ná ichi ún, tátā rey, te caxū cúu, te ichi ándiví ní quiji ñn nduva ni ndindéé

ndaxín núū na jíín núū téé cuangoo jíín ná, te víhyá gā ndíí vēsú niāndii. ¹⁴ Te ndíhi ná ní cacotúú ná nuū ññuhun. Te ni jini sōho ná ññ jñuhun ni cahān jíín ná jíín jñuhun yuhu yó hebreo: Saulo, Saulo, ¿najehe jíto xeēn rō ruhū? Chi jeē sáha ró súcuan cúu nájñuhun stiquí jeē tu jéndije tí, te jéñú yatá tí xiní pulla, te súcuan stóho tí maá tí, áchí. ¹⁵ Yūcuán na te ni cahān ná: ¿Na nihín cúu jeē cahán, Tátā? achí ná. Te máá Jítóho na ní cahān yā jíín ná: Máá rí cúu Jesús, te jeē jíto xeēn rō ñayuu cácan díje i ruhū cúu jeē jíto xeēn rō ruhū. ¹⁶ Ndonga condichi rō, chi vēji ri nuū rō jeē tejníñu ri rohó sáha ró jniñu cúní rí, te nacani cáj rí ró jñuhun tāca jéē ní jito ró vijna, jíín jéē steén gā rí nuū rō tāca quívī quíji. ¹⁷ Te jnama ri rohó núū tāca jnáhan ñuu rō jíín núū ñáyuu tāca gá nación, chi nuū ñáyuu un tájí rí rohó quíhīn rō. ¹⁸ Te tájí rí rohó quíhīn rō nuū i, chi nájñuhun nanune ró tñnúú i cúu jeē steén rō jñuhun ri nuū i te jecūhun ni i. Chi ñayuu ná tu candíje i ruhū, nájñuhun cájica i nuū néē. Te jeē candíje i ruhū, quívī i nuū luz rí, te tuá quíhi i chíji jniñu jeē cuní jexeén jeē cúu Satanás, chi sa suhva quíhi i chíji jniñu cúní maá rí. Te tájí rí rohó quíhīn rō nuū i, návāha candíje i ruhū te cone cáhnu ni rí nuū cuéchi i. Yūcuán na te inuú níhīn tahu i jíín táca gá ñayuu jeē ni sándoo ri anuá i, áchí yá jíín ná.

Jeē ní cachi Pablo ndese ni jetáhú de jñuhun ni cahān yā

¹⁹ Jeē yúcuán tu ní sáníhni ni na núū jñuhun ni cahān yā ichi ándiví jíín ná, tátā rey Agripa. ²⁰ Chi ni jetáhú ná, te ni nacani ná jñuhun ya xíhna gā nuū ñáyuu ñuu Damasco, te sáá te ni nacani ná jñuhun ya nuū ñáyuu ñuu Jerusalén jíín ní región Judea jíín núū ñáyuu tāca gá nación. Te jñuhun ni nacani ná núū i cúu jeē na nácani ni i jeē stóo i cuéchi i te nasāma ini i sáha Yaā Dios, te na sáha i jniñu váha jeē steén jeē ní nasāma ini i. ²¹ Te siquí jeē súcuan ni

nacani ná jnúhun te ni cajniñ jnáhan ñuu yō hebreo sāñá ini templo, te ni cacuni i cahni i sāña núú. ²² Te ni chindéé ñáhán Yáa Dios sāñá, te jeē yúcuan índichi ñihin na ndé vijna nácani cájǵ ná jnúhun ya nuū ñáyuu cácujeñnu jíin núú tācá-ni ñayuu. Chi tu chíso gá na jnúhun siquī jnúhun jeē ní nacani Moisés jíin táca gá tēe ni canacani jnúhun Yaā Dios nde jenahán. ²³ Te ni cundaā jnúhun ni canacani de un jēē cánuú ndoho Cristo nde cuu yā, te xihna gā maá yá natecu vēsú tāca gá ndīyi, te súcuan stēén cajǵ yá nuū ñáyuu jeē jnáma ya i, cúu ñayuu nación yō Israel jíin ñáyuu tāca gá nación, áchí Pablo.

Jeē ní nducú ndéyǵ Pablo scandíje de Agripa jnúhun Jesús

²⁴ Te súcuan ni cahān Pablo jehē maá de, te ni cahān jee Festo:

Ni nduloco rō, Pablo. Siquī jeē ni scuáha ndasǵ ró te jeē yúcuan ní tǵvi xínī rō, áchí de.

²⁵ Te ni cahān Pablo:

Tu ní tǵvi xínī na, tátā Festo, chi sa suhva íyó cájǵ ndāā jnúhun cáhán na. ²⁶ Te máá rey Agripa je jíiní vāha de tācá jniñu ní íyo jeē ní nacani ná, te tu yúhú ná cahān na táca jnúhun yáha, chi je jíiní vāha na jēē jiní de tāca jnúhun yáha, chi tú sāhi ní cúu tācá jniñu yáha. ²⁷ Tátā rey Agripa, ¿á cándíje ní jnúhun jeē ní cacahān tēe ni canacani jnúhun ya nde jenahán? Jéni ni na jēē cándíje ní, áchí Pablo.

²⁸ Yūcuán na te ni cahān Agripa jíin Pablo:

Va jéni ni rō jeē jíin jecu jnúhun ni cahān rō te sāha ró jeē cándíje ri Cristo, achí de.

²⁹ Te ni cahān Pablo:

Vēsú jíin jecu-ni jnúhun chí jíin cuéhē, te jícán tahu na jēē maá ní jíin táca gá tēe cájini sōho jnúhun cáhán na vijna, na cándíje ní nájnūhun cándíje máá ná, te tu cúni na jēē cónuhni ni nájnūhun núhni na.

³⁰ Te ni ndihi ni cahān Pablo tāca jnūhun yáha. Te ni ndocuiñī rey jíin gobernador jíin Berenice jíin táca gá tēe cácujuhnu cáyūcu jíin de. ³¹ Te ni cacujiyo de, te ni candajnuhun sīn máá de:

Tú ni ĩn cuēchi ní sáha tēe yáha jēe cúu de ni jēe cóne ga de vecāa.

³² Te ni cahān Agripa jíin Festo:

Cuu siáá ni tēe yáha núu jēe tu ní cáhán maá de jēe quihín de nde nuū rey yō nación Roma nuú, áchí de.

Jeē ní catajǐ de Pablo cuahān de ñuu Roma

27

¹ Te ni cundaā jēe quihín Pablo jíin barco nde Italia, te suni quingoo ná jíin de. Te Pablo jíin sava ga tēe cáhiin vecāa ni quivicoo de ndaha ĩn capitán naní Julio jēe quíndēca de tēe un ndé Italia. Te Julio cúu ĩn jnáhan grupo soldado naní Augusto. ² Te nde ñuu Adramitio nuū cájecuiñī barco ni quenda ĩn barco ni quee, te ni quivicoo ná, te quihín barco un táca ñuu jēe yíhi chíji Asia jēe yúcu yumar. Te suni cuahān Aristarco jíin ná, te máá de cúu tēe ñuu Tesalónica región Macedonia. ³ Te inga quivī ni jinūcoo ná ñuu Sidón nuū cájecuiñī barco. Te Julio ni cundáhú ni de Pablo, te ni jēhe de jnūhun ni jecondēhe Pablo tācá amigo de, te ni cachindéé ñáhán i de. ⁴ Te ñuu yúcuán ní quenda barco cuahān jíin ná. Te siquī jēe níhin yíhi tachī te tu ní cúu quihín yohó barco, te ni tee xíin barco cuahān jíin ná xiin isla Chipre, ñuhun jēe íne sīn nuū ndúte, te lado jecó barco ni quendōo Chipre. ⁵ Te ni cayāha ná yumar Cilicia jíin Panfilia cuahān ná, te ni jinūcoo ná ñuu Mira ndañúu Licia.

⁶ Te ñuu yúcuán ní nihín capitán ĩn barco jēe véji ñuu Alejandría te quihín ichi Italia, te ni cahān de jíin ná ni quivicoo ná barco un. ⁷ Te cuehē quivī ni cahíin na núu

ndúte jíin barco, chi cuéé ní jica, te fuerza-ni ni jinūcoo ná yuñúū Gnido. Te tuá ni jéhe tachī un jnúhun quihīn yohó barco, te ni cayāha ná núū jnúhma tachī xiin ñúū Salmón jeē íne nuū isla Creta. ⁸ Te yōhyo ni canducú ndéyí tée cáscáca barco un, ní yāha jíin ná níí yumar xiin Creta. Te ni jinūcoo ná ñin lugar naní Buenos Puertos nuū cájecuññī barco, te yajni un íne ñuu Lasea.

⁹ Te je ni cuu cuehē quivī ni cajica ná jíin barco. Te je yajni quejéé vico mǐjin, te yūcuan cúu tiempo jeē yí jíca barco te sanaa te coo jnūndóho nuū mar. Te ni cahān nihin Pablo jíin de:

¹⁰ Tātā jijnáhan ní, jíin na jeē yóhyo yí coo viaje yáha, te quiji jnūndóho siquī barco, te naa barco jíin ndajniñū, te nde maá yó sanaa te cuu yō, achí de.

¹¹ Te tu ní chúsóhó capitán jeē cahán Pablo, chi sa suhva jeē cahán tēe scáca barco un jíin tēe chíí barco. ¹² Te siquī jeē tu íyó váha lugar nuū ni jécuiññī barco un jeē cóyucú de níí vico mǐjin, te ni cajeni ni cuehē gā de jeē vāha ga núu quendacoo de yūcuán. Chi cájeni ni de jeē núu cuu te jinūcoo de ñuu Fenice te yūcuán coyucú de vico mǐjin. Chi Fenice suni íne yundúte isla Creta nuū cájecuññī barco, te ndijin ichi noroeste jíin suroeste.

Jeē ni jéquīñi ñin tachī níhin jeē stónnda ndute mar

¹³ Te ni jequīñi víta táchī ichi sur, te ni cajeni ni de jeē jinú de Fenice nuú, te ni cascáca ga de barco jíca jíin de xiin Creta. ¹⁴ Te ni cunúu jecu gā, te ni quejéé-ni ñin tachī níhin ndasí jeē naní táchī nordeste. ¹⁵ Te tuá ni cúu ga quihīn yohó barco, chi ni chundahá-ni tachī cuahān jíin, te ni casiáá-ni de jeē cascáca de, te cháha chūcuan cuahān barco jíin ndiñi ná sáha tachī. ¹⁶ Te ni yāha jíin ná xiin isla lulí jeē naní Clauda, nuū jnúhma tachī. Te vēsú súcuan te yōhyo uhū ni cascáca ná barco lulí jeē ndiquín

yatā barco cáhnu. ¹⁷ Te ni casquívī ná ini barco cáhnu. Te ni casucun núu de barco cáhnu jíin yoho. Te cáyūhú de jeē quihín barco nuū yaxín ndute nuū naní Sirte te jn̄h nuū ñítī, te jeē yúcuan ní casnúu de sahma cóquin jeē stechí te jíca barco. Te ni casiáá de jeē na quihín ndé chi chúndahá táchī. ¹⁸ Te tu jécuiñī cuiti jeē yíhi tachī níhin. Te inga quivī un ní caquejéé de cájete de ndajníñu ndiso barco, návāha nduñama gā barco te ma quée chíji ndute. ¹⁹ Te quivī uní ni cajēhe núu ná ndaha ni cajete ná máá ndajníñu jéjníñu barco. ²⁰ Te cuehē quivī tu ní cájito ná níandii ni quīmī siquī jeē ín vicō, ni tu jécuiñī cuiti tachī níhin ún, te tuá cáñūhun ni na cácu ná.

²¹ Te ni cuu quivī jeē tuá cáyeji cuiti na stāā. Te ni jecondichi Pablo sava mēhñu tée ún, te ni cahān de:

Tátā jijnáhan ní, núu ní cájetáhú ní jnūhun jeē ni cáhān ná te ma quéndacoo yó Creta nuú, te ni ma cóto yó jnúndóho yáha ni ma náā ndajníñu núu. ²² Te vijna cáhān níhin na jíin ní jeē cuandeyí ni ni jijnáhan ní, chi ni ñin ní má cúu ní, vēsú naa barco. ²³ Chi jeē cúni ni quiji ñin ndajéhé jeē ní tají máá Yáā Dios nuū ná. Chi máá yá cúu Jitoho ná, te jéjníñu ná núu yā. ²⁴ Te ndajéhé yā ún suhva ni cahān yā jíin ná: Pablo, ma yūhu ró, chi vāha-ni jinū rō nuū rey nación Roma, te jeē siquí rohó te sáha Yāā Dios jeē cácu ndíhi tēe cáhīin jíin ró ini barco yāhá, áchí yá jíin ná. ²⁵ Tátā jijnáhan ní, ma yūhu ní núu súcuan, chi máá ná cúcáhnu ni na Yáā Dios jeē coo nájñūhun ni cahān ndajéhé yā jíin ná. ²⁶ Te jinū nahín yó ñin isla, te ma jinū yachī yō nuū quíngoo yó, áchí de.

²⁷ Te ni cuu uxī cuñ jecuáā nde jeē ní quejéé táchī, te jíca barco nuū mar Adria, te cháha chúcuan cuahān barco sáha tachī. Te máá jecuáā ún te jeē ní cuu sava ñuú te cájeni ni tēe cáscáca barco jeē jé cuacuyajni jinū barco ñūhun íchi. ²⁸ Te ni casínga de ñin jeē cáchicuāhá de nasaa

cúnú ndute, te ni cajini de jeē iyó ócō xahūn ñn metro. Te ni jica barco jecu gā te ni casínga tucu de, te ni cajini de jeē iyó ócō uxā na metro. ²⁹ Te cáyūhú de jeē jécujnáhan barco jíin toto, te ni cajihni de cuūn cāa gancho náhnu yatā barco un, te ni cascāne de nde jehē ndúte návāha chituu te jecuiñī barco. Te yōhyo jnāā de jeē na cúndijin yachī. ³⁰ Te tēe cáscāca barco un ní canducú de cunu de quingoo de jíin barco lulí te cācu de nuū jnúndóho quiiji síquī barco cáhnu núú. Jeē yúcuán ní casnúu de barco lulí un núū ndúte, te cásáha-ni de nájñūhun jeē snúu de inga cāa gancho ichi núú barco návāha tú cuni ñayuu jeē cácu ni de cunu de quingoo de. ³¹ Te ni cahān Pablo jíin capitán jíin táca soldado:

Núu tú coyūcu tée yáha ini barco cáhnu jíin yó, te ma cácu cuiñi maá ní jijnáhan ní, áchí de.

³² Yūcuán na te soldado ni cajehnde de yoho núhni barco lulí, te ni jneni-ni cuahān.

³³ Te nuū cuácundijin te ni cahān Pablo jíin táca tée un jéē na cáji de staā. Te suhva ni cahān de:

Vijna íyó úxī cuūn quiñī jeē cándito ní te tu cáyeji cuiñi ni stāā. ³⁴ Te cáhán ndahú ná jíin ní jeē na cáji ni stāā, návāha nanihīn ni ní te cācu ní, chi ni ñn yó má cúū, ni ma tují cuiñi yō, achí de.

³⁵ Te ni ndīhi ni cahān de jñūhun yáha, te ni quihin de ñn staā, te mēhñu táca ñáyuu un ní nacuatáhú de nuū Yāa Dios, te ni tahú sáva de staā ún, te ni quejéé de yéji de.

³⁶ Yūcuán na te ni candusiñi ni ndīhi de, te suni ni cayejí de staā. ³⁷ Te ndívii na jéē cáñūhun ná ini barco cúu uū ciento unī xico xahūn ñn ná. ³⁸ Te ni cayejí vāha ndīhi ná. Yūcuán na te ni cajete de trigo cuahān nuū ndúte un, návāha na ndúñama gā barco.

Jeē ni quéé barco chíji ndute

³⁹ Te nuū ní cundijin te ni cajito de ñuhun, te tu ní cánacuni de ndé nuū cúu. Te ni cajito de nuū íne cuññi ndute, te suni máá ñítti cúu, te cájeni ni de jinū de yūcuan jíin barco núu na cúu núú. ⁴⁰ Te ni cajehnde de yoho núhñi cāa gancho yūcuan, te ni caquendō cāa un núū mar. Te ni canandají de yujnu jeē scotú chíi barco, te ni nacata caa de sahma cóquin ichi núú návāha chundahá táchī barco, te ni quejéé caca quihñi jíin de ichi núū iyó ñítti. ⁴¹ Te ni jinū barco nuú níhin náquijnáhan ndute. Te ni quēe barco nuū ñítti ñúhun chíji ndute, te ni jññi-ni ichi núú te tuá ni jíca cuíti, te yatā barco un ní cahya-ni jeē níhin ni cani suhmā ndute mar. ⁴² Yūcuán na te ni candajnūhún soldado jeē cáhni de tāca preso návāha ma sūte i te cunu i quingoo i. ⁴³ Te cúní capitán un jēē cācu Pablo, te ni jesicoo de. Chi sa ni cahān de núu ndé ñáyuu jiní sūté te xīhna gā i na nūngoo i sūté i nuū ndúte, te na quénda-ni i quihñi i nuū ñúhun íchi. ⁴⁴ Te suni sūcuan na quécoo ndihñi i quihñi i, sava i coso candá i jíin yujnu cúnu te sava ga i jíin pedazo yujnu barco. Te sūcuan ni cacācu ndihñi ná ní jinūcoo ná ñuhun íchi.

Jeē ni íne Pablo isla Malta

28

¹ Te nuū ní cacācu ná te ñáyuu cáyūcu yūcuan ní cacachi i nuū na jēē isla un nání Malta. ² Te ñáyuu un ní cacundáhú ni i sāña jíjnáhan ná, te ni cascáyú i ñin ñuhūn cáhnu, te ni cacahān i jíin ná jeē nasaā ná, chi mijin sáha jeē cúun saū. ³ Te ni stutú Pablo jecu tujnu íchi. Te jeē jnāā de tujnu un núū ñuhún te ñin coō xeén jínu tí ni quenda tí tujnu un jēē ní cujihñi, te ni chiyuhú-ni tí ndaha de. ⁴ Te ñáyuu cáyūcu yūcuan ní cajito i jeē ndíta caa coō un yíyuhú tí ndaha de, te ni cacahān i:

Tēe yáha vā sanaa te ni jehni de ndīyi núu súcuan, te vēsú je ni cācu de nuū mar, te máá yāā sándaā jniñu ñayuu tu jéhe ga yā jnūhun jeē cótecu de, áchí i.

⁵ Te ni caja Pablo ndaha de, te ni ñinga coō un núū ñuhún, te tú na vé ni ndóho de. ⁶ Te cándētu tāca ñáyuu jeē chūhun i cuiñi de chí cotúú-ni de te cuu de. Te ni cunahán téyí cándētu i, te ni cajito i jeē tú na vé ni ndóho de. Yūcuán na te ni nasāma cájeni ni i, te ni cacahān i jeē ñin yaā cúu Pablo.

⁷ Te yajni yūcuan íyó ñuhun tēe cújéhnu ga Malta un, nání de Publio. Te ni cana tēe un sáña jijnáhan ná, te ni jēhe núu de vehe de ni coyūcu ná jín de unī quivī, te ni jito yúcún de sáña. ⁸ Te tátá Publio cáa de, chi ndóho de cuehyī quiji jín cuéhyī niñī. Te ni jecondēhe Pablo tēe ún, te ni jicān tahu de te ni soó de ndaha de siquī tēe ún, te ni nduvāha-ni de. ⁹ Yūcuán na te ni quijicoo ndihi ga ñayuu cácuñu yūcuán, te suni súcuan ni canduvāha-ni i. ¹⁰ Te ñayuu un ní cajēhe i cuehē ndajniñu ni cacutahū ná. Te nuū ni jínū quivī jeē quíngoo tucu ná jín barco, te ni cajēhe i tācá ndajniñu cuu ná ichi.

Jeē ni jínū Pablo ñuu Roma

¹¹ Te unī yoō ni coyūcu ná Malta. Te ñin barco jeē véji ñuu Alejandría ni ine Malta ní vico míjin, te ichi núu barco un ndéé uū figura ídolo ñuu de nání Cástor jín Pólux. Te ni quivicoo ná barco un cuángoo ná. ¹² Te ni jinūcoo ná ñuu Siracusa, te yūcuan ní coyūcu ná unī quivī. ¹³ Te ni quenda barco cuahān jín ná nduu nduu yundúte, te ni jinūcoo ná ñuu Regio. Te ñinga quivī ún vāha ni quiji tachī ichi sur, te ni quendacoo ná ñuu Regio, te uū quivī te ni jinūcoo ná ñuu Puteoli. ¹⁴ Te yūcuan ní caquijnáhan ná jín jecu hermano cácandije, te ni cacana de sáña ní coyūcu ná jín de ñin semana. Yūcuán na te ni quendacoo

ná jéē quihīn ná ñuu Roma. ¹⁵ Te hermano cáyūcú ini ñuu Roma, je ni canihīn de jnūhun jeē jinúcoo ná, te ni quendacoo de, te sava de ni caquijnahan de sãña ndé ñuu Foro de Apio te sava ga de ñuu Tres Tabernas. Te ná ni jito Pablo nuū de jijnáhan de, te ni nacuatáhú de nuū Yaā Dios, te ni ndundeyí ni de. ¹⁶ Te sáá te ni jinūcoo ná ini ñuu Roma, te capitán ni squívi de tāca preso ndaha tēe cújéhnu nuū tācá soldado ñuu Roma. Te ni cajēhe de jnūhun jeē cone sīn Pablo te condito ñin soldado de.

Jeē ní nacani Pablo jnūhun ya ini ñuu Roma

¹⁷ Te nuū uní quivī te ni cana Pablo tāca tēe cácujuhnu nuū jnáhan ñuu de hebreo cáyūcú ini ñuu Roma. Te ni cacutútú de, te ni cahān Pablo jíin de:

Tátā jijnáhan ní, tú cuiṭi na vé ni sáha ná síquī jnáhan yó hebreo ni siquī tācá jniñu ní catajnúní jíi yō. Te vēsú súcuan te ni cajni i sãña ndé ñuu Jerusalén ni casquívi i sãná ndaha tēe ñuu Roma jijnáhan de. ¹⁸ Te tēe ñuu Roma jeē cácujuhnu cáyūcú Cesarea ni castíchi de sãná, te cácuni de siáá de sãña núu, chi ni cajini de jeē tú na cuēchi ná jéē cúu ná. ¹⁹ Te jnáhan ñuu yō hebreo tu ní cájēhe de jnūhun. Jeē yúcuan ní cahān na jéē quiji ná núu maá rey cujéhnu ga nde ñuu Roma yāhá te sándaā maá de siquī ná. Te tú vēji ná jéē cáquin na cuēchi siquī ñayuu nación yō. ²⁰ Jeē yúcuan ní cana ná níhín jijnáhan ní, návaha cuni na táca ní te ndajnūhun yó. Chi yóhó ñáyuu Israel cáñūhun ni yō jeē nátecu ndīyi, te suu jnūhun un nácani ná, te jeē yúcuan cúu jeē nuhní na jíin cadena yáha, áchi de.

²¹ Te ni cacahān tēe un jíin Pablo:

Tú ni ñin carta ni cátají ñáyuu cáyūcú Judea nuū na jéē cástūhún de jnūhun ní, te tāca jnáhan yó Judea jeē ní quijicoo yāhá, tú ni ñin jnūhun néé ní cacahān de siquī ní.

²² Te cánujnahan ni ná cuni sōho ná ndese cúu jnūhun jeē

cahán ni, chi je cájini na jéē tācá-ni lado cácahān ñayuu contra siquī jnúhun jeé jéē steén ni, áchí de.

²³ Te ni cajeni de ñin quivī, te ni quijicoo cuehē de vehe nuū néne Pablo. Te ni nacani de jnúhun ndese ndácu Yaā Dios jniñu, te ni steén cají de jnúhun nde jenéhen te nde ni ini. Te súcuan ni nducú ndéyí de scándíje de tāca tée un jnúhun Jesús, te ni steén de jeē suni súcuan cáhán ley jeē ni jéhe ya nuū Moisés jíin jnúhun jeē ní catee tēe ni canacani jnúhun Yaā Dios nde jenahán. ²⁴ Te ni cacandíje sava de jnúhun ni cahān Pablo, te sava ga de tu ní cájatáhú de. ²⁵ Chi tú inuú cáhiyo ni de. Te sáá cánducú de quingoo de te ni cahān Pablo:

Ndaā cahán jnúhun jeē ni cáhān Isaías, tēe ni nacani jnúhun Yaā Dios nde jenahán, chi suhva ni cahān de jíin táca jíí yō ni sáha Espiritu Santo:

²⁶ Ni cahān Yaā Dios:

Cuáhán núu jnáhan ñuu rō yāhá te cahān rō jíin i:

Vēsú cuni nahín váha ró te ma jécūhun ni rō,

te vēsú coto vāha ró te ma cúni rō.

²⁷ Chi yōhyo ñihni ni rō,

chi tu cācuni rō cuatáhú ró.

Te yōhyo uhū cájini sōho ró,

chi tu cānujnahān ni rō cuni sōho ró jnúhun ri.

Te nájnūhun cájesi rō tinūu ró

cúu jeē tu cācuni rō nanducú ró ndese cúu,

te tu cācuni rō jeē násāma ini rō

návāha nasávāha ri anuá rō nuū cuéchi ró, ní achi Yaā Dios.

Achí tutu. ²⁸ Núu súcuan te na cástūhun ná nuū ni jéē jnúhun ni tají Yáā Dios jeē jnáma ya yohó, nde vijna te tájí yá jnúhun yáha quíhīn nuū ñáyuu tācá nación jeē tu cájini i jnúhun ya, te máá i chi cuni sōho i, áchí de.

²⁹ Te ni jīnu ni cahān de jnūhun yáha, te cuangoo jnāhan de hebreo, te yōhyo ni cacahān de siquī jnúhun yáha jínáhan de.

³⁰ Te ni condee Pablo uū cuiyā vehe jeē ní quihin núu de ún. Te ni cusī ni de cahān de jíín táca ñáyuu ní quijicoo nuū de. ³¹ Te jéhnú-ni ni nacani de jnūhun ndese ndácu Yaā Dios jniñu, te ni steén de jnūhun máá Jítóho yō Jesucristo, te tú ni ñin ní jési jeē nácani de jnūhun.

Nuevo Testamento en mixteco

New Testament in Mixtec, Atatláhuca (MX:mib:Mixtec, Atatláhuca)
copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

- You must give Attribution to the work.

- You do not sell this work for a profit.

- You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

- You include the above copyright and source information.

- You do not sell this work for a profit.

- You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 14 Jun 2022 from source files dated 13 Jun 2022

9665e546-39d0-5bd5-8b10-38916a94951f